

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 21 1941

15236.07/7282

2

廣文選卷第五

志下

逸民賦

陸雲

富與貴人之所欲也而古之逸民或輕天下細萬物
 而欲專一丘之歡擅一壑之美豈不以身聖當作於
 宇宙而恬貴於紛華者哉故天地不易其樂萬物不
 干其心然後可以妙有生之極享無疆之休也乃為
 賦云

世有逸民兮栖遲乎於一丘委天形之外心兮淡浩然
 其何求陋此世之險隘兮又安足以盤遊杖短策而遂
 往兮乃枕石而漱流載營抱魄懷元執一傲物思寧妙

哈
 佛
 大
 學
 漢
 和
 圖
 書
 館
 珍
 藏
 印



世自逸靜分響於永言滅絕昇於無質相荒土而卜居
度山阿而考室層丘翳莽穹谷重深叢木振穎葛藟
垂陰落魚泳止嚶鳥來吟仍蔬圃於芝薄兮即蘭堂於
芳林靡炎颯以赴節兮揮天籟而興音假樂器於神造
兮詠幽人於鳴琴挹同源於別沼兮養秋菊於高岑蒙
玉泉以濯髮兮臨深谷以投簪寂然尸居儼焉山立遵
渚龍見在林鳳戢遁綿野以宅心望空巖而凱入明發
悟歌有懷在昔賓濮水之清淵兮儀磻溪之一壑毒萬
物之誼譁兮聊漁釣於此澤爾乃薄言容與式宴盤桓
朝挹芳露夕玩幽蘭眇區外而放志兮眷天路而怡顏
望靈嶽之清景兮想佳人於雲端悲滄浪之濁波兮詠

芳池之清蘭鄙終南之辱節兮肆伯陽之考槃眄清霄
以寄傲兮泝凌風而頽歎玄微載晏何思何欲漂若行
雲之浮泊若窮林之木咨有得之必喪兮蓋怙寵之名
一作辱彼貪夫之死權兮固遺生以要祿竦戰兢而履
冰兮祗肅懷以臨谷亮據鼎之無慄兮在顛沛之必渥
是故夫形魂者徵咎體壯者為犧雖明文而龍藻兮終
俛首而受鞿立脩名於禍始兮登全生於戾階資朝華
之促節兮抱千載之長懷濟考終於遠期兮顛靈根而
自摧殉有喪之假樂兮彼無身其孰哀美達人之玄覽
兮邈藏器於無為物有自遺道無不可萬殊有同齊物
無寡並家於國等朝於野然在此而貴身兮神居形而

忘我欽妙古之達言兮信懷莊而悅賈增一作既明於
天爵兮何撥於人禍陋國風之皇恤同明哲於大雅亂
曰乘白駒兮皎皎遊穹谷兮藹藹尋峻路兮崢嶸臨芳
水兮悠裔繫丘園兮暇豫翳翠葉兮重蓋瞻洪崖兮清
輝紛容與兮雲際欲凌霄兮從之恨穹天兮未泰詠歡
友兮清唱和爾音兮此世

感士不遇賦

并序

晉陶潛

淵明

昔董仲舒作士不遇賦司馬子長又爲之余嘗以三
餘之日講習之暇讀其文慨然惆悵夫履信思順生
人之善行抱朴守靜君子之篤素自真風告逝大偽
斯興閭閻懈廉退之節市朝驅易進之心懷正志道

之士或潛玉於當年潔已清操之人或沒世以徒勤
故夷皓有安歸之歎三閭發已矣之哀悲夫寓形百
年而瞬息已盡立行之難而一城莫賞此古人所以
染翰慷慨屢伸而不能已者也夫導達意氣其惟文
乎撫卷躊躇遂感而賦之

咨大塊之受氣何斯人之獨靈稟神智以藏照秉三五
而垂名或擊壤以自歡或大濟於蒼生靡潛躍之非分
常傲然以稱情世流浪而遂徂物羣分以相形密網裁
而魚駭宏羅制而鳥驚彼達人之善覺乃逃祿而歸耕
山嶷嶷而懷影川汪汪而藏聲望軒唐而永歎甘貧賤
以辭榮淳源汨以長分美惡作以異途原百行之攸貴

莫爲善之可娛奉上天之成命師聖人之遺書發忠孝
於君親生信義於鄉閭推誠心而獲顯不矯然而祈譽
嗟乎雷同毀異物惡其上妙笑者謂迷直道者云妄坦
至公而無猜卒蒙耻以受謗雖懷瓊而握蘭徒芳潔而
誰亮哀哉士之不遇已不在炎帝帝魁之世獨祇脩以
自勤豈三省之或廢度進德以及時時既至而不怠無
爰生之晤言念張季之終蔽愍馮叟於郎署賴魏守以
納計雖僅然於必知亦苦心而曠歲審夫市之無虎眩
三夫之獻說悼賈傳之秀朗紆遠轡於促界悲董相之
淵致屢乘危而幸濟感哲人之無偶淚淋漓浪以洒袂承
前王之清誨曰天道之無親澄得一以作鑒恒輔善而

佑仁夷投老以長饑回早夭而又貧傷請車以備櫛悲
如薇而殞身雖好學與行義何死生之苦辛疑報德之
若茲懼斯言之虛陳何曠世之無才罕無路之不溢伊
古人之慷慨病奇名之不立廣結髮以從政不愧賞於
萬邑屈雄志於戚豎竟尺土之莫及留誠信於身後慟
衆人之悲泣商畫規以拯弊言始順而患入奚良辰之
易傾胡害勝其乃急蒼旻遐緬人事無已有感有味疇
測其理寧固窮以濟意不委曲而累已旣軒冕之非榮
豈緼袍之爲耻誠謬會以取拙且欣然而歸止擁孤襟
以畢歲謝良價於朝市

山居賦

此篇攷之宋
書多缺文

宋謝靈運

古巢居穴處曰巖棲棟宇居山曰山居在林野曰丘園在郊郭曰城傍四者不同可以理推言心也黃屋實不殊於汾陽即事也山居良有異乎市廛抱疾就閑順從性情敢率所樂而以作賦揚子雲云詩人之賦麗以則文體宜兼以成其美今所賦既非京都宮觀遊獵聲色之盛而叙山野草木水石穀稼之事才乏昔人心放俗外詠於文則可勉而就之求麗邈以遠矣覽者廢張左之艷辭尋臺皓之深意去飾取素儻值其心耳意實言表而書不盡遺迹索意託之有賞其辭曰

謝子卧疾山頂覽古人遺書與其意合悠然而笑曰夫

道可重故物爲輕理宜存故事斯忘古今不能革質文咸其常合宮非縉雲之館衢室豈放勛之堂邁深心於鼎湖送高情於汾陽嗟文成之却粒願追松以遠遊嘉陶朱之鼓棹迺語種以免憂判身名之有辨權榮素其無留孰知牽犬之路旣寡聽鶴之塗何由哉若夫巢穴以風露貽患則大壯以棟宇祛弊宮室以瑤璇致美則白賁以丘園殊世惟上缺於巖壑幸兼善而罔滯雖非市朝而寒暑均也雖是築構而飭朴兩逝昔仲長願言流水高山應璩作書邛阜洛川勢有偏側地闕周員銅陵之與卓氏克釵裁木爲規裂帛爲之端金谷之麗石子致音微之觀徒形域之蒼蔚惜事異於栖盤至若鳳

叢一臺雲夢青丘潭渠淇園橘林長洲雖千乘之珍苑
孰嘉遯之所遊且山川之未備亦何議於兼求覽明達
之撫運乘機緘而理默指歲暮而歸休詠宏微於刊勒
狹三閭之喪江矜望諸之去國選自然之神麗盡高棲
之意得仰前哲之遺訓俯性情之所便奉微軀以宴息
保自事以乘閒愧班生之夙悟慙尚子之晚研年與疾
而借來志乘拙而俱旋謝平生於知遊捷清曠於山川
其居也左湖右江往渚還汀面山背阜東阻西傾抱含
吸吐款跨紆縈縣聯邪亘側直齊平近東則上田下湖
西谿南谷石塚石滂閔硯黃竹決飛泉於百仞森高薄
於千麓寫長源於遠江派深恣於近瀆近南則會以雙

流縈以三洲表裏回游離合山川愕崩飛於東峭繁傍

薄於西阡拂青林而激波揮白沙而生漣近西則楊賓

二江接峯唐皇名山連縱斜室壁之壁帶谿曾孤二山臨

江竹綠浦以被綠石照澗而映紅月隱山而成陰木鳴

柯以起風近北則二巫結湖兩智通沼橫石判盡休周

二山分表引修隄之逶迤吐泉流之浩漾山巖下而回

澤瀨石上而開道遠東則天台桐柏方石太平二韭四

明五奧三菁表神異於緯牒驗感應於慶靈凌石橋之

莓苔越檣谿之紆縈遠南則松箴棲鷄唐岷漫石崿嶮

對嶺能孟二山分隔入極浦而遭回迷不知其所適上

嶽崿而蒙籠下深沉而澆激遠西則缺四十字

遠北則長江永歸巨海

延納岷漲緬曠島嶼網沓山縱橫以布護水迴沈而縈
浥信荒極之縣眇究風波之睽合徒觀其南術之

生巖 缺 成衍 缺岸測深相渚知淺洪濤滿則曾石

沒清瀾減則沈沙顯及風興濤作水勢奔壯于歲春秋
在月朔望湯湯驚波滔滔駭浪電激雷崩飛流灑漾凌
絕壁而起岑橫中流而連薄始迅轉而騰天終倒底而
見壑比楚貳心醉於吳客河靈懷慙於海若爾其舊居
曩宅今園枌缺槿尚援基井具存曲術周乎前後直
陌矗其東西豈伊臨谿而傍沼迺抱阜而帶山考封域

之靈異實茲境之最然葺駢於巖麓棲孤棟於江源

敞南戶以對遠嶺闢東窗以近田田連岡而盈疇嶺

枕水而通阡阡陌縱橫塋埽經導渠引流脉散溝并

射蔚豐秋苾苾香秔送夏蚤避秋晚成兼有陵陸麻

立夕粟菽候時蠲節通執逝熟粒食與飲謝工商與衡

比以生何待於多膏理取足於腹自園之田自田之湖

泛濫川上緬邈水區濬潭淵窈窕除孤洲之紆餘茲

温泉於春流馳寒波而秋徂生浪於蘭渚日倒景於

椒塗飛漸樹於中沚取水月之歡娛旦延陰而物清夕

棲分而氣敷顯情交之永絕既雲客之暫如水草則萍

藻結緼茨藿蒲芹蓀兼蘋蘋絕行菱蓮雖備物之借美

入浦鯀鮒沿瀨以出泉鳥則鷓鴣鴝鵒鷓鴣鷓鴣鷓鴣

繡質鷓白然力也鵒也綬章晨鳥朝集時鷓也山梁海鳥遠風

朔禽避涼莢生歸北霜降客南接響雲漢侶宿江潭聆

清哇以下聽載王子而上參薄回涉以弁翰映明壑而

自耽山上則猿猱狸獾狂獾獾山下則熊羆豺虎獠

鹿麕麋擲飛枝於窮崖踔空絕於深劓躄谷底而長嘯

攀木杪而哀鳴緡綸不投罟羅不披磻弋靡用蹄筌誰

施鑑虎狼之有仁傷遂欲之無崖顧弱齡而涉道悟好

生之咸宜率所由以及物諒不遠之在斯撫鷗鰕而悅

豫杜機心於林池敬承聖誥恭窺前經山野昭曠聚落

羶腥故大慈之弘誓拯羣物之淪頽豈寓地而空言必

有貸以善成欽鹿野之華苑羨靈鷲之名山企堅固之

貞林希菴羅之芳園雖粹一作容之緬邈謂哀音之恒

存建招提於幽峯翼振錫之息肩庶證王之贈席想香

積之惠餐事在而思通理匪絕而可溫爰初經略杖策

孤征入澗水涉登嶺山行陵頂不息窮泉不停櫛風沐

雨犯露乘星研其淺思罄其矩規非龜非筮擇良選奇

翦榛開逕尋石覓崖四山周回變流迤迤一面南嶺建經

臺倚北阜築講堂傍危峯立禪室臨溪流列僧房對百

年之喬木納萬代之芬芳抱終古之泉源羨膏液之清

長謝麗塔於郊郭殊世間於城傍欣臯素以抱樸果甘

露於道場苦節之僧明發懷抱事紹人徒心通世表是

遊是憇倚石構草寒暑有移至業莫矯觀三世以苴夢
撫六度以取道乘恬知以寂泊含和理之窈窕指東山
以冥期實西方之潛兆雖一日以千載猶恨相遇之不
早賤物重已棄世希靈駭彼佻年愛是長生異浮丘之
誘接望安期之招迎甘松桂之苦味夷皮褐以頽形羨
蟬蛻之匪日撫雲覬其若驚陵名山而屢憇過巖石而
披情雖未階於至道且緬絕於世纓指松菌而興言良
未齊於殤彭山作水役不以一牧資待各徒隨節競逐
陟嶺刊木除榛伐竹抽笋自篁擿箬于谷楊勝桃也所拈
秋冬子可食獲野有蔓草獵涉虀莫亦醞山清介爾景
福苦以木成甘以採孰慕椹高林剥芡巖椒掘藉陽崖

摘憇陰標晝見牽茅宵見索絢芟菰翦蒲以薦以芟既
坭既埏品收不一其灰咸各有律六月採蜜八月樸栗
備物爲繫略載靡悉若乃南北兩居水通陸阻觀風瞻
雲方知厥所南山則夾渠二田周嶺三苑九泉別澗五
谷異巘羣峯參差出其間連岫復陸成其坂衆流漑灌
以環近諸堤擁抑以接遠遠堤兼陌近流開湍凌阜泛
波水往步還還回往匝在渚真蠻俱地呈美表趣胡可
勝單抗北頂以葺館殷南峯以啓軒羅會崖於戶裏列
鏡瀾於窻前因丹霞以頽楣附碧雲以翠椽視奔星之
俯馳顧缺之未牽鷗鴻翻翥而莫及何但鷺雀之翩
還汎泉傍出游潏於東檐桀壁對峙磴礧於西靈脩竹

歲糝以翳蒼濯木森沈以蒙茂蘿曼延以攀援花芬薰
而媚秀日月投光於柯間風露披清於岷岫夏涼寒燠
隨時取適階基回互撩褻乘隔此焉卜寢翫水弄石適
即回眈終歲罔教傷美物之遂化怨浮齡之如借眇遯
逸於人羣長寄心於雲霓因以小湖鄰於其隈衆流所
奏萬泉所回汎濫異形首嵒終肥別有山水路邈緬歸
求歸其路迺界北山棧道傾虧蹬閣連卷復有水逕繚
繞回圓瀾瀾平湖泓泓澄淵孤岸竦秀長洲芊綿旣瞻
旣眺曠矣悠然及其二川合流異源同口赴隘入險俱
會山首瀨排沙以積丘峯倚渚以起阜石傾瀾而稍巖
木映坡而結藪逕南濬以橫前轉北崖而掩後隱叢灌

故悉晨暮託星宿以知左右山川澗石州岸草木旣標
異於前章亦列同於後牘山匪阻而是岵川有清而無
濁石傍林而插巖泉協澗而下谷淵轉渚而散芳岸靡
沙而映竹草迎冬而結葩樹凌霜而振綠向陽則在寒
而納煦面陰則當暑而含雪連岡則積嶺以隱嶙舉峯
則羣竦以巖嶙浮泉飛流以寫空沈波潛溢於洞穴凡
此皆異所而感善殊節而俱悅春秋有待朝夕須資旣
耕以飯亦桑貿衣藝菜當肴採藥救頽自外何事順性
靡違法音晨聽放生夕歸研書賞理敷文奏懷凡厥意
謂揚較以揮且列于言誠特此推北山二園南山三苑
百果備列乍近乍遠羅行布株迎早候晚猗蔚溪澗森

疎崖巘杏壇松園橘林栗圃桃李多品梨棗殊所枇杷
林檎帶谷映渚棋梅流芳於回巒桺柿被實於長浦畦
町所藝含葉蕙芳蓼戩音齋對非蘇薑綠葵眷節以
懷露白薤感時而負霜寒葱標倩以陵陰春藿吐茗以
近陽弱質難恒頽齡易喪撫髮生悲視顏自傷承清府
之有術異在衰之可壯尋名山之奇藥越靈波而越轅
採石上之地黃摘竹下之天門撫層會嶺之細辛拔幽
澗之溪蓀訪鍾乳於洞穴訊丹陽於紅泉安居二時冬
夏三月遠僧有來近衆無闕法鼓即響頌偈清發散花
霏蕤流香飛越析曠劫之微言說像法之遺旨乘此心
之一豪濟彼生之萬理啓善趣於南倡歸清暢於北机

非獨慙於予情諒僉感於君子山中兮清寂羣紛兮自
絕周聽兮匪多得理兮俱悅寒風兮搔屑面陽兮常熱
炎光兮隆熾對陰兮霜雪愒曾臺兮陟雲根坐澗下兮
越風穴在茲城而諧賞傳古今之不滅好生之篤以我
而觀懼命之盡各景之懽分一徃之仁心拔萬族之險
難招驚魂於始化收危形於將闌漾水性於江流吸雲
物於天端觀騰翰之頽頡視鼓鯁之徃還馳騁者儻能
狂愈猜害者或可理攀哲人不存懷抱誰質糟粕猶在
啓滕剖袞見柱下之經二觀濠上之篇七承未散之全
樸救已積於道術嗟夫六藝以宣聖教九流以判賢徒
國史以載前紀家傳以申世模篇章以陳美刺論難以

覈有無兵技醫日龜筮筮夢之法風角冢宅算數律曆
之書或平生之所流覽並於今而稟音諸驗前識之喪
道抱一德而不渝伊昔齟齬實愛斯文援紙握管會性
通神詩以言志賦以敷陳箴銘誄頌咸各有倫爰暨山
棲彌歷年紀幸多暇日自求諸已研精靜慮貞觀厥美
懷秋成章含笑奏理若迺乘攝持之告評養達之篇畏
絕迹之不遠懼行地之多艱均上皇之自昔忌下衰之
在旃投吾心於高人落賓名於聖賢廣成滅景於崆峒
許由遁音於箕山愚公假駒以表谷涓子隱巖以塞芳
萊老萊庇蒙以織畚皓皓棲商而願志卿長寢茂而敷
詞鄭子別谷而永逝梁伯去霸而之會高文居唐而胥

宇臺孝依崖而穴墀咸自得以窮年眇貞思於所遺暨
其窈窕幽深寂寞虛遠事與情乖理與形反既耳目之
靡端豈足跡之所踐蘊終古於三季俟通明於五眼權
近慮以停筆抑淺知而絕簡

酬德賦

齊謝朓玄暉

右衛沈侯以冠世偉才眷余以國士以建武二年余
將南牧見贈五言余時病既以不堪泣職又不獲復
詩四年余奉役朱方又致一首追東編冠亂良無暇
日其夏還京師且事讌言未遑篇章之恩沈侯之麗
藻天逸固難以報章且欲申之賦頌得盡其體物之
旨詩不云乎無言不酬無德不報言既未敢為酬然

所報者寡於德耳故稱之酬德賦其辭曰

悲夫四游之代序六龍驚而不息輕蓋靡於駿奔玉衡
勞於拊翼嗟歲晏之渺歡曾陰默以悽惻玄武伏於重
介宛虹潛以自匿覽斯物之用捨相羣方之動植吊悴
軀於華省理衣簪而自救思披文而信道散奮懣於宵
臆嗟民生之知用知莫深於知己彼知己之爲深信懷
之其何已牽弱葛之蔓延寄陵風於松杞指曲蓬之直
達固有憑於原泉彼排虛與撫實又相鳴於林沚興伐
木於友生詠承筐於君子矧景行之在斯方寄言於同
耻求相仁於積習寓神心於名理惟敦牂之旅歲實興
齊之二六奉武運之方昌覩休風之未淑龍樓儼而洞

開梁邱煥其重複君奉筆於帝儲我曳裾於皇穆藉風
雲之化景申游好於蘭菊結德言而爲佩帶芳猷而爲
服援雅範以自綏懿前修之所勗昔仲宣之發穎實中
郎之倒屣及士衡之籍甚託壯武之高義有杞梓之貞
心協丹采之輝被伊吾人之陋薄雖黻藻之何寘惟風
雅之未變知雲網之不廓譬曾棟之將傾必華棖之先
落翳明離以上賓屬傳體於纖萼周二輝而分崩擠九
鼎於重壑雖魚鳥之欲安駭風川而回薄微天道之布
新嗟負首其焉託余窘迹以多愧塊離尤而獨處君紆
組於名邦貽話言於川墮悵分手於東津望徂舟而延
佇慮古今之爲隔豈山川之云阻賴先德之龍興奉英

靈之電舉事紫沉之密勿腰青綯而容與沾後惠以竭
來竟卒獲其笑語我艤舟以命徒將汨徂於南夏旣勗
余以炯戒又引之以風雅若笙簧之在聽雖舒憂而可
假昔疢病於漳濱思繼歌而莫寫恩靈降之未已奉京
粉而作傳臨邦塗之永陌懷余馬於騏驎望平津而出
宿登崇岡而興賦顧歸憶之南回引行鑣而東驅何瓌
才之博侈申贈辭於萱樹指代匠而切偲比治素而引
喻方含毫而報章迫紛埃之東驚釋末位以言歸忽乘
驛以南赴連篇章之莫訓欲寄言於往句類鍛翮之難
矯似洞源之不寧菟營營而馳驚貌
爾腰戟於戎禁我拂劔於郎闈願同車以日夜城望昏

而掩扉時遊盤以未極睠落景之徂輝苦清顏之倏忽
吝權賞之多違排重關而休告知南館之有依驂識門
以右轉僕望路其如歸忘清漏之不緩惜曉露之方晞
聞夫君之東守地隱蓄而懷仙登金華以問道得石室
之名篇悟寰中之迫脅欲輕舉而捨旃離寵辱於毀譽
去天伐於腥羶忽攜手以上征躋中皇之修迥巾帝車
之廣軾棹河舟之輕艇歷星街之熠燿浮天潢之澗溟
機九轉於玉漿練七明於神鼎吹萬化而不喧度十春
之可並齊天地於倏忽安事人間之紆綈哉

郊居賦

梁沈約 休文

惟至人之非已固物我而兼忘自中智以下洎咸得性

以爲場獸因窟而獲騁鳥先巢而後翔陳巷窮而業泰
嬰居秋而德昌僑棲仁於東里鳳晦跡於西堂伊吾人
之褊志無經世之大方思依林而羽戢願託水而鱗藏
固無情於輪奐非有欲於康莊披東郊之寥廓入蓬藿
之荒茫既從縱豎而橫構亦風除而雨攘昔西漢之標
季余播遷之云始違利建於海昏創惟桑於江汜同河
濟之重世踰班生之十紀或辭祿而反耕或彈冠而來
仕逮有晉之隆安集艱虞於天步世交爭而波逝民失
時而狼顧延亂麻於井邑曝如莽於衢路大地曠而靡
容旻天遠而誰訴伊皇祖之弱辰逢時艱之孔棘違危
邦而窘驚訪安土而移卽肇胥宇於朱方掩閑庭而晏

息值龍顏之鬱起乃憑風而矯翼指皇邑而南轅駕修
衢以騁力遷華扉而來啓張高衡而徙植傍逸陌之脩
平面淮流之清直芳塵浸而悠遠世道忽其窳隆縣四
代於茲日盈百祀於微躬嗟弊廬之難保若霄籟之從
風或誅茅而翦棘或旣西而復東乍容身於白社亦寄
孥於伯通迹平生之耿介實有心於獨往思幽人而軫
念望東臯而長想本忘情於狗物徒羈紲於天壤應屢
歎於牽絲陸興言於世網事滔滔而未合志悄悄而無
爽路將殫而彌峭情薄暮而踰廣抱寸心其如蘭何斯
願之浩蕩詠歸歎而躑躅眷巖阿而抵掌逢時君之喪
德何凶昏之孔熾乃戰牧所未陳實升陟所不記彼黎

元之喋喋將垂獸而為餌瞻穹昊而無歸雖非牢而被
載始歎絲而未覩終道組而後值尋貽愛乎上天固非
民其莫甚授冥符於井翼實靈命之所稟當降監之初
辰值積惡之云稔寧方割於下墊廓重氛於上塲躬靡
暇於朝食常求衣於夜枕既牢籠於媯夏又驅馳乎軒
頊德無遠而不被明無微而不燭鼓玄澤於大荒播仁
風於遐俗闢終古而遐念信王猷其如玉值銜圖之盛
世遇興聖之嘉期謝中消於初日叨光佐於此時闕投
石之猛志無飛矢之麗辭排陽鳥而命邑方河山而啓
基翼儲光於三善長王職於百司兢鄙夫之易失懼寵
祿之難持伊前世之貴仕罕紆情於丘窟譬叢華於楚

趙每驕奢以相越築田田館於銅馳並高門於北闕闢重
扃於華閭豈蓬蒿所能沒教傳嗣於境壤何安身於窮
地味先哲而為言固余心之所嗜不慕權於城市豈邀
名於屠肆詠希微以考室幸風霜之可庇爾乃傍窮野
抵荒郊編霜莢葺寒苒構棲噪之所集築町疇之所交
因犯檐簷而刊樹由妨妨基而翦巢決渟洿之汀淡塞井
甃之淪坳藝芳枳於北渠樹脩楊於南浦遷甕牖於蘭
室同肩墻於華堵織宿楚以成門籍外扉而為戶既取
陰於庭榭又因籬於芳柱開閣室以遠臨闢高軒而旁
觀漸沼止於雷岳周勝階於堂下其水草則蘋萍芡芰
菁藻蕪菰石衣海髮黃荇綠蒲動紅荷於輕浪覆碧葉

於澄湖養嘉實而却老擬羽服於清都其陸卉則紫藍
綠蕪天著山韭鴈齒麋舌牛脣莖首布渡南池之陽爛
漫北樓之後或幕渚而芘地或縈窻而窺牖若乃園宅
殊製田圃異區李衡則橘林千樹石崇則雜果萬株並
豪情之所侈非儉志之所娛欲令紛披蒼鬱吐綠攢朱
羅窻映戶接雷承隅開丹房以四照舒翠葉而九衢抽
紅英於紫蒂銜素藥於青耐其林鳥則翻泊頡頏遺音
下上楚雀多名流嚶雜響或班尾而綺翼或綠衿而絳
穎好葉隱而枝藏乍聞關而來往其水禽則大鴻小鴈
天狗澤虞秋鷺寒鷗脩鷗短鳥曳參差之弱藻戲廣濶
之輕軀翅攄流而起沫翼豉浪而成珠其魚則赤鯉青

魴纖脩鉅鱗碧鱗朱尾脩顱偃頰小則戲渚成文大則
噴流揚白不與羨於江海聊相忘於余宅其竹則東南
獨秀九府擅竒不遷植於淇水豈分根於樂池秋蜩吟
葉寒雀噪枝來風南軒之下負雪北堂之垂訪徂塗之
軫跡觀先識之情僞每誅空而索有皆指難以爲易不
自己而求足並尤物以興累亦昔士之所迷而今余之
所避也原農皇之攸始計厥播之云初肇變腥以粒食
乃人命之所儲尋井田之往記考阡陌於前書顏簞食
而樂在鄭高廩而空虛頃四百而不足畝五十而有餘
撫幽衷五跼念幸取給於庭廬緯東甯之故耜浸北畝
之新渠無褰繫於曉葦不抱怒於朝蔬排外物以齊遣

獨爲累之在余安事于斯之積不羨汝陽之墟臨異維
而騁目即堆冢而流眄雖茲山之培塿乃文靖之所宴
驅四牡之低昂響繁韶之清嘽羅方員而綺錯窮海陸
而兼薦奚一權之足偉委千金其如線試撫臆而爲言
豈斯風之可扇將通人之遠旨非庸情之所見聊遷情
而徒睇識方阜於歸津帶修汀於桂渚肇舉鍾於彊秦
路榮美而款越塗被海而通閩懷三鳥以長念伊故鄉
之可珍實褰期於晚歲非失步於方春何東川之瀾瀾
獨流涕於吾人謬參賢於昔代亟從游於茲所侍綵旄
而齊轡陪龍舟而遵渚或列席而賦詩或班觴而宴語
總惟一朝冥漠西陵忽其葱楚望商飈而永歎每樂愷

於斯觀始則鍾石鏘竽終以魚龍瀾漫或升降有序或
浮白無算貴則內魏蕭曹親則梁武周旦莫不共霜露
而歇滅與風雲而消散眺孫后之墓田尋雄霸之遺武
實接漢之後王信開吳之英主指衡岳而作鎮苞江漢
而爲宇徒徵言於石槨遂延災於金縷忽蕪穢而不脩
同原陵之靡靡寧知螻蟻之與狐兔無論樵芻之與牧
豎睇東嶽以流目心悽愴而不怡蓋昔諸之舊苑實博
望之餘基脩林則表以桂樹列草則冠以芳芝風臺累
翼月榭重栴千楹捷磔百拱相持阜輶林駕蘭泄水嬉
踰三齡而事往忽二紀以歷茲歲遺漫以蕩滌非古今
之異時回余眸於長域覲高館於茲嶺雖混成以無跡

寔遺訓之可秉始食霞而吐霧終陵虛而倒景駕雌蜺
之連卷泛天一作江之悠水一作指咸池而一息望瑤
臺而高騁匪爽言以自誇冀神方之可請惟鐘岩之隱
鬱表皇都而作峻蓋望秩之所宗含風雲而吐潤其爲
狀也則魏我崇峯喬枝拂日堯巖若亭墜石堆星岑峯
肆岫或坳或平盤散枕卧詭狀殊形孤嶺橫插洞穴斜
經千丈萬仞三襲九成亘繞州邑款跨郊垆素烟晚帶
白霧晨縈近循則一巖異色遠望則百嶺俱青觀二代
之瑩兆觀摧殘之餘遂成顛沛於虛豎康歛衿於虛器
穆恭已於巖廊簡遊情於玄肆烈窮飲以致災安忘懷
而受崇何宗祖之奇傑威橫天而陵地惟聖文之績武

始隆平之可至余世德之所君仰遺封而掩淚神寢匪
一靈館相距席布駢駒堂流桂醕降紫皇於天闕延二
妃於湘渚浮蘭烟於桂棟召巫陽於南楚揚玉桴握椒
糈悅臨風以浩唱折瓊茅而延佇敬惟空路邈遠神蹤
遐闊念甚驚飈生猶聚沫歸妙軫於一乘啓玄扉於三
達欲息心以遣累必違人而後豁或結榛於巖根或開
櫺於木末室闈蘿鳥檐梢松栝旣得理於兼謝固忘懷
於飢渴或攀枝獨遠或陵雲高蹈因辜茨以結名猶觀
空以表號得忘已於茲日豈期心於來報天假余以大
德荷茲賜之無彊受老夫之嘉稱班燕禮於上庠無希
躡之秀質乏如珪之令望邀昔恩於舊主重匪報於今

皇仰休老之盛則請微軀於夕陽勞蒙司而獲謝猶奉
職於春坊時言歸於陋宇聊暇日以翺翔棲余志於淨
國歸余心於道場獸依墀而莫駭魚物沼而不綱旋迷
塗於去轍驚後念於徂光晚樹開花初英落藥或異林
而分丹青乍因風而雜紅紫紫蓮夜發紅荷曉舒輕風
微動其芳襲余風騷屑於園樹月籠連於池竹蔓長柯
於簷桂發黃華於庭列水懸墀而帶坻雪縈松而被野
鴨屯飛而不散鴈高翔而欲下並時物之可懷雖外來
而非假定情性之所留滯亦志之而不能捨也傷余情
之頽暮罹憂患其相溢悲異軫而同歸懽殊方而並失
時復託情魚鳥歸閑蓬華旁闕吳娃前無趙瑟以斯終
老於爲請日惟以天地之恩不報書事之官靡迷徒重
於高門之地不載於良史之筆長太息其何言羞愧心
之非一

知已賦

江淹 二首

陳國之華者故吏部郎殷孚其人也博而能通學無
不覽雅賞文章尤愛竒逸雖志隱巖石而名動京師
矣才多深見氣有遠度雖安期千里不能尚焉始於
北府相值傾蓋無已僕乃得罪嶠外遐路窈然始還
舊都會君尋茲故爲茲賦以寄深哀

順祗効寶瀆靈會昌時雨種社山雲降祥承瑤葉之餘
暖系金枝之末光聳孤韻以風邁騫逸氣以烟翔故學

不常師而心鏡羣經精理不啓問而情炤諸密採圖辨緯
遊璣訪曆潛志百氏沈神六經冥拊析義象該洽性靈
儒不隱迹墨無遁形既合道潤亦發才華采耀秋月文
麗冬霞有體有艷光國光家識包上仁義兼高行如彼
清波可挹可鏡又象冲室惟清惟淨氣擬北海情方中
散風流未輟盛名猶慕英馳芬激譽流聲滿我筠心而
松性君金采而玉相伊邂逅之未遇爰契闊於朱方丹
瓊譬而非寶綠蘭比而無芳每賞矜其如契貴懷允而
不忘亟閒席兮惆悵屢緩帶而從容論十代兮興毀訪
五都兮異同談天理之開基辯人道之始終鑿龍圖及
鳳書傾蒼冊與篆字儲西國之闕文採東京之逸記閱

歆向之舊旨闡鍾王之新意對楚漢之澹墨覽魏晉之
鴻策授一作遠近之真假削古今以名實毋齊韻而等
逕軌同懷而共術吐情志而深賞忘年齒而隆眷擬余
才兮前華比余文兮後彥余結袂於山石君憑神於寒
霰何遠期之未從痛哉景其如電堂酒兮一塵暮燈兮
萬春黛草兮永祕朱丹兮何晨聞瑤質兮可變知余采
兮一奪唯華名與芳暉兮爭日月而無沫

思北歸賦

伊小人之薄伎奉君子而輸力接河漢之雄才覽日月
之英色絕雲氣而厲響負青天而撫翼德被命而不渝
恩潤身而無極何規矩之守任信愚陋而不肖愧金碧

之琳琅慙丹矚之照曜赫天網而自離徒夜分而誰弔
遭大道之隆盛雖草木而勿履誤銜造於遠國出顛沛
之願始去三輔之臺殿辭五都之城市惟江南兮丘墟
遙萬里兮長蕪帶封狐兮上景連雄虺兮蒼梧當青春
而離散方仲冬而遂徂寒蒹葭於余馬傷霧露於農夫
跨金峯與翠鑿涉桂水與碧湍雲清冷而多緒風蕭條
而無端後之吟兮日光迥狃之帝兮月色寒究烟霞之
繚繞具林石之嶮岈於是臨虹蜺以築室鑿山楹以為
柱上高高以臨月下淫淫而愁雨奔水潦於遠谷汨木
石於深嶼鷹隼戰而櫓巢龜鼉怖而穴處若季冬之嚴
月風搖木而騷屑玄雲合而為棟黃烟起而成雪虎踞

跼而歛步蛟夔尼而失穴至江離兮始秀或杜衡兮初
滋桂含香兮作葉藕生蓮兮吐絲俯金波兮百丈見碧
沙兮來徃霧益葢兮半出雲雜錯兮飛上石炤爛兮各
色峯近遠兮異象及迴風之搖蕙天潭潭而下露木蕭
梢而可哀草林離而欲暮夜燈光之寒迥歷隱憂而不
去心湯湯而誰告魄寂寂而何語情枯槁而不反神翻
覆而亡據夫以雄才不世之主猶儲精於沛鄉奇略獨
出之君尚婉孌於樊陽滿去洛而掩涕陸出吳而增傷
況北州之賤士為炎土之流人共翹颺而相偶與蟪蛄
而為鄰秋露下兮點劍鳥青苔兮綴衣巾步庭蕪兮
多蒿棘顧左右兮絕親賓憂四填骨思兮亂神願歸靈

於上國雖坎軻而不惜身

廣文選卷第五

廣文選卷第六

哀傷

悼李夫人賦

漢武帝

美連娟以脩嫵兮命櫟絕而不長
飭新宮以延貯兮泯不歸乎故鄉
慘鬱鬱其蕪穢兮噎處幽而懷傷
釋輿馬於山椒兮奄終夜之不陽
秋氣慄以淒淚兮桂枝落而銷亡
神榮氣以遙思兮精浮游而出疆
託沈陰以曠久兮惜蕃華之未央
念窮極之不還兮惟幼眇之相羊
猶同函菱扶以俟風兮芳雜襲以彌章
的容與以猗靡兮縹飄姚虞兮莊燕淫衍而撫楹
兮連流視而娥揚既激感而心逐兮包紅顏而弗明
驪按狎以離別兮宵寤夢

之茫茫忽遷化而不反兮魄放逸以飛揚何靈魂之紛
紛兮哀裴回以躊躇執路日以遠兮遂荒忽而辭去超
兮西征屑兮不見寢淫敞荒寂兮無音思若流波怛兮
在心亂曰佳使爾光隕朱榮兮嫉妬關葺將安程兮方
時隆盛年天傷兮弟子增欷湊沫悵兮悲愁於邑喧不
可止兮響不虛應亦云已兮雉妍大息嘆稚子兮慟慄
不言倚所恃兮仁者不誓豈約親兮既往不來申以信
兮去彼昭昭就冥冥兮既下新宮不復故庭兮嗚呼哀
哉想魂靈兮

遂初賦

漢劉歆子駿

遂初賦者劉歆所作也歆少通詩書能屬文成帝召

為黃門侍郎中壘校尉侍中奉車都尉光祿大夫歆
好左氏春秋欲立於學官時諸儒不聽歆乃移書太
常博士責讓深切為朝廷大臣非疾求出補吏為河
內太守又以宗室不宜典二河徙五原太守是時朝
政已多失矣歆以論議見排擯志意不得之官經歷
故晉之域感今思古遂作斯賦以歎往事而寄已意
昔遂初之顯祿兮遭閭闔之開通躡三台而上征兮入
北辰之紫宮侍列宿於鉤陳兮擁太常之壺極總六龍
於駟房兮奉華蓋於帝側惟大階之侈闊兮機衡為之
難運懼魁杓之前後兮遂隆集於河濱遭陽侯之豐沛
兮乘素波以聊戾得玄武之嘉兆兮守五原之烽燧二

乘駕而既俟僕夫期而在涂馳太行之嚴防兮入天井
 之喬關歷崗岑以升降兮馬龍騰以起摠舞雙駟以優
 遊兮濟黎侯之舊居心滌蕩以暴遠兮迴高都而北征
 劇彊秦之暴虐兮弔趙括於長平好周文之嘉德兮躬
 尊賢而下士駕駟馬而觀風兮慶辛甲名縣於長子名縣哀
 衰周之失權兮數辱而莫扶執孫蒯于屯留兮救王師
 於余吾名縣過下虢地名而歎息兮非平公之作臺背宗周
 而不卹兮苟偷樂而惰怠枝葉落而不省兮公族閔其
 無人曰不悛而愈甚兮政委棄於家門載約屨而正朝
 服兮降皮弁以為履寶礫石於廟堂兮面墮和而不眡
 視始建衰而造亂兮公室由此遂卑憐後君之寄寓兮

信靖公之銅鞮越侯田而長驅兮釋叔向之飛患悅善
 人之有救兮勞祁奚於太原何叔子之好直兮為群邪
 之所惡賴祁子之一言兮幾不免乎徂落震美不必為
 偶兮時有羞而不相及錐韞寶而求價兮嗟千載其焉
 合昔仲尼之淑聖兮竟吡窮乎蔡陳彼屈原之貞專兮
 卒放沉於湘淵何方直之難容兮柳下黜而三辱蘧瑗
 抑而再犇兮豈材知之不足揚蛾眉而見妬兮固醜女
 之情也曲木惡直繩兮亦小人之誠也以夫子之博觀
 兮何此道之必然空下時而雅音世兮自命已之取患
 悲積習之生常兮固明智之所別叔羣既在阜隸兮六
 卿興而為桀荀寅肆而顯恣兮言射叛而擅兵憎人臣

之若茲兮責趙鞅於晉陽軼中國之都邑兮登句注山
以陵厲歷鴈門而入雲中兮超絕轍而遠逝濟臨沃而
逢思兮垂意乎邊都野蕭條以寥廓兮陵谷錯以盤紆
飄寂寥以荒物音兮沙埃起而杳冥迴風育其飄忽兮
迴颭颭之泠泠薄涸凍之凝滯兮第谿谷之清涼漂積
雪之皚皚兮涉凝露之隆霜揚電霰之復一作陸兮慨
原泉之淩陰激流澌之滲淚兮窺九淵之潛淋颭悽愴
以慘怛兮憾風濛以冽寒獸望浪以穴竄兮鳥脇翼之
浚浚同山蕭瑟以鷓鳴兮樹木壞而哇吟地坼裂而憤
忽忽兮石捌破之崑崑天烈烈以厲高兮廖瑋窻以鼻
穿鴈邕邕以遲遲兮野鸛鳴而嘈嘈望亭隧之皦皦兮

飛旗幟之翩翩回百里之無家兮路脩遠之綿綿於是
勒障塞而固守兮奮武靈之精誠據趙奢之策慮兮威
謀完乎金城外折衝以無虞兮內撫民以永寧既邕容
以自得兮唯惕懼於竺竺而寒攸潛温之玄室兮滌濁
穢於太清反情素於寂寞兮居華體之冥冥玩書琴以
條暢兮考性命之變態運四時而覽陰陽兮總萬物之
珍恠雖窮天地之極變兮曾何足乎留意長恬淡以懽
娛兮固賢聖之所喜亂曰幽潛德含聖神兮抱奇內
光自得真兮寵幸浮寄以無常兮寄之去留亦何傷兮
大人之度品物齊兮舍世之過忽若遺兮求位得位固
其常兮守信保已比老以兮

悼騷賦

漢梁竦 敬

彼仲尼之佐魯兮先嚴幽而後弘衍雖離讒以鳴邑兮
卒暴誅於兩觀殷伊周之協德兮暨太甲而俱寧豈齊
量其幾微兮徒信已以然名雖存乃以奉命兮扶目眈
於門閭吳荒萌其已殖兮可信顏於王廬圖往鏡來兮
關比在篇君名既泯沒兮後辟亦然屈平濯德兮潔顯
芬香句踐罪種兮越嗣不長重耳忽推兮六卿卒強趙
殞鳴犢兮秦人入疆樂毅奔趙兮燕亦是喪武安賜命
兮昭以不王蒙宗不幸兮長平顛荒范父乞身兮楚項
不昌何爾生不先後兮惟洪勛以遐邁服荔裳如朱紱
兮騁鸞路於犇瀨歷蒼梧之崇丘兮宗虞氏之俊又臨
衆瀆之神林兮東勅職於蓬碣祖聖道而垂典兮褒忠
孝以為珍既匡救而不得兮必殞命而後仁惟賈傳其
違指兮河楊生之欺真彼皇麟之高舉兮熙大清之悠
悠臨岷川以愴恨兮指丹海以為期

九愁賦

曹植

嗟離思之難忘心慘毒而含傷哀踐有幾之末境越引
領之徘徊捲浮雲以太息顧攀登而無階匪徇榮而愉
樂信舊都之可懷恨時王之謬聽受奸枉之虛辭揚天
威以臨下忽放臣而不疑登高陵而反顧心懷愁而荒
悴念先寵之既隆哀後事之不遂雖危亡之不豫亮無
遠君之心刈楚蘭而秣馬舍余車於西林願接翼於歸

鴻嗟高飛而莫攀因流景而寄言響一絕而不還傷時
俗之趨險獨悵望而長愁感龍鷹而匿跡如吾身之不
留竄江介之曠野獨眇眇而汎舟思孤客之可悲愍予
身之翱翔豈天監之孔明將時運之無常謂內思而自
策筭乃昔之愆殃以忠言而見黜信毋負於時王俗參
差而不齊豈毀譽之可同兢昏瞽以營私害予身之奉
公共明黨而妬賢俾予濟乎長江嗟大化之移易悲性
命之攸遭愁慊慊而繼懷惟慘慘而成晚曠年歲而不
回長去君乎悠遠御飛龍之蜿蜒揚翠電之華旌絕紫
霄而高騫飄弭節於天庭披輕雲而下觀覽九土之殊
形顧南郢之邦壤咸蕪穢而倚傾驂盤桓而思服仰御
驤以悲鳴紆予袂而收涕僕夫感以失聲復先王之正
路豈淫逕之可遵知犯君之招咎耻干媚而求親顧旋
復之無軌長自棄於遐濱與麋鹿以爲羣宿林藪之歲
綦野蕭條而極望曠千里而無人民生期於必死何自
苦以終身寧作清水之沉沉不爲濁路之飛塵踐蹊隧
之危阻登峇峩之高岑見失羣之離獸覲偏棲之孤禽
懷憤激以切痛苦回忍一作思之在心愁戚戚其無爲遊
綠林而逍遙臨白水以悲嘯猿驚聽而失條亮無怨而
棄逐乃余行之所招

哀江南賦

庾信

粵以戊辰之年建亥之月大盜移國金陵瓦解余乃

竄身荒谷公私塗炭華陽奔命有去無歸中興道銷
窮于甲戌三日哭於都亭三年囚於別館天道周星
物極必反傳燹之但悲身世無處求生袁安之每念
王室自然流涕昔相君山之志士杜元凱之平生並
有著書咸能自序潘岳之文彩始述家風陸機之詞
賦先陳世德信年始二毛卽逢喪亂貌是流離至於
暮接燕歌遠別悲不自勝楚老相逢泣將何及畏南
山之雨忽踐秦庭讓東海之濱遂食周粟下亭漂泊
高橋羈旅楚歌非取樂之方魯酒無忘憂之用追爲
此賦聊以記言不無危苦之詞唯以悲哀爲主日暮
途遠人間何世將軍一去大樹飄零壯士不還寒風

蕭瑟荆壁睨柱受連城而見欺載書橫階捧珠盤而
不定鍾儀君子入就南冠之囚季孫行人留守西河
之館申包胥之頓地碎之以首蔡威公之淚盡加之
以血釣臺移柳非玉關之可望華亭鶴唳非河橋之
可聞孫策以天下爲三分衆纔一旅項籍用江東之
子弟人唯八千遂乃分裂山河宰割天下豈有百萬
義師一朝卷甲芟夷斬伐如草木焉江淮無涯岸之
阻亭壁無藩籬之固頭會箕歛者合從締交鋤耨棘
矜者因利乘便將非江表王氣終於三百年乎是知
併吞六合不免軼道之災混一車書無救平陽之禍
嗚呼山嶽崩頽旣履危亡之運春秋迭代必有去故

之悲天意人事可以悽愴傷心者矣況復舟楫路窮
星漢非乘槎可上風塵道阻蓬萊無可到之期窮者
欲達其言勞者須歌其事陸士衡聞而撫掌是所甘
心張平子見而陋之固其宜矣

我之掌度承周以世功而爲族經邦佐漢用論道而當
官稟嵩華之玉石潤河洛之波瀾居負洛而重世邑臨
河而晏安逮永嘉之艱虞始中原之乏主民枕倚於墻
壁路交橫於豺虎值五馬之南奔逢三星之東聚彼凌
江而建國始播遷於吾祖分南陽而賜田裂東嶽而胙
土誅茅宋玉之宅穿徑臨江之府水木交運山川崩竭
家有直道人多全節訓子見於純深事君彰於義烈新

野有生祠之廟河南有胡書之碣况乃少微真人天山
逸民階庭空谷門巷蒲輪移談講樹就簡書筠降生世
德載誕真臣文詞高於甲觀模楷盛於漳濱嗟有道而
無鳳歎非時而有麟旣姦回之異音備匿終不悅於仁人
王子洛濱之歲蘭成射策之年始含香於建禮仍矯翼
於崇賢遊存雷之講肆齒明離之胄筵旣傾蠹而酌海
遂測管而窺天方塘水白釣渚池圓侍戎韜於武帳聽
雅曲於文絃乃解懸而通籍遂崇文而會武居笠轂而
掌兵出蘭池而典午論兵於江漢之君拭玉於西河之
主于時朝野歡娛池臺鐘鼓里爲冠蓋門成鄒魯連茂
苑於海陵跨橫塘於江浦東門則礮石成橋南極則鑄

銅爲柱橋則園植萬株竹則家封千戶西賚浮玉南琛
沒羽吳歛越吟荆艷楚舞草木之遇陽春魚龍之逢風
雨五十年中江表無事王歛爲和親之侯班超爲定遠
之使馬武無預於甲兵馮唐不論於將帥豈知山嶽闢
然江湖潛沸漁陽有閭左戍卒離石有將兵都尉天子
方刪詩書定禮樂設重雲之講開士林之學談劫燼之
灰飛辨常星之夜落地平魚齒城危獸角卧刁斗於榮
陽絆龍媒於平樂宰衡以干戈爲兒戲搢紳以清談爲
廟畧乘漬水以膠船馭奔駒而朽索小人則將及水火
君子則方成猿鶴弊箠不能救鹽池之鹹阿膠不能止
黃河之濁旣而魴魚頰尾四郊多壘豕狎江鷗宮鳴野

雉湛盧去國餘艗失水見被髮於伊川知百年爲戎矣
彼姦逆之熾盛又遊魂而放命大則有鯨有鯢小則爲
梟爲獍負其牛羊之力凶其水草之性非玉燭之能調
豈璿璣之可正值天下之無爲尚有欲於羈縻飲其琉
璃之酒賞其虎豹之皮見胡桐於大夏謝鳥卵於條支
豺牙密厲虺毒潛吹輕九鬻而欲問聞三川而遂窺始
則王子召戎姦臣介冑旣言政而離邊遂師言而泄漏
望廷尉之逋囚反淮南之窮寇出狄泉之蒼鳥起橫江
之困獸地則石鼓鳴山天則金精動宿北闕龍吟東陵
麟鬪爾乃桀黠備扇憑陸以幾甸擁狼望於黃圖填廬山
於赤縣青袍如皁白馬如練天子履端廢朝舉于長園

高宴兩觀當戟千門受前白虹貫日蒼鷹擊殿竟遭夏
臺之禍終視堯城之變 守無奔問之人千戚非平戎
之戰陶侃空爭米船顧宋虛揮羽扇將軍死綏路絕重
圍烽隨星落書逐鷲飛遂乃韓分趙裂鼓卧旗折失羣
班馬迷輪亂轍猛士嬰城謀臣卷舌昆陽之戰象走林
常山之陣虵奔穴五郡別兄弟相悲三州則父子離別
護軍慷慨忠能死節二世爲將終於此滅濟陽忠壯身
參末將兄弟二人義聲俱唱主辱臣死名有身喪敵人
歸元三軍悽愴尚書多弄守備是長雲梯可拒地道能
防有齊將之閉壁無燕師之卧墻大事去矣人之云亡
甲子奮發勇氣咆勃實認元戎身先士卒胃落魚門兵

填馬窟屢犯通中頻遭刮骨功業天狂身名埋沒或以
隼翼鷄披虎威狐假沾漬鋒鏑脂膏原野兵弱虜強城
孤氣寡聞鶴唳而虛驚聽胡笳而淚下據神亭而亡戟
臨橫江而棄馬崩於鉅鹿之沙碎於長平之瓦於是桂
林顛覆長洲麋鹿潰潰沸騰茫茫慘黷天地離阻人神
慘酷晉鄭靡依魯衛不睦競動天關爭迴地軸探雀殼
而未飽待熊蹯而詎熟乃有車側郭門筋懸廟屋鬼同
曹杜之謀人有秦庭之哭爾乃假刻璽於關塞稱使者
之酬對逢鄂坂之譏嫌值而門之征稅乘白馬而不前
策青驪而轉礙吹落葉之扁舟飄長風於上游彼鋸牙
而鈎爪又巡江而習流排青龍之戰艦鬪飛鷺之船樓

張遼臨於赤壁王濬下於巴丘乍風驚而射火或箭重
而沉舟未辨聲於黃蓋已先沉於杜侯落帆黃鶴之浦
藏船鸚鵡之洲路已分於湘漢星猶看於斗牛若乃陰
陵路絕釣臺斜趣望赤岸而沾衣鱣鳥江而不渡雷池
柵浦鵠陵焚戍旅舍無烟巢禽無樹謂荆衡之杞梓庶
江漢之可恃淮海維揚三千餘里過漂渚而寄食託蘆
中而渡水屈于七澤濱于十死嗟天保之未定見殷憂
之方始本不達於危行又無情於祿仕謬掌衛於中軍
誤尸承於御史信生世等於龍門辭親同於河洛奉立
身之遺訓受成書之顧託昔三世而無慙今七葉而方
泣風雨於梁山惟枯魚之銜索入欹斜之小徑掩蓬

藿之荒扉就汀洲之杜若待蘆葦之單衣于時西楚霸
王劍及繁陽麾兵金匱校戰玉堂蒼鷹赤雀鐵舳牙檣
沉白馬而誓衆負黃龍而渡江海潮迎艦江萍送王戎
車屯于石城戈船掩于淮泗諸侯則鄭伯前驅盟主則
荀瑩暮至剖巢燻穴奔虜走魅埋長狄於駒門斬蚩尤
於中冀然腹爲燈飲頭爲器直虹貫壘長星屬地昔之
虎據龍盤加以黃旗紫氣莫不隨狐兔而窟穴與風塵
而殄悴西瞻博望北臨玄圃月榭風臺池平樹古倚弓
於玉女窻扉繫馬於鳳凰樓柱仁壽之鏡徒懸茂陵之
書空聚若夫立德立言謨明寅亮聲超於繫表道高於
河上更不遇於浮丘遂無言於師曠以愛子而托人知

西陵而誰望非無北闕之六猶有靈臺之仗司徒之表
裏經綸狐偃之惟王實勤橫琬戈而對霸主執金鞭而
問賊臣平吳之功壯於杜元凱王室是賴深於温太真
始則地名全節終則山稱在人南陽校書去之已遠上
蔡逐獫知之何晚鎮北之負譽矜前風颯凜然水神遭
箭山靈見鞭是以鰲熊傷馬浮蛟沒鳶才子併命俱非
百年中宗之夷凶靜亂大雪寃耻去代邸而承基遷唐
郊而纂祀反舊章於司隸歸餘風於正始沉猜則方逞
其欲藏疾則自矜於已天下之事沒焉諸侯之心搖矣
既而齊交北絕秦患四起况肯闕而懷楚冀端委而開
吳驅綠林之散卒拒驪山之叛徒營軍梁澹菟乘巴渝

問諸淫昏之鬼求諸厭刻之巫荆門遭廩延之戮夏口
濫達泉之誅茂因親以教愛忍和樂於彎弧既無謀於
肉食非所望於論都未深思於五難先自擅於三端登
陽城而避險卧砥柱而求安既言多於忌刻實志勇而
刑殘但坐觀於時變本無情於急難地惟黑子城猶彈
丸其怨則贖其盟則寒豈寃會之能塞海井愚叟之可
移山况以沴氣朝浮妖精夜殞赤烏則三朝夾日蒼雲
則七重圍軫亡吳之歲既窮入郢之年斯盡周含鄭怒
楚結秦寃有南風之不競值西隣之責言俄而梯衝亂
舞冀馬雲屯棧秦車於暢轂沓漢鼓於雷門下陳倉而
連弩渡臨晉而橫船雖復楚有七澤人稱三戶箭不麗

於六麋雷無驚於九虎辭洞庭兮落木去涪陽兮極浦
熾火兮楚旗貞風兮害盍乃使玉軸揚灰龍文折柱下
江餘成長林故營徒思掛馬之移未見燒牛之兵章慢
支以轂走宮之奇以族行河無冰而馬度關未曉而鷄
鳴忠臣解骨君子吞聲章華望祭之所雲夢僞遊之地
荒谷縊於莫敖治父囚於羣師劓穿摺拉鷹鷂批攢冤
霜夏零憤泉秋沸城崩杞婦之哭竹染湘妃之泪水毒
秦涇山高趙陁十里五里長亭短亭饑隨螿鷺暗逐流
螢秦中水黑關上泥青于時瓦解冰泮風飛電散渾然
千里淄澠一亂雪暗如沙冰橫似岸逢赴洛之陸機見
離家之王粲莫不聞隴水而掩泣向關山而長歎况復

君在交河妾在清波石望夫而逾遠山望子而逾多才
人之憶代郡公主之去清河栩揚亭有離別之賦臨江
王有愁思之歌別有飄飄武威羈旅金微班超生而望
返溫序死而思歸李陵之雙鳧求去蘇武之一鴈空飛
若江陵之中否乃金陵之禍始雖借人之外力實蕭牆
之內起撥亂之王忽焉中興之宗不祀伯兮叔兮同見
戮於猶子荆山鵲飛而玉碎隨岸蛇生而珠死鬼火亂
於平林殤魂遊於新市梁故豐徙楚實秦亡不有所廢
其何以昌有媯之後將育於姜輸我神器居爲讓王天
地之大德曰生聖人之大寶曰仁用無賴之子弟舉江
東而全棄惜天下之一家遭東南之反氣以鶉首而賜

秦天何為而此醉且夫天道迴旋生民預焉余烈祖於
西晉始流播於東川洎余身而七葉又遭時而北遷提
挈老幼關河異年死生契闊不可問天况復零落將盡
靈光巋然日窮于紀歲將復始逼切危慮端憂暮齒踐
長樂之神臯望宣平之貴里渭水貫於天門驪山迴於
地市幕府大將軍之愛客丞相平津侯之待士見鍾鼎
於金張聞絃歌於許史豈知灞陵夜獵猶是故時將軍
咸陽布衣非獨思歸王子

哀千里賦

江淹 二首

蕭蕭江陰兮荆山之岑北繞瑯琊碣石南馳九疑桂林
山則異嶺奇峯橫嶼帶江雜樹億尺紅霞萬重水則遠

天相逼浮雲共色云云無底溶溶不測其中險如孟門
豁若長河參差巨石縱橫龜鼉若乃夏后未鑿秦皇未
闢斬岩生岸迤邐成迹馳湍走浪漂沙擊石伊孟冬之
初立出首夏以歸來自出國而辭友永懷慕而抱哀蒐
終朝以三奪心一夜而九摧徒望悲其何及銘此恨於
黃埃於時鴻鴈既鳴秋光亦窮水黠黠兮蓮葉動山蒼
蒼兮樹色紅思雲甫兮沅北望蜺裳兮澧東惜重華之
已沒念芳草之坐空既而悄愴成憂澗默自憐信規行
之未曠知矩步之已難雖河北之爽塏猶橘柚之不遷
及年歲之木晏願臣坐於霸山

傷友人賦

僕之神交者嘗有陳郡之袁炳焉有逸才有妙賞博
學多聞明敏而識奇異僕以為天下絕倫黯與秋草
同折今不復見才矣既而陳書有念橫瑟無從雖乏
張范通靈之感庶同嵇尚篤徒之哀乃為辭曰

泫然沾衣兮悲衰友之英秀系神緒而作氏胤靈枝而
啓胃轢四代而式昌洎十葉而克茂友人之生川岫降
明峻調迥韻惠志聰情倜儻遠度寂寥靈素文攀淵卿
史類遷固譬如冬雪既潔將似秋月至徹乃上代而少
雙故叔世而曠絕弔蕙若之暫芳慟琬琰之永闕余既
好於斯友乃神交於一顧邈疇年之繾綣窈生平之遊
遇既遊遇兮可尋乃協好兮契心懷愛重於素壁結分

珍於黃金拾一代而笑淺訪古人而求深故高術而共
逕豈異袖而同襟爾挂情於霜栢我發意於東桂擘千
品之消散鏡百侯之哀替帶瑤玉而爭光握隋珠而比
麗披圖兮炤籍抽經兮閱史共檢兮雜書同析古析兮
河紀既思遊兮百說亦窮精兮萬微愛詩文之綺發賞
賦艷兮錦起聲古今之寶賚殫竹素之琛奇信朝日之
徒昊屬夜星之空移覽秋實於西苑摘春華於東池蚤
同歲於上京未滿年於下國爾湘水兮深沉我前山兮
眇默惟音華與書酒伊楚越兮南北余結誼兮梁門復
從官兮朱藩何人遙而困阻而天道之匪存凋碧玉之
神樹銷紫石之靈根永遠書於江澨結深痛於爾寬寬

線昧其若絕泣榮盈其若結玄妙賞之不留悼知音之
已逝金雖重而見鑄桂徒芳而被折百年一盡兮貴揚
蕤於後烈

論文

禮賦

荀况二首

爰有大物非絲非帛文理成章非日非月爲天下明生
者以壽死者以葬城郭以固二軍以強粹而王駁而伯
無一焉而亡臣愚不識敢請之王王曰此夫文而不采
者與簡然易知而致有理者與君子所敬而小人所不
詔者與性不得則若禽獸性得之則甚雅似者與匹夫
隆之則爲聖人諸侯隆之則一四海者與至明而約甚

順而體請歸之禮

知賦

皇天隆物以示下民或厚或薄帝不齊均桀紂以亂湯
武以賢濬濬淑淑皇皇穆穆周流四海曾不崇日君子
以修跡以空室大參乎天精微而無形行義以正事業
以成可以禁暴足窮百姓待之而後寧秦臣愚不識願
問其名曰此夫安寬平而危險隘者邪修潔之爲親而
雜汙之爲狄者邪甚深藏而外勝敵者邪法舜禹而不
能揜迹者邪行爲動靜待之而後適者邪血氣之精也
志意之榮也百姓待之而後寧也天下待之而後平也
明達純粹而無疵也夫是之謂君子之知

太玄賦

揚雄

觀大易之損益兮覽老氏之倚伏省憂喜之共門兮察
吉凶之同域繳繳者乎日月兮何俗聖之暗燭豈愒寵
以冒災兮將噬臍之不及若飄風不終朝兮驟雨不終
日雷隆隆而輒息兮火猶一作熾熾而速滅自夫物有盛
衰兮况人事之所極奚貪婪於富貴兮迄喪躬而危族
豐盈禍所棲兮名譽怨所集薰以芳而致燒兮膏含肥
而見炳翠羽嫩而歿身兮蚌含珠而擘裂聖作典以濟
時兮驅蒸民而入甲張仁義以爲綱兮懷忠貞以矯俗
指尊選以誘世兮疾身沒而名滅豈若師由聃兮執玄
靜於中谷納僞祿於江淮兮揖松喬於華嶽升崑崙以

散髮兮踞弱水以濯足朝發軔於流沙兮夕翱翔乎碣
石忽萬里而一頓兮過列仙以託宿役青要與承戈兮
舞馮夷以作樂聽素女之清聲兮觀宓妃之妙曲茹芝
英以禦餓兮飲玉醴以解渴排閭闔以窺天庭兮騎駢
騏以踟躕載羨門與儷游兮永覽周乎八極亂曰甘餌
含毒難數嘗兮麟而可羈近大羊兮鸞鳳高翔戾青雲
兮不掛網羅固足珍兮斯錯位極離大戮兮屈子慕清
葬魚腹兮伯姬曜名焚厥身兮孤竹二子餓首山兮斷
跡屬婁何足稱兮辟斯數子智若淵兮我異於此執太
玄兮蕩然肆志不拘孿兮

音樂

笛賦

宋玉

余嘗觀於衡山之陽見奇篠異幹罕節間枝之叢生也
其處磅礴千仞絕谿凌阜隆崛萬丈盤石雙起丹水涌
其左醴泉流其右其陰則積雪凝霜霧露生焉其東則
朱天皓日素朝明焉其南則盛夏清微春陽榮焉其西
則涼風遊旋吸逮存焉幹枝洞長架出有良名高師曠
將爲陽春北鄙白雪之曲假塗南國至此山望其叢生
見其異形曰命陪乘取其雄焉宋意將送荆卿於易水
之上得其雌焉於是乃使王爾公輸之徒合妙意角較
手遂以爲笛於是天旋少陰白日西靡命嚴春使午子
延長頸奮玉手摘朱脣曜皓齒頰顏臻玉貌起吟清商

追流徵歌伐檀號孤子發又轉舒積鬱其爲幽也甚乎
懷永抱絕喪夫天亡稚子纖悲徵痛毒離肌腸腠理激
斗入青雲慷慨切窮士度曲羊腸坂揆殃振奔逸遊泆
志列絃節武毅發沈憂結呵鷹揚叱太一聲淫淫以黯
黹氣旁合而爭出歌壯士之必往悲猛勇乎飄疾麥秀
漸漸兮鳥聲革翼招伯奇於源陰追申子於晉域夫奇
曲雅樂所以禁淫也錦繡黼黻所以禦暴也絳則泰過
是以檀卿刺鄭聲周人傷北里也亂曰芳林皓幹有奇
寶兮博人通明樂斯道兮嚴衍灑漫終不老兮雙枝間
麗貌甚好兮八音和調成稟受兮善言不妄爲世保兮
絕鄭之遺離南楚兮美風洋洋而揚茂兮嘉樂悠長俟

賢士兮鹿鳴萋萋思我友兮安心隱志可長久兮

觀舞賦

張衡

客有觀舞於淮南者美而賦之曰音樂陳兮旨酒施擊
靈鼓兮吹參差叛淫衍兮漫陸離於是飲者皆醉日亦
既晏美人興而將舞乃脩容而改服襲羅縠之雜錯申
綢繆而自飾拊者嗽其齊列盤鼓煥以駢羅抗脩袖以
翳面展清聲而長歌歌曰驚雄遊兮孤雌翔臨歸風兮
思故鄉搦纖腰以玄折鬟傾倚兮低昂增芙蓉之紅華
兮光灼爍以發揚騰嫵目以顧盼盼爛爛以流光連翩
絡繹乍續乍絕裾似飛鸞袖如迴雪於是粉黛弛兮玉
質粲珠簪挺兮緇髮亂然後飾筭整髮被織垂縈同服
駢奏合體齊聲進退無差若影追形

橫吹賦

江淹

驃騎公以劔卒十萬禦荆人於外郊鐵馬煩而人聳
色綵旄耀而士銜威軍容有橫吹僕感而爲之賦云
北陰之竹兮百尺而不見日石磴礧而成象山沓合而
爲一雲逕逕而孤去風時時而寒出木斂柯而攢抗草
騫葉而蕭瑟故左崎嶇右硎嶺樹崑崙水泓澄鎮雄蛟
及雌虺颺獨鳴與單鷹白山巖赤山赭匝流沙經西極
原陸窈灌莽深人聲絕馬迹沉寂然四顧增欷累吟雖
欲上而不能禁此竹方可爲器迺出天下之英音於是
帶以珉色扣以瓊文潤如沉水華若浮雲赤綬紫駁星

含露分其聲也則鞅鬱有意惟萃不群超遙衝山崎曲
抱津綿羃順序周流銜呂故四骨秦氣悲憾如懟北質
燕聲酸極無已斷絕百意繚繞萬情吟黃烟及白草泣
虜軍與漢兵於是海外之雲處處而秋色河中之鴈一
一而學飛素野黯以風暮金天艷以霜威衣袂動兮霧
入冠弓刀勁兮馬毛寒五方軍兮出不及雜色騎兮往
來還瞻如雲兮志如星山可動兮石可銘功一堅兮迹
不奪蒐旣英兮鬼亦靈奏此吹兮有曲何歌盡而淚續
重一命而若烟知半氣之如燭美人戀而嬋媛壯夫去
而躑躅故感魂傷情獲賞彌口妙噐奇製見貴歷代所
以韻起西國響流東都浮江流泗歷楚傳吳故函夏以

爲寶飾京關以爲戎儲至于具曹象彌之威織文魚服
之容鄞山錫刃耶溪銅鋒皆陸斷犀象水斬蛟龍載雲
旗之逶迤扈屯騎之溶溶啾寥亮於前衡嘒陸離於後
陣視眈眈而或近聽嘹嘈而遠震奏白登之二曲起關
山之一引吐哀也則瓊瑕失綵銜樂也則鈔聖生潤採
菱謝而自罷綠水慙而不進代能識此聲者長滅淫而
何吝

情

擣素賦

漢班婕妤二首

測平分以知歲酌玉衡之初臨見禽華以庶色聽霜鶴
之傳音佇風軒而結睇對愁雲之浮沉雖松梧之貞脆

豈榮彫其異心若乃虞儲懸月暉水流清桂露朝滿涼
衿夕輕燕姜含蘭而未吐趙女抽簧而絕聲改容飾而
相命卷霜帛而下庭以羅裙之綺靡振珠珮之精明若
乃盼睐生姿動容多製弱態含羞妖風靡麗皎若明魄
之升崖煥若荷華之昭晰調鉛無以玉其貌凝朱不能
異其脣勝雲霞之邇日似桃李之向春紅黛相媚綺組
流光笑笑移妍步步生芳兩靨如點雙眉如張頰肌柔
液音性閑良於是投香杵扣玫砧擇鸞聲爭鳳音梧因
虛而調遠柱由貞而響沉散繁輕而浮捷節踈亮而清
深含笙總筑比玉兼金不墮不箠匪瑟匪琴或旅環而
紆鬱或相參而不雜或將往而中還或已離而復合翔

鴻爲之徘徊落英爲之颯沓調非常律聲無定本任落
手之參差從風颺之遠近或連躍而更投或暫舒而長
卷清寡鸞之命羣哀離鶴之歸晚當是時也鍾期改聽
伯牙弛琴桑間絕響濮上傳音蕭史編管以擬吹周五
調笙以象吟若乃窈窕姝妙之年幽閑貞專之性符皎
日之心甘首疾之病歌采綠之章發東山之詠望明月
以撫心對秋風而掩鏡閱紋練之初成擇玄黃之妙匹
準華裁於昔時疑形異於今日想嬌一作奢之或至許
椒蘭之多術慙陋製之無韻慮蛾眉之爲愧懷百憂之
盈抱空千里兮飲淚修長袖於妍袂綴半月於蘭襟表
纖手於微縫庶見跡而知心計脩路之遐復怨芳非之

易泄書既封而重題筭已緘而更結慙行客而之一作無
言還空房而掩咽

自悼賦

承祖考之遺德兮何性命之淑靈登薄軀於宮闕兮克
下陳於後庭蒙聖皇之渥惠兮當日月之盛明揚光烈
之翕赫兮奉隆寵於增成既過幸於非位兮竊庶幾乎
嘉時每寤寐而索息兮申佩離以自思陳女圖以鏡鑒
兮顧女史而問詩悲晨婦之作戒兮哀喪閭之爲郵美
皇英之女虞兮榮妊姒之母周雖愚陋其靡及兮敢舍
心而忘茲歷年歲而悼懼兮閱蕃華之不滋痛陽祿與
柘諱兮仍襁褓而離災豈妾人之殃咎兮將天命之不

可求白日忽已移光兮遂晝莫而昧幽猶被覆載之厚
德兮不廢捐於罪郵奉共養于東宮兮託長信之末流
共灑掃於帷幄兮永終死以爲期願歸骨於山足兮依
松栢之餘休重曰潛玄宮兮幽以清應門閉兮禁闥扃
華殿塵兮玉階落音中庭萋兮綠草生廣室陰兮帷幄
暗房權虛兮風泠泠感帷裳兮發紅羅紛綵絲兮紈素
聲神眇眇兮密翫處君不御兮誰爲榮俯視兮丹墀思
君兮履綦仰視兮雲屋雙涕兮橫流顛左右兮和顏酌
羽觴兮銷憂惟人生兮一世忽已過兮若浮已獨享兮
高明處生民兮極休勉虞精兮極樂與福祿兮無期綠
衣兮白華自古兮有之

誚青衣賦

漢張超子並

彼何人斯悅此艷姿麗辭美譽雅句斐斐文則可佳志
 卑意微鳳兮鳳兮何德之衰高固可華何必棘茨醴泉
 可飲何必濟池隋一作珠彈雀堂溪川葵鴛雛喙鼠何
 異乎鵠歷觀古今禍福之階多由嬖妾淫妻書戒牝鷄
 詩載哲婦三代之季皆由斯起晉獲驪戎斃懷恭太子
 子有夏取去聲仍覆宗絕祀叔矜納申聽聲狼似穆子私
 庚豎牛餒已黃歇之敗從李園始魯受齊樂仲尼逝矣
 文公懷安姜笑其鄙周漸將衰康王晏起畢公喟然深
 思古道感彼關雎性不雙侶願得周公妃以窈窕防微
 消漸諷諭君父孔氏大之列冠篇首晏嬰潔志不顧景

女乃雋不疑奉霍不受見尊不迷况此麗堅三族無紀
 綢繆不序蟹行索妃旁行求隅昏無媒理宗廟無主門
 戶不名依其在所生女為妾生男為虜歲時酹祀詣其
 先祖或於馬廐厨間竈下東向長跪接狎觴酒悉請諸
 靈僻邪無主多乞少出銅丸鐵柱積繒累億皆來集聚
 嬌婉懽心各有先後臧獲之類蓋不足數古之贅壻尚
 猶塵垢况明智者欲作奴父勤節君子無當自逸宜如
 防永守之以一秦繆思魯故獲終吉

清思賦

阮籍

余以為形之可見非色之美音之可聞非聲之善昔黃
 帝登仙於荆山之上振咸池於南嶽之岡鬼神其幽而

夔牙不聞其童童一作女娃耀榮於東海之濱而翩翩於

洪西之旁林石之隕從而蓬臺不照其光是以微妙無

形寂寞無聽然後乃可以窺窈窕而淑清故白日麗光

則季后不步其容鐘鼓聞鈴則延子不揚其聲夫清虛

寥廓則神物來集飄飄恍惚則洞幽貫冥冰心玉質則

激潔思存恬淡無慾則泰志適情伊表慮之道好兮又

焉處而靡違寒風邁於黍稷兮誨子而遊鵲申孺悲而

毋歸兮吳鴻哀而象生茲感激以達神豈浩漭而弗營

志不覘一作而神正心不蕩而自誠固秉一而內修堪

粵止之匪傾惟清朝而夕晏兮指濛汜以永寧是時羲

和既頽玄夜始屆望舒整轡素風來征輕帷連颺華茵

肅清彭蚌微吟螻蛄徐鳴望南山之崔巍兮顧北林之

葱青太陰潛乎後房兮明月耀乎前庭廼申展而缺寐

兮忽一悟而自驚焉長靈以遂寂兮將有歛乎所之意

流盪而改慮兮心震動而有思若有來而可接兮若有

去而不辭嗟博或作賤而失庚情散越而靡治豈覺察

而明真兮誠雲夢其如茲驚奇聲之異缺兮鑑殊色之

在斯開丹桂之琴瑟兮聆崇陵之參差始徐唱而微響

兮情悄慧以蛟蛇遂招雲以致氣兮乃振動而大駭聲

颼颼以洋洋若登崑崙而臨西海超遙茫渺不能究其

所在心漭漭而無所終薄兮思悠悠而未半鄧林殫於

大澤兮欽邪悲於瑤岸徘徊夷由兮猗靡廣衍遊平圃

以長望兮乘脩水之華旂長以永至兮絳平衢之
大夷循路曠以徑通兮辟閭闔而洞闡美要眇之飄遊
兮倚東風以揚暉沐消滌以淑密兮體清潔而靡譏厭
白玉以為面兮披丹霞以為衣華九英之曜精兮珮瑤
光以發微服儵煜以繽紛兮絳衆采以相綏色熠熠以
流爛兮紛雜錯以歲蕤象朝雲之一合兮似變化之相
依靡常儀使先好兮命河女以胥歸步容與而特進兮
眄兩楹而升墀振瑤谿而鳴玉兮播陵陽之萋萋蹈消
溘之危跡兮躡離散之輕微釋安朝之朱履兮踐席假
而集惟敷斯來之在室兮乃飄忽之所晞馨香發而外
揚兮媚顏灼以顯姿清言竊其如蘭兮辭婉婉而靡違

託精靈之運會兮浮日月之餘暉假淳氣之精微兮幸
備嫵以自私願申愛於今夕兮尚有訪乎是非被芬芳
之夕暢兮將暫往而永歸觀悅懌而未靜兮言未究而
心悲嗟雲霓之可憑兮翻揮翼而俱飛棄中堂之局促
兮遺戶牖之不處帷幕張而靡御兮几筵設而莫輔一作
拊載雲輿之奄靄兮乘夏后之兩龍折丹木以蔽陽兮
竦芝蓋之三重翮翼翼以左右兮紛悠悠以容容瞻朝
一作霞之相承兮似美人之懷憂采色雜以成文兮忽
離散而不留若將言之未發兮又氣變而飄浮若垂髦
而失鬣兮飾未集而形消目流盼而自別兮心欲來而
貌遼紛綺靡而未盡兮先列宿之規矩時黨奔而陰暄

兮忽不識乎舊宇邁黃妖之崇臺兮雷師奮而下雨內
英哲與長年兮答離倫與鷹賈摧翹而折鬼神兮直
徑登乎所期歷四方而縱懷兮誰云顧乎或疑超高躍
而驚兮至北極而放之援閭維以相示兮臨門而長辭
既不以萬物累心兮豈一女子之足思

閒情賦

陶潛

初張衡作定情賦蔡邕作靜情賦檢逸詞而宗澹泊
始則蕩以思慮而終歸閑正將以抑流宕之邪心諒
有助於諷諫綴文之士奕代繼作並因觸類廣其詞
義余園閭多暇復染翰為之雖文妙不足庶不謬作
者之意乎

夫何瓌逸之令姿獨曠世以秀羣表傾城之艷色期有

德於傳聞佩鳴玉以比潔齊幽蘭以爭芬淡柔情於俗

內一作緊負雅志於高雲悲晨曦之易夕感人生之長勤

同一盡於百年何歡寡而愁啟褰朱幃而正坐汎清瑟

以自欣送纖指之餘好攘皓袖之繽紛瞬美目以流眄

含言笑而不分曲調將半景落西軒悲商叩林白雲依

山仰睇天路俯促鳴絃神儀嫵媚舉止詳妍激清音以

感余願接膝以交言欲自往以結誓懼冒禮之爲僞待

鳳鳥以致辭恐他人之我先意惶惑而靡寧魂須臾而

九遷願在衣而爲領承華首之餘芳悲羅襟之宵離怨

秋夜之未央願在裳而爲帶束窈窕之纖身嗟溫涼之

異氣或脫故而服新願在髮而爲澤刷玄髮於頰肩悲
佳人之屢沐從白水以枯煎願在肩而爲黛隨瞻視以
閑揚悲脂粉之尚鮮或取毀於華粧願在莞而爲席安
弱體於三秋悲文茵之代御方經年而見求願在絲而
爲履附素足以周旋悲行止之有節空委棄於牀前願
在畫而爲影常依形而西東悲高樹之多蔭慨有時而
不同願在夜而爲燭照玉容於兩楹悲扶桑之舒光奄
滅景而藏明願在竹而爲扇含淒颯於柔握悲白露之
晨零顧襟袖以緬邈願在木而爲桐作膝上之鳴琴悲
樂極以哀來終推我而輟音考所願而必違徒契契以
苦心擁勞情而罔訴步容與於南林栖木蘭之遺露翳

青松之餘陰儻行行之有覲交欣懼於中襟竟寂寞而
無見獨悵想以空尋歛輕裾以復路瞻夕陽而流歎步
徙倚以忘趣色慘悽而矜顏葉燮燮以去條氣淒淒而
就寒日負影以偕沒月媚景於雲端鳥悽聲以孤歸獸
索偶而不還悼當年之晚暮恨茲歲之欲殫思宵夢以
從之神飄颻而不安若憑舟之失棹譬綠厓而無攀于
時畢昂盈軒北風淒淒惘惘不寐衆念徘徊起攝帶以
伺晨繁霜粲於素階鷄斂翅而未鳴笛流遠以清哀始
妙密以閒和終寥亮而藏擢意夫人之在茲託行雲以
送懷行雲逝而無語時奄冉而就過徒勤思以自悲終
阻山而帶河迎清風以祛累寄弱志於歸波尤蔓草之

爲會誦召南之餘歌。想萬慮以存誠。憇遙情於八遐。

水上神女賦

江淹

江上丈人遊宦荆吳。首衛國望。燕途歷秦。關出宋都。遍覽下蔡之女。具悅淇上之姝。未有粉白黛黑。鬼神之所無也。迺造南中。渡炎洲。逕玉礪。越金流。路透迤而無軌。野忽莽而眇儻。山反覆而參錯。水澆灌而縈薄。石五采而橫峯。雲千色而承萼。日炯炯而舒光。雨屑屑而稍落。紫莖繞逕。始參差紅荷。綠水纒灼。爍忽而精飛。視亂意走心。移綺靡。菱蓋悵望。黃枝一麗。女方碧渚之崖。曖曖也。非雲非霧。如烟如霞。諸光諸色。雜卉雜華。的的也。象珪象璧。若虛若實。綾錦共文。瑤貝合質。遂乃紅唇寫朱。

真眉學月。美目艷起。秀色爛發。窈窕暫見。偃蹇還沒。冶異絕俗。奇麗不常。青娥羞艷。素女慙光。笑李后於漢主。耻西施於越王。神翻覆而愉悅。志離合而感傷。女遂俯整玉軼。仰肅金鑣。或採丹萼。或拾翠條。守明璣而爲誓。解琅玕而相要。情乍合而還散。色半親而復嬌。聳駟車於水際。亭雲霓於山椒。奄人祗之仿像。共光氣而寂寥。於時也。綵霞繞繞。卿雲縵縵。石瓊文而翕葩。山龍鱗而炤爛。苔綠根而攢集。草紅葩而舒散。日炫是以隴光樹。歲蕤而葱朶。無西海之浩蕩。見若木之千尋。非丹山之赫曦。聞琴瑟之空音。理洞徹於俗聽。物驚怪於世心。恨精影之不滯。悼元畧之難惜。閱有無於俄頃。驗變化於

咫尺視空同而天貌察倏忽而亡迹野田田而虛翠水
湛湛而空碧迺唱桂櫂交衝波背橘流向椒阿碑砥木
石洪漭蛟鼉顧御僕而情饒巡左右而怨多乎石渚而
一歎悵沙洲而少歌苟懸天方有命永離决兮若何退
以爲妙聲無形奇色非質麗於嬪嬙精於琴瑟尋漢女
而空佩觀清角而無足嬪揚不足聞知燕牙焉能委悉
何如明月之忌玄雲秋露之慙白日愁知形有之留滯
非英靈之所要術也

廣文選卷第七

終

廣文選卷第七

賦

雜賦廣

蠶賦

荀况 二首

有物於此儻儻兮其狀屢化如神功被天下爲萬世文
禮樂以成貴賤以分養老長幼待之爲而後存名號不
美與暴爲隣功立而身廢事成而家敗棄其耆老收其
後世人屬所利飛鳥所害臣愚而不識請占之五泰五
泰占之曰此夫身女好而頭馬首者與屢化而不壽者
與善壯而拙老者與有父母而無牝牡者與冬伏而夏
游食桑而吐絲前亂而後治夏生而惡暑喜温而惡雨

蠅以爲母蛾以爲父三俯三起事乃大已夫是之謂蠶理

箴賦

有物於此生於山阜處於室堂無知無巧善治衣裳不盜不竊穿窬而行日夜合雜以成文章以能合從又善連衡下覆百姓上飾帝王功業甚博不見賢良時用則存不用則亡臣愚不識敢請之王王曰此夫始生鉅其成功小者邪長其尾而銳其剽者邪頭銛達而剽趙繚者邪一往一來結尾以爲事無羽無翼反覆甚極尾生而事起尾遭而事已簪以爲父管以爲母旣以縫表又以連裏夫是謂之箴理

大言賦

宋玉 三首

楚襄王與唐勒景差宋玉遊於陽雲之臺王曰能爲寡人大言者上座王因唏曰操是太阿戮剝一世流血冲天車不可以厲至唐勒曰壯士憤兮絕天維北斗戾兮太山夷至景差曰校士猛毅臯陶嘻大笑至兮摧覆思鋸牙裙雲霧甚大吐舌萬里唾一世至宋玉曰方地爲車圓天爲蓋長劍耿耿倚天外王曰未也玉曰并吞四夷飲枯河海跋越九州無所容止身大四塞愁不可長據地跚天迫不得仰

小言賦

楚襄王旣登陽雲之臺今諸大夫景差唐勒宋玉等並

造大言賦賦畢而宋玉受賞王曰此賦之迂誕則極巨
偉矣抑未備也且一陰一陽道之所貴小往大來剝復
之類也是故卑高相配而天地位三光並照則小大備
能高而不能下非兼通也能麗而不能細非妙工也然
則上座者未足明賞賢人有能為小言賦者賜之雲夢
之田景差曰載氛埃兮乘剝塵體輕蚊翼形微蚤鱗聿
遑浮躡凌雲縱身經由鍼孔出入羅巾飄妙翩綿乍見
乍泯唐勒曰析飛糠以為輿剖糝糟以為舟泛然投乎
杯中淡若巨海之洪流憑蚋皆以顧盼附蜚蠊而遨
遊寧隱微以無準原存亡而不憂又曰館於蠅鬚宴于
毫端烹虱脰切蟣肝會九族而同噍猶委餘而不殫宋

玉曰無內之中微物潛生比之無象言之無名蒙蒙滅
具昧昧遺形超於太虛之域出於未兆之庭織於蠶末
之微蔑陋於茸毛之方生視之則眇眇望之則冥冥離
朱為之歎悶神明不能察其情二子之言磊磊皆不小
何如此之為精王曰善賜以雲夢之田

釣賦

宋玉與登徒子偕受釣於玄洲止而並見於楚襄王登
徒子曰夫玄洲天下之善釣者也願王觀焉王曰其善
奈何登徒子對曰夫玄洲釣也以三尋之竿八絲之線
餌若蛆蟻鈎如細鍼以出三尺之魚於數仞之水中豈
可謂無術乎夫玄洲芳水餌挂繳鈎其意不可得退而

牽行下觸清泥上則波颺玄洲因水勢而施之頡之頡
之委縱收斂與魚沉浮及其解弛因而獲之襄王曰善
宋玉進曰今察玄洲之鈎未可謂能持竿也又烏足爲
大王言乎王曰予之所謂善釣者何玉曰臣所謂善釣
者其竿非竹其綸非絲其鈎非鍼其餌非蟻也王曰願
遂聞之宋玉對曰昔堯舜禹湯之釣也以賢聖爲竿道
德爲綸仁義爲鈎祿利爲餌四海爲池萬民爲魚釣道
微矣非聖人其孰能察之王曰迅哉說乎其鈎不可見
也宋玉對曰其鈎易見王不可察爾昔殷湯以七十里
周文以百里興利除害天下歸之其餌可謂芳矣南面
而掌天下歷載數百到今不廢其綸可謂紉矣羣生安

其澤民氓畏其罰其鈎可謂拘矣功成而不墮名立而
不改其竿可謂強矣若夫竿折綸絕餌墜鈎決波涌魚
失是則夏桀商紂不通夫釣術也△察玄洲之鈎也左
挾魚留右執槁竿立乎潢汙之涯倚乎楊柳之間精不
離乎魚喙思不出乎鮒鱗形容枯槁神色憔悴樂不役
勤獲不當費斯乃水濱之役夫也已君王又何稱焉王
若建堯舜之洪竿據禹湯之修綸投之於瀆視之於海
漫漫羣生孰非吾有其爲大王之鈎不亦樂乎

屏風賦

漢劉安淮南王

維茲屏風出自幽谷根深枝茂號爲喬木孤生陋弱畏
金強族移根易土委伏瀟瀟飄飄始危靡安措足思在

蓬蒿林有樸檉然常無緣悲愁酸毒天啓我心遭遇徵
祿徵祿德中郎繕理收拾捐朴大匠攻之刻雕削斲表
雖裂剝心實貞慈等化器類庇陰尊屋列在左右近君
頭足賴蒙成濟其恩弘篤何恩施遇分好沾渥不逢仁
人永爲枯木

九宮賦

漢黃香 文彊

伊黃虛之典度存斗文之會宮翳華蓋之歲蕤依上帝
以隆崇握璇璣而布政揔四七而持綱和日月之光曜
均節度以運行序列宿之煥爛咸垂景以煌煌歷天陰
之晦暗陽玉石以炳明鏡大道之浩廣泐沆漭以塊北
眇加歷而銳銀廓峴峴以閱閭卽蹠縮以擻孺坎挺援

以消煬驪騶騶以羗羸磋礫皓皜以駮樂銀佛律以順
游徑闡闔而出玉房謁五嶽而朝六宗對祝融而督勾
芒蕩翊翊以瞥降聊優游以尚羊蹠崑崙而蹈碣石跪
底柱而跨太行肘熊耳而據桐栢介嶧冢而持外方浣
彭蠡而洗北海淬五湖而漱華池粉白沙而嚙定容卷
南越以騰歷連明月以爲懸剝駭鷄以爲釵繞績組而
攝雲鬱垂獨而服離柱載集爰而帶繚繞曳陶匏以
委蛇乘根車而駕神馬駮驥駟而挾窮竒使織女駮乘
王良爲之御三台執兵而奉引軒轅乘駮駮而先驅招
搖豐隆騎歸子而俠轂各先後以爲雲車左青龍而右
紫觴前七星而後騰蛇徵太一而聚群神趣熒惑而叱

太白東并整驃而播灑其勃佛仿以梢擊四徼塵於干
道絕引者而警驛蚩尤之倫玢璘而要斑爛垂金干而
捷雄戟操巨蔡之礮齊佩機而鳴廓狼弧發張而外
饗柱天持芒以昨嶸迅衝風而突飛電振雲崧岫而土
堊山龍狡猾而蹴踐裂走札揭而獠枯梗櫟略獲而突
列蛸槁肩一作屈而却梁黨叱巷澹而觸螟蜒扶磬礮
而抃一作雷公標擊缺而拂勃决奮雲旗而椎鴻鐘聲
淳淪以純侖四海澹而拓地梁碎太山而刺嵩高吸洪
河而囁九江登崔堯之釐臺闕天門而閃帝宮享嘉命
而延壽樂斯宮之無窮

圍碁賦

漢馬融季長

畧觀圍碁兮法於用兵三尺之局兮爲戰鬪場陳聚士
卒兮兩敵相當拙者無功兮弱者先亡自有中和兮請
說其方先據四道兮保角依旁緣邊遮列兮徃徃相望
離離馬日兮連連鴈行踔度間置兮徘徊中央違閣奮
翼兮左右翱翔道狹敵衆兮情無遠行碁多無筭兮如
聚羣羊駱驛自保兮先後來迎攻寬擊虛兮踰降內房
利則爲恃兮便則爲強馱於食兮壞决垣墻堤潰不塞
兮泛濫遠長橫行陣亂兮敵心駭惶迫兼碁雜兮頗棄
其裝已下險口兮鑿置清坑窮其中昇兮如鼠入囊收
死卒兮無使相迎當食不食兮反受其殃勝負之揲兮
於言如髮乍緩乍急兮上且未别白黑紛亂兮於約如

葛雜亂交錯兮更相度越守規不固兮爲所唐突深入
貪地兮殺亡士卒狂攘相救兮先後并没上下離遮兮
四面隔閉圍合罕散兮所對哽咽韓信將兵兮難通易
絕自陷死地兮設見權譎誘敵先行兮往往一室捐碁
委食兮遺二將七遲逐爽問兮轉相伺密商度道地兮
碁相連結蔓延連閣兮如火不滅扶踈布散兮左右流
溢浸淫不振兮敵人懼慄迫促踈踏兮惆悵自失計功
相除兮以時各訖事留變生兮捨碁欲疾營惑窘乏兮
無令詐出深念遠慮兮勝乃可必

夢賦

王延壽

臣弱冠嘗夜寢見鬼物與臣戰遂得東方朔與臣作罵

鬼之書臣遂作賦一篇叙夢後人夢者讀誦以却鬼數
數有驗臣不敢蔽其詞曰余宵夜寢息乃忽有非常之
物夢焉其爲夢也悉覩鬼物之變惟則有蛇頭而四角
魚尾而鳥身或三足而六眼或龍形而似人羣行而奮
搖忽來到吾前伸臂而舞手意欲相引牽於是夢中驚
怒臚臆紛紛曰吾含天地之淳和何妖孽之敢臻爾乃
揮手振拳雷發電舒斯游光斬猛猪批蠱殺斫魅虛捎
魍魎拂諸渠撞縱目打三顱撲茗莖扶夔魘搏睨眈蹠
睢盱剖列屨掣羯摩剝尖鼻踏赤古挈僮僇揮髯鬚於
是手足但中捷獵摧拉澎溟跌抗指倒批筈強梁捶捋
劇按撩予摠攫黠施一作額贖抨登軋一作於是羣邪

衆魅駭擾遠煥衍叛散乍留乍去變形瞪眄顧望猶
豫吾於是更奮奇譎脉捧獲噴扼僥峴捷咿嚶批擗噴
於是三三四四相隨佯傍而歷僻礧礧磕磕揜齊亥布
詈詈譽譽鬼驚魅怖或盤跚而欲走或拘孿而不能步
或中瘡而宛轉或捧痛而號呼奄霧消而光散寂不知
其何故嗟妖邪之恠物敢干真人之正度耳唧嘈而外
卽忽屈伸而覺寤於是雞知天曙而奮羽忽嘈然而自
鳴鬼聞之以迸失心惛怖而皆驚亂曰齊相夢物而以
霸兮武丁夜感得賢佐兮周夢九齡年克百兮晉文監
腦國以竟兮老子役鬼爲神將兮轉禍爲福永無恙兮

函谷關賦

漢李尤伯仁

惟皇漢之休烈兮包八極以據中混無外之盪盪兮惟
唐典之極崇萬國喜而洞洽兮何天衢以流通襟要約
之險固兮制關鍵以擒并其南則有蒼梧荔浦離水謝
沐涯浦零中以窮海陸於北則有蕭居天井壺口石經
一作貫越代朔以臨胡庭緣邊邪詰一作指陽會玉門凌
測龍堆或置於西則有隨隴武夷白水江零沔漢阻曲
路由山泉舊水遼濫沐落是經迺周覽以汎觀兮歷衆
關以遊目惟夸闊之宏麗兮羗莫盛於函谷施雕礧以
作好建峻敞之堅重殊中外以隔別翼魏魏之高崇命
尉臣以執鑰統羣類之所從嚴固守之猛厲操戈鉞而
普聰曠蕃鎮造而惕息侯伯過而震惶惟函谷之初設

險前有姬之苗流嘉尹喜之望氣知真人之西游爰物
色以遞道爲著書而肯留自周轍之東遷秦虎視乎中
州文馳齊而懼追譎鷄鳴於狗偷睚眦魏而西逝托衾
衣以免搜大漢承弊以建德革厥舊而運條准令宜以
就制因茲勢以立基蓋可以詰非司邪括執喉咽季末
荒戍墮闕有年天閔羣黎命我聖君稽符皇乾孔適河
文中興再受二祖同勲永平承緒欽明奉循上羅三闕
下列九門會萬國之玉帛徠百蠻之貢琛冠蓋紛其雲
合車馬動而雷奔察言服以有譏捐繻傳而勿論于以
廓襟度於神聖法易簡於乾坤

疾邪賦

漢趙壹

元叔

伊五帝之不同禮三王亦不同樂數極自然變化非是
故相反駁德政不能救世溷亂賞罰豈足懲時清濁春
秋時禍敗之始戰國愈復增其荼毒秦漢無以相踰越
乃更加其怨酷寧計生民之命唯利已而自足于茲迄
今情僞萬方佞諂日熾剛克消亡舐痔結駟正色徒行
嫗媯名勢撫拍豪強偃蹇反俗立致各殃捷懾逐物日
富月昌渾然同惑孰溫孰涼邪夫顯進直士幽藏原斯
瘼之攸與實執政之匪賢女謁掩其視聽兮近習秉其
威權所好則錯皮出其毛羽所惡則洗垢求其癩痕雖
欲竭誠而盡忠路絕嶮而靡緣九重旣不可啓又羣吠
之狺狺安危亡於旦夕肆嗜欲於目前奚異涉海之失

施積薪而待然也榮納由於閃榆孰知辨其豈妍故
法禁屈撓於勢族恩澤不逮於單門寧譏寒於堯舜之
荒歲芳不飽暖於當今之豐年秉理雖死而非亡違義
雖生而匪存有秦客者乃爲詩曰河清不可俟人命不
可延順風激靡草富貴者稱賢文籍雖滿腹不如一囊
錢伊優北堂上翫麟倚門邊魯生聞此辭繫而作歌曰
勢家多所宜咳唾自成珠被褐懷金玉蘭蕙化爲芻賢
者雖獨悟所困在羣愚且各守爾分勿復空馳驅哀哉
復哀哉此是命矣夫

冢賦

張衡

載輿載步地勢是觀降此平土陟彼景山

景猶高也

一升一

降乃心斯安爾乃墮魏山平吟

藂林鑿盤石起峻

龍構大廓

一作擗高岡冠其南

其北列石限其壇

羅竹藩其域系以修遂洽以溝瀆曲折相連迤靡相屬
乃樹靈木靈木戎戎繁霜峩峩匪雕匪琢周旋顧盼亦
各有行乃相厥宇乃立厥堂直之以繩正之以日有覺
其材以構玄室奕奕將將崇棟廣宇在冬不涼在夏不
暑祭祀是居神明是處修遂之際亦有掖門掖門之西
十一餘半下有直渠上有平岸舟車之道交通舊館寒
塞淵慮弘存不忘亡恢厥廟壇祭我兮子孫宅兆之
形規矩之制希而望之方以麗踐而行之巧以廣幽墓
既美鬼神既寧降之以福如水之平如春之卉如日之

升

酒賦

曹植

余覽揚雄酒賦辭甚瑰瑋頗戲而不雅聊作酒賦粗究其終始賦曰

嘉儀氏之造思亮茲美之獨珍仰酒旗之景曜協嘉號於天辰穆生以醴而辭楚侯嬴感爵而輕身其味有宜城醪醴蒼梧縹青或秋藏冬發或春醞夏成或雲沸潮湧或素蟻浮萍爾乃王孫公子遊俠翺翔將承芳以接意會陵雲於朱堂獻酬交錯宴笑無方於是飲者並醉縱橫誼譁或揚袂屢舞或扣劍清歌或嘖嘖辭觴或奮爵橫飛或歎驪駒既駕或稱朝露未晞於斯時也質者

或文剛者或仁卑者忘賤婁者忘貧於是矯俗先生聞之而歎曰噫夫言何容易此乃淫荒之源非作者之事若耽于觴酌流情縱逸先王所禁君子所斥

白髮賦

魏左思 太冲

星星白髮生於鬢垂雖非青蠅穢我光儀策名觀國以此見疵將拔將鑷好爵是縻白髮將拔怒然目訢稟命不幸值君年莫偏迫秋霜生而皓素始覽明鏡惕然見惡朝生晝拔何罪之故予觀橘柚一皜一擘貴其素華匪尚綠葉願戢子之手攝子之鑷咨爾白髮觀世之途靡不追榮貴葉賤枯赫赫聞闔藹藹紫廬弱冠求仕童髻獻謨甘羅乘軫子奇剖符英英終賈高論雲衢拔白

就黑此自在吾白髮臨拔瞋目號呼何我之寃何子之
誤甘羅自以辨慧見稱不以髮黑而名著賈生自以良
才見異不以烏鬢而後舉聞之先民國用老成二老歸
周周道肅清四皓佐漢漢德光明何必去我然後要榮
咨爾白髮事故有以爾之所言非不有理曩貴者老今
薄舊齒皤皤榮期皓首田里雖有二毛河清難俟隨時
之變見歎孔子髮乃辭盡誓以固窮昔臨玉顏今從飛
蓬髮膚至昵尚不克終聊用擬辭比之國風

元父賦

阮籍

吾嘗遊元一作元父登其城使人愁思作賦以詒之言
不足樂也

元父者九州之窮也先代之幽虛者也故其地郭卑小
局促危隘不遐其土田則汗除漸淤泥涅槃滄方池邊
屬兮容水滂沱穢菜惟產兮不食實多地下沉陰兮受
氣匪和太陽不周兮植物靡嘉故其人民頑嚚禱杙下
愚難化其區城壅絕斷塞分迫旋淵終始同貫本末相
牽疇昔訖今曠世歷年鉅野渚其後窮齊盡其前蚶滄
不暢垢濁寔臻不肖群聚屋空無賢故其民放散肴亂
藪窟澤居比跡麋鹿齊志豪樞一作樞是以其原壤不辟
樹藝希疏莧葦彌臯蚊蚋慘膚也于其遠險則右金鄉
而左高平崇陵崔巍深溪崢嶸美類不處熊虎是生故
人民被害嚼齧禽性獸情爾之近阻則鳴鳩蔭其前曲

城發其後鳴鳥群翔之可悼豈有志於湏臾故其人民
狼風缺氣蓋電無厚南望春申東瞻孟嘗界薛邑境
邊山陽逆旅行舍姦盜所藏北臨平陸齊之西封捷徑
燕趙迤齒逍遙故其人民側匿頗僻隱蔽不公懷私抱
詐爽匿一作是從禮義不設淳化匪同先哲遺言有昭
有襲一作如何君子栖遲斯邦

歲暮賦

陸雲二首

余祗役京邑載離永義永寧二年春忝寵北郡其夏又
轉大將軍右司馬於鄴都自去故鄉荏苒六年惟姑與
姊仍見背棄街痛萬里哀思傷毒而日月逝速歲聿云
暮感萬物之既改瞻天地而傷懷乃作賦以言情焉

夫何乾行之變通兮昏明迭而載路美飛轡之遠御兮
騰六龍於天步時赴節而漸流兮氣移數而改度揮促
節於短日兮振修策於長夜運儵忽其既周兮歲冉冉
而告暮變棘心之柔風兮滋豐草之湛露玄暉邈以峻
服兮黃裳皓而振素於是顓頊御時玄冥統官天廟既
底日月貞觀淪重陽於潛戶兮嚴徵積陰於司寒日回
天以滅景兮飈衝淵而無瀾堅冰涸於川底兮白雪墮
於雲端普區宇之瘁景兮頻萬物之衰顏時稟戾其可
悲兮氣蕭索而傷心凄風愴其鳴條兮落葉翻而灑林
獸藏丘而絕迹兮鳥攀木而栖音山振枯於曾嶺與層同
兮民懷慘於重襟寒與暑其代謝兮年冉冉其將老豐

顏擘而朝發玄髮粲其夕皓感芳華之志學兮悲時暮
而難考遠圖逝而辭懷兮密思集而盈抱羨厚德之溥
載兮嘉豐化之大造恨盛來之苦晏兮悲衰至之常蚤
措晞露而怵心兮衍死生於靡草蒙時來之嘉運兮遊
上京而凱入委乘輅於紫宮兮剖金虎而底邑憑台光
之發暉兮荷寵靈來集望故疇之迥遼兮沂南風而
頽泣長歎息而永兮感逝物而傷悲哀年歲之攸往
兮伊行人之思歸隆恩於朝日兮綴永念於紀暉表
寸陰而貞吝兮盼一尺其若遺嗟我行人之久永兮何
歸途之芒芒憇薄於川缺眺攸逝兮江湘處孝敬於神
丘兮結祗慕於惟桑瞻山川而物存兮思六親而人亡

問二姑而背世兮及伯姊而淪喪尋餘蹤於空宇兮想
絕景於遺堂悲山林之杳藹兮痛華構之丘荒靖深情
以遐慕兮思纏綿而懷楚涕垂頤以交頽兮哀凌心而
洞駭神尋路而窘逝兮形頻蹙乎其所心悠悠其若懸
兮音既絕而復舉悲人生之有終兮何天造而罔極仰
悲谷之方中顧懸車而日昃百年迅於分噓兮千歲
疾於一息詠大椿之萬祀兮同蟪蛄於未識歲難停而
易逝兮情艱多而泰寡年有來而棄予兮時無算而非
我祇生心於日順兮雖呼吸其難假攝僨生於逆旅兮
欲淹留其焉可彼鑿寐之有特兮亦始卒之固然舒遠
懷於千載兮張同感乎中山鑒通人之炯戒兮懼晏平

之達言啓貞心以自責兮覽遺籍而問道亮爽鳩之既
徂兮故營丘之有紹在吾儕之陋心兮豈取樂於東表
苟長生而自得兮將奚待而有天考大德於天地兮知
斯言之益矯

南征賦

太安二年秋八月姦臣平亥之皇甫商敢行稱亂凌
逼乘輿天子蒙塵于外自秋徂冬大將軍敷命羣后
同恤社稷乃身統三軍以謀國難自義聲所及四海
之內朔漠之表蒸徒羸糧而請奮胡馬款塞而思征
四方之會眾以百萬軍旅之盛威靈之著自古以來
未之有也粵十月軍次于朝歌講武治戎以觀兵丁

殷墟於是美義征之舉壯師徒之盛乃作南征賦以
揚匡霸之勲云爾

有星晉之霸后資濬哲之獻聖崇文德於緝熙濟武功
而保定應天鑑之昭華荷帝祐之休命步玉衡以觀八
方在璿璣而齊七政芒芒神道化洽崇深仰矣天飛俯
洞淵沉振南箕以鼓物冒慶雲而崇陰宏天維以籠世
廓宇宙而宅心濟溥施之厚德鏗希聲之大音淵澤回
而泣注豪彥萃而爲林九服惟清諸夏謐靜肅慎回首
沙漠引領大和時降地靈夙挺結步林之奇幹垂珍禾
之神賴勵修德於億兆端澄形於萬景在中葉之不兢
遭皇家之毒亂悲國步之未夷仰風興而昧旦括庶方

而大誥集率士而貞觀致天屬於王畿肅宵征而省難
爾乃建黃鉞之靈威樹戎輅之高蓋伐隱天之雷鼓振
凌霄之電飾介大揮戈而風興輕武摠千而啓萬振靈
詔之嘈嘈飛旗旄之謁謁虹旂泝風以委蛇霓旌蒙光
而容裔公徒十萬其會雲興悠悠華戎時罔不承爾乃
命屏翳以夕降式飛靡以朝升塗蒙雨而復清景帶天
而光澄陪武臣於彫軒列名僚於後乘猛將起而虎嘯
商飈肅其來應士馮威而嚮駭馬獻天而景凌臨川屯
於廣陸武騎被乎中陵類禡北京師徒經始桓桓先征
在河之浹順彼長道懸旌千里姜王師之遵時茂七德
而發止爾乃稅駕殷墟我徒旣閑順時講武薄狩于原

紛同方而類聚煥副翼而明分祗明刑以誓衆習軍政
於舊聞儼山立以崇會粲煙駭而興紛若冥海之引回
流岱靈之吐行雲于時玄冬首時陰風戒煞山澤含哀
天地肅又閑夜列以澄清中原曠而曖昧戎士肅而咸
戒三軍紛而雜還長角哀叫以命旅金鼓隱訇而啓伐
景凌冥而四播音乘雲而上逝火烈具舉伐鼓淵淵朱
光俛而丹野炎暉仰而絳天曜靈翕赫以增熾憤氣睇
悅而凌煙狂飈起而妄駭行雲謁而芊眠色深旌旄翻
其猗靡警燿因而嬗娟爾乃洪音雷潰所向剋廣凌雲
發揮萬里振響聲馮虛而天回烈駭洞而地蕩映皓月
而望舒闇照重昏而大夜朗服縣炎揚而見儵飛烽戢

煜而決漭乃有熊羆之旅虓闕之將雄聲泉湧逸氣
亮超三軍以奔厲賈餘勇而成壯兆洪音於寂漠先
形而高唱紛若屯雲渙若積波遁陰匿景靜言勿譁
訖絕倡寂其既收萬夫翕而成和嚴鼓隱而重戒景
曄而星羅烈蒙陰而叩假曜憑陽而登遐若扶桑之
華葉皓天之散朝霞超燭龍之絕景豈比象於百華

函谷關賦

晉江統應元

登彼函谷爰覽丘陵地險逶迤山岡相承深壑累降修
衣重升下杳冥而幽曖上穹從而高興帶以河洛重以
峻阻經略封畿因固設險異服則呵奇言必檢消姦宄
於未芽殿邪僞於萌漸及文仲之斯廢乃建仁而受貶

聖王制典蓋以防淫萬里順範壇場不侵撫四夷而守
境豈恃阻於高岑彼桀紂以顛墜非山河而不深顧晉
平之愛險獲汝叔之忠箴鄙魏武之墜志嘉吳起之弘
心末代陵遲惡嬴氏之叛渙乃因茲而自增下陵上替
山冢萃崩覽孟嘗之獲免賴博愛而多寵惟七國之西
征仰斯阻而震恐豈險險之難犯將羣帥之無勇咨漢
祖之絕關又見敗於劫項尹喜爰處觀妙研情李老西
徂五千遺聲張祿既入穰侯乃傾營陵之出稟築由生
衛鞅及商喪宗摧名終軍棄繻擁節飛榮覩浮僞於末
俗思玄真乎大庭

鏡賦

傅玄

順陰位於西裔採秋金之剛精醮祝融以致虔命歐冶
而是管晞日月之光烈儀厥象乎曜靈不有心於好醜
而衆形其必詳同實錄於良史隨善惡而是彰猗猗淑
媛我我后妃眷眷榮之零悴懼玉顏之有衰眈清揚而
自鏡競崇姱以相暉若乃雲髻亂於首頰黛渝於色設
有之於斯器兮孰厥貌之能飾與一作音一作瞽而同
昧兮近有面而不識君子知貌之不可以不飾則內省
而自箴既見前而慮後則祇畏於幽深察明明之待瑩
則以此而洗心睹日觀之有暇則稽訓於儒英夫然尚
何厥容之有慢而厥思之有淫

船賦

晉棗據道彦

伊河海之深廣吁嗟綿邈而無垠彼限隔而靡覩兮此
由茲而莫聞雖后土之同載兮實殊代而乖分嘉聖王
之神化兮理通微而達幽悼生民之隔塞兮愍王教之
不周立成器以被用兮因垂象以造舟濟凌波之絕軌
兮越巨川之玄流不無深而不度兮路無廣而不由運
重固之滯實誰載沉而載浮飄燕鳥於吳會轉金石於
洪濤遡無涯之浩浩不抑進而輟留登陽侯之激浦兮
方湧翔而龍游雖滔天而橫厲長抱樂而無憂乘流則
逝遇批而停受命若嚮唯時而征不辭勞而惡動不偷
安而自盡木會射以徇功不愛力而欲輕豐儉隨乎質
量所勝任乎本形雖不乘而長浮雖涉險而必正周遊

曲折動與時併博載善施心無所營囊括品物受辱含
榮唯載步之所欲混責賤於一門包涵通於道德普納
比乎訖時感思用之却廣信人道之所存

觀魚賦

晉摯虞 仲洽

觀鱗族於彪池兮睨羽羣於瀨涯乃有洧泉之鯉濯陂
之鯁灑灑涌躍沒浪赴遠集于曲澗之隈逐乎澹淡之
深攢聚輻楚或躍或沉脩樂攸驛眩目驚心徒極觀而
無獲兮美鮮肴之柔嘉於是六柱俱起參構橫羅編莞
爲原缺木激波奔突轉薄流不及瀾魚未驚而失行忽
浪達於急湍諒形勝之得勢實有往而無反魚鱗膾鯉
亦有度羞肴核並陳既旨且柔沉溢爵於通溝因素波

以獻酬騁微巧於浮觴競機捷於迅流既歡豫而不倦
願窮書而蕪夜獨臨川一而慷慨感逝者之不捨惟脩名
之求立戀景曜之西謝懼留連之敗德遂收歡而命駕
是時也含懷湛遁需于酒食盤衍宴安歡情未極選興
之言矯枉以直悅而不懌莫不歎息

洛禊賦

張協

夫何三春之令月嘉天氣之氤氳和風穆以布暢百卉
曄而敷芬川流清泠以汪濊原隰葱翠以龍鱗游魚澆
澗於淥波玄鳥鼓翼於高雲美節慶之動物悅羣生之
樂欣故新服之既成將禊除於水濱於是縉紳先生肅
儔命友攜朋接黨冠童八九主希孔墨賓慕顏柳臨涯

詠吟濯足揮手乃至都人士女弈弈祁祁車駕岬岵克
溢中塗粉飾翕習綠阿被湄振袖坐風接袵成幃若夫
權威之家豪侈之族采騎齊鑣華輪方轂青蓋雲浮參
差相屬集乎長洲之浦曜乎洛川之曲遂乃停輿蕙渚
稅駕蘭田朱幔虹舒翠幕蜺連羅樽列爵周以長筵於
是布椒醕薦柔嘉祈休吉蠲百痾漱清源以滌穢芳攪
綠藻之纖柯浮素卵以蔽水麗玄膠於中河

火賦

晉潘尼正叔
二首

覽天人之至周嘉火德之為貴含太陽之靈暉體淳剛
之正氣先聖仰觀通神悟靈窮物盡數研幾至精鑽燧
造火陶冶羣形協和五味革變羶腥爾乃狄牙其膳百

和羹陳和羹酉醴旨酒醲醇烹醢者鼉灼龜臙鱗若乃
鑄鐵融銅造制戎器以戒不恭砥鍊兵械整
戎容四海康乂邊境無寇韜弓戢劍解甲釋冑銷鏑
為未鑄戈為耨戰士反於耕農戎馬放乎外廐及至焚
野燎原陸火赫義林木摧拉沙粒並糜騰光絕覽雲散
霓披去若風驅疾若電逝芬輪紆轉倏忽橫厲震響達
乎八冥流光燭乎四裔

釣賦

抗余志於浮雲樂余身於蓬廬尋涓濱之遠跡且游釣
以自娛左援修竹右縱飛綸金鈎屬釣甘餌垂芬衆鱸
奔湧游鱗橫集觸餌見擒值鈎被執長繳續紛輕竿翕

習雲往馳光飛電入躍靈未及警策蓋已獲其數十
且夫燔炙之鮮煎熬之味百品千變殊方異氣随心適
好不可勝紀乃命宰夫膾此潛鯉電割星流芒散縷解
隨風離錫雲翮雪果西戎之蒜南夷之薑酸醎調適齊
和有方和神安體易思難忘

酈酒賦

張載

惟賢聖之興作貴垂功而不泯嘉康狄之先識亦應天
而順人擬酒旗於玄象造甘醴以願神雖賢愚之同好
似大化之齊均物無往而不變獨居舊而彌新經盛衰
而無廢歷百代而作珍若乃中山冬啓醇酎秋發長安
春御樂浪夏設漂蟻萍布分香酷列播殊美於聖載信

人神之所悅未聞瓊酒出於湘東不顯於皇都乃潛淪
於吳邦往逢天地之否運今遭六合之開通缺宣至味
而大同匪徒法用之窮理信泉壤之所鍾故其爲酒也
殊功絕倫三事旣節五齊必均造釀在秋告成在春備
味滋和體色淳清宣神御志道氣養形遣憂消患適性
順情言之者嘉其美味志之者棄事忘榮于是糾合同
好以邀以遊嘉賓雲會矩坐四周設金樽於南楹酌浮
觴以施流備鮮肴以綺進錯時膳之珍羞禮儀攸序是
獻是酬頽顏發溢脫思凱休德音晏晏弘此徽猷咸得
志以自足願棲遲於一丘於是懽樂旣洽日薄西隅主
稱湛露賓歌驪駒僕夫整駕言旋其居乃憑軾以廻軌

騁輕駟於通衢反衡門以隱跡覽前聖之典謨感夏禹
之防微悟儀氏之見疏鑒往事而作戒罔非酒而惟愆
哀秦穆之既醉殲良人而棄賢嘉衛武之能悔著屢舞
於初筵察成敗於往古垂將來於茲篇

觀漏賦

鮑照

客有觀於漏者退而歎曰夫及遠者箭也而定遠非
箭之功爲生者我也而制生非我之情故自箭而爲
心不可憑者絃因生以觀我不可恃者年憑其不可
恃故以悲哉況乎沈華密遠輕波潛耗而感神嬰慮
者又自外而傷壽以是思生生亦勤矣乃爲賦云
佩流歎於馳年纓華思於奔月結蘭菖以望楚弄參差

以歌越撫疑肌於遷滯鑑雕容於髮髯景有墜而易昏
憂無方而難歇歷玫瑰階而升隩訪金壺之盈闕觀騰波
之吞寫視驚箭之登沒箭既沒而復登波長瀉而弗歸
注沈穴而海漏射懸塗而電飛墮戶牖而知天掩雲霧
而測暉創百齡於纖隱積千里於空微彼崢崢而行溢
此冉冉而逾衰撫寸心而未改指分光而永違昔傷矢
之奔禽聞虛弦之顛仆徒嬰刃而知懼豈潛機之能覺
惟生經之霍靡亦悲長而懼促恒證古而秉心抱空意
其如玉波沈沈而東注日滔滔而西屬落繁馨於纖草
殞豐華於喬木對吳離而後歌據窮蹊而方哭雖接薪
之更傳寧絕明之還續貫古今而并念信寡易而多難

時不留乎激矢生乃急於走丸既河源之莫塞又吹波
而助瀾神怵迫而多慮心轉轉而渺歡望天涯而佇念
擢雄劍而長歎嗟生民之永迷躬與後而皆恤死零落
而無二生差池之非一理幽分於化前算冥定於天秩
與艾骨而招病猶剗腸而興疾情殊用而俱盡事離方
而同失聊弭志以高歌順烟雨而沈逸於是隨秋鴻而
汎渚逐春鷺而登梁進賦詩而展念退陳酒以排傷物
不可以兩大運無得而雙昌薰晚華而後落槿早秀而
前亡姑屏憂以愉思樂茲情於寸光從江河之紆直委
天地之圓方漏盈兮漏虛長無絕兮芬芳

感物賦

晉傅亮 季文

余以暮秋之月述職內禁夜清務隙遊目藝苑于時
風霜初戒蟄類尚繁飛蛾翔羽翩翩滿室赴軒幌集
明燭者必以焦滅爲度雖則微物矜懷者久之退感
莊生異鵠之事與彼同迷而忘反鑒之道此先師所
以鄙智及齊客所以難目論也悵然有懷感物興思
遂賦之云爾

在西成之暮晷肅皇命於禁中聆蜻蛚於前無鑿朗月
於房櫳風蕭瑟以陵幌霜澄澄而被墻吟鳴蛩之應節
惜落景之懷東嗟勞人之萃感何夕永而慮文眇今古
以遐念若循環之無終詠倚相之遺短希董生之方融
鑽光燈而散袞溫聖哲之遺蹤墳素香以難暨九流紛

其異封領三百於無邪貫五千於有宗考舊聞於前史
訪心跡於汗隆豈夷阻之在運將全喪之由躬遊翰林
之慮炳嘉美手於良工辭存麗而去穢旨既雅而能通
雖源流之深浩且揚摧而發蒙習習飛蚋飄飄織蠅緣
幌求隙望爛思陵糜蘭膏而無悔赴朗燭而未懲瞻前
軌之既覆忘改轍於後乘匪微物之足悼悵永念而拊
膺彼人道之為貴參二儀而比靈稟清曠以授氣脩緣
督而為經照安危於心術鏡纖兆於未形有徇末而捨
本或耽欲而忘生碎隨侯一作味於微爵捐所重而要輕
矧昆蟲之所昧在智士其猶嬰悟雕陵於莊氏幾鑿濁
而迷清仰前修之懿軌知吾跡之未并雖宋元之外占

曷在予之克明豈知反之徒爾喟投翰以增情

遊後園賦

謝朓

積芳兮選木幽蘭兮翠竹上蕪蕪兮蔭景下田田兮被
谷左蕙畹兮彌望右芝園兮寫目山霞起而削成水積
明以經復於是蔽風闥之藹藹聳雲館之迢迢周步檐
以升降對玉堂之沉寥追夏德之方暮望秋清之始颺
藉宴私而遊衍時晤語而逍遙爾乃日栖榆柳霞照夕
陽孤蟬已散去鳥成行惠風湛兮帷殿肅清陰起兮池
館涼陳象設兮以玉填披蘭籍兮咀桂漿仰徽塵兮美
無度奉英軌兮式如璋籍高文兮清談預會臺兮握芳
則觀海兮為富乃游聖兮知方

燈賦

江淹 四首

淮南王信自華淫命絲女方餌丹砂而學鳳音紫霞沒
 白日沉挂明燈散玄陰顧謂小山儒士斯可賦乎於是
 泛瑟而言曰若大王之燈者銅華金檠錯質鏤形碧為
 雲氣玉為仙靈雙椀百枝艷帳充庭炤錦地之文席映
 繡柱之鴻箏恣靈修之浩盪釋心疑而未平茲侯服之
 誇詡而處士所莫營也若庶人之燈者非珠非銀無藻
 無縟心不貴美器窮於樸是以露冷帷幔風結羅紈螢
 光別桂蛾命辭蘭秋夜如歲秋情如絲怨此愁抱傷此
 秋期必丹燈坐歎停說忘辭至夫霜封園橘冰裂池蓀
 雲雪無際河海方昏冬膏既凝冬節未度洎連冬心寂

歷冬暮亦復未燈空明但為傷故乃知燈之為寶信可
 賦也王遂讚善澄意斂神屈原才華宋玉英人恨不得
 與之同時結佩共紳今子凝章挺秀近出嘉賓吐蘅吐
 蕙含瓊含珉摧驂雕輦以愛國之有臣焉

丹砂可學賦

咸一作曰金不可鑄僕不信也試為此辭精思云爾
 惟雲場之少折乃人逕之多憂雖瑤笄及金瑟雜翠帳
 與丹幃吞悲欣於得失銜哀樂於春秋煥如星絕黯如
 火滅星絕難光火滅可傷故從師而問道冀幽路之或
 賜測神宗之無緩踐雲根之不賒信名山及石室驗青
 傾與丹砂搗五難之重滯擊九仙之輕華故抱魄寂處

凝神空居泯邈深晝窈鬱重虛覘炫燿而可見聽沉寥
而有餘於是乘河漢之光氣騎列星之綵色輟陰陽於
形有傳變化於心識浮恍惚而無涯泛靈恠而未極架
日月之精照騫蛟龍之毛翼遂乃氣穆肅而神奔骨窈
窈而鬼怪綴葳蕤而成冠點雜錯而為佩出涸泣而遐
驚貫濛鴻而上勵鳳之來兮蔽日鸞之集兮為羣左昆
吾之炎景右崦嵫之卿雲爛七采之炤燿漫五色之緼
烟一作細非世俗之質見焉鬼神之嘗聞既而曖碧臺之
錯落燿金宮之玲瓏幻蓮華於繡闥化蒲桃於錦屏赭
丹光而電烜颺翠氛而杳冥軒傲惘於寃虹階佗係於
奔鯨惑龍宮之殿稱迷忉利之宮名故靈偃蹇兮姣服

女嬋娟兮可觀秀青色之泯靡曼美目之波瀾燿日月
之纂組襲星宿之羅紈百味酒兮靈之集河供鯉兮靈
之安却文甫之玉質笑陳王之妙顏所以樂精玄於太
一妙宮徵於清都簫含聲而遠近琴吐音而有無奏神
鼓於玉袂舞靈衣於金裾韻躑躅而易變律參差而難
圖北南風之能擬詎濮水之可摹於是流養不一遨曹
無邊娥眉既散鍾鼓都捐乘綵霞於西海驛行雨於丹
淵山差池而鏡壑水清明而抱天山含玉以永歲水藏
珪以窮年擬若木以寫意拾瑤草而悠然遂乃凝虛飲
一守先閉方智寂術盡覓兀心亡白生不能關其說惠
子無以挫其芒原其耻市朝之失道疾讒嬖之不詳却

文綵之姪冶去利劍之鏗鏘同懷生死於半氣惜百年
於一光故以鑄金爲器丹砂爲漿慙矣旣盡妖怨當忘
吾師以爲可學而公子謂之不良歟

金燈草賦

山華綺錯陸葉錦名金燈麗草鑄氣含英若其碧莖凌
露玉根升霜翠葉暮媚紫榮晨光非錦蜀之可學詎瓊
瑾之能方迺御秋風之獨秀值秋露之餘芬出萬枝而
更明冠衆葩而不群旣艷溢於時暮方炤麗於霜分是
以移馥蘭畹徙色曲池軼長洲兮杜若跨幽渚兮芳籬
映霞光而爍爍懷風氣而參差故植君玉臺生君椒室
炎萼耀天朱英亂口永緒恨於君前不遺風霜之蕭瑟

藉綺帳與羅袿信草木之願畢

泣賦

秋日之光流兮以傷霧離披而殺草風清冷而繞堂視
左右而不牖具衣冠而自涼默而登高谷坐景山倚桐
栢對石泉直視百里處處秋烟闐寂以思情緒留連江
之來矣蓮欲紅南有喬木葉以窮心蒙蒙兮恍惚魄漫
漫兮西東詠河究之故俗眷徐揚之遺風眷徐揚兮阻
關梁詠河究兮路未央道尺折而寸斷蒐十逝而九傷
歎潺湲兮沫袖泣嗚咽兮染裳若夫景公齊山荆卿燕
市孟嘗聞琴馬遷廢史少卿悼躬夷甫傷子皆泣緒如
絲詎能仰視鏡終古而若斯况余輩情之所使哉

廣文選卷第七

[Faded bleed-through text from the reverse side of the page]

廣文選卷第八

詩

述德

漢廟登歌詩

漢東平王蒼

於穆世廟肅雍顯清俊又翼翼秉文之成越序上帝駿
奔來寧建立三雍封禪泰山章明圖讖放唐之文休以
惟德罔射協同本支百世永保厥功

歌魏德詩二首

魏文帝

堯任舜禹當復何為百獸率舞鳳皇來儀得人則安失
人則危唯賢知賢人不易知歌以永言誠不易移鳴條
之役萬舉必全德道通言降福自天

沉沉綠池中有浮萍寄身流波隨風靡傾芙蓉含芳齒
昔垂榮朝采其華夕佩其英采之遺誰所思在庭雙魚
比目鴛鴦交頸有美一人婉如青揚知音識曲善爲樂
方

勸厲

侂詩

音詭

荀况

天下不治請陳侂詩天地易位四時易鄉列星隕墜旦
暮晦盲幽暗登昭日月下藏公正無私反見縱橫志愛
公利重樓疏堂無私罪人愆革二兵道德純備謹口將
將仁人誦約教暴擅強天下幽險恐失世英螭龍猶蟻
蜨鳴梟爲鳳皇比干見剗孔子拘匡昭昭乎其知之明

也郁郁乎其遇時之不祥也拂乎其欲禮義之大行也
闇乎天下之晦盲也皓天不復憂無疆也千秋必反古
之常也弟子勉學天不亡也聖人共拱手時幾將矣與
愚亦疑願聞反辭其小歟也念彼遠方何其塞矣仁人
誦約暴人衍矣忠臣危殆讒人般矣琬玉璫珠不知佩
也雜布與錦不知異也閭娵子奢莫之媒也鑊母刁父
是之喜也以盲爲明以聾爲聰以危爲安以吉爲凶鳴
呼上天曷維其屺

戒子詩

漢東方朔

曼倩

明者處世莫尚于中優哉亦哉於道相從首陽爲拙柳
惠爲工飽食安步以仕代卑依隱玩世詭時不逢才盡

身危好名得華有群累生孤貴失和遺餘不匱自盡無
多聖人之道一龍一蛇形元神藏與物變化隨時之宜
無有常家

自効詩

漢章玄成 少翁 二首

赫矣我祖侯于豕韋賜命也伯有殷以綏厥績既昭車
服有常朝宗商邑四牡翔德之令顯慶流于裔宗周
至漢群后歷世肅肅楚傳翼元夷厥駟有庸惟慎惟
祇嗣王孔佚越遷于鄒五山 庚寥至我節侯惟我節侯
顯德遐聞左右昭宣五品以 既苟致位惟懿惟貞厥
賜祁祁百金洎館國彼扶陽 京之東惟帝是畱改謀
是從繹繹六轡是列是理威 濟朝享天子天子穆

穆是宗是師四方遐邇觀國之輝茅上之繼在我俊兄
惟我俊兄是讓是刑於休厥德於赫有聲致我小子越
畱於京惟我小子不肅會同媾彼車服黜此附庸赫赫
顯爵自我隊之微微附庸自我招之誰能忍媿寄之我
顏誰將遐征從之夷蠻於赫三事匪俊匪作於蔑小子
終焉其度誰謂華高企其齊而誰謂德難厲其度而嗟
我小子于貳其尤隊彼令聲申此擇辭四方群后我監
我視威儀車服唯肅是履

戒子孫詩

於肅君子既令儀德服此温恭棣棣其則咨予小子既
德靡逮曾是車服恭嫚以隊明明天子俊德烈烈不遂

我遺恤我九列我既茲恤惟夙惟夜畏忌是申供事靡
惰天子我監登我三事顧我傷隊爵復我舊我既此登
望我舊階先后茲度連連孔懷司直御事我庶我盛群
公百僚我嘉我慶于異卿士非同我心三事惟囂莫我
肯矜赫赫三事力雖此畢非我所度退其罔日昔我之
隊畏不此居今我度茲戚戚其懼嗟我後人命其靡常
靖共爾位瞻仰靡荒慎爾會同戒爾車服無嬖爾儀以
保爾域爾無我視不慎不整我之此復惟祿之幸於戲
後人惟肅惟栗無忝顯位以蕃漢室

迪志詩

漢傳教武仲

咨爾庶士迨時斯勗日月逾邁豈云旋復哀我經營

力靡及在茲弱冠靡所樹立於赫我祖顯于殷國貳迹
阿衡克光其則武丁興商伊宗皇士爰作股肱萬邦是
紀奕世載德迄我顯考保膺淑懿續修其道漢之中葉
俊乂式序秩彼殷宗光此勲緒伊余小子穢陋靡逮懼
我世烈自茲以隆誰能革濁清我濯漑誰能昭闇啓我
童昧先人有訓我訊我誥訓我嘉務誨我博學爰率朋
友尋此舊則契濶夙夜庶不懈或秩秩大猷紀綱度式
匪勤匪昭匪壹匪測農夫不怠越有黍稷誰能云作考
之居息二事敗業多疾我力如彼遵衢則罔所極貳志
靡成聿勞我心如彼兼聽則溷於音於戲君子無恒自
逸徂年如流鮮茲暇日行邁屢稅胡能有迄密勿朝夕

聿同始卒

述志詩二首

漢仲長統公理

飛鳥遺跡蟬蛻亡殼騰虵棄鱗神龍喪角至人能變達
上拔俗乘雲無轡騁風無足垂露成幃張霄成幄沉瀟
當餐九陽代燭恒星豔珠朝霞潤玉六合之內恣心所
欲人事可遺何為局促

大道雖夷見幾者寡任意無非適物無可古來繚繞委
曲如瑣百慮何為至要在我寄愁天上埋憂地下叛散
五經滅棄風雅百家雜碎請用從火抗志山西游心海
左元氣為舟微風為枕翱翔太清縱意容冶

矯志詩

曹植

芳樹雖香難以餌烹尸位素餐難以成名磁石引鐵於
金不連大朝舉士愚不聞焉抱壁塗乞無為貴寶履仁
遘禍無為貴道鵠雛遠害不羞卑棲靈虬避難不耻汚
泥都蔗雖甘杖之必折巧言雖美用之必滅濟濟唐朝
萬邦作孚逢蒙雖巧必得良弓聖主雖知必得英雄螳
螂見嘆齊士輕戰越王軼蛙國以死獻道遠知驥世偽
知賢覆之幘之順天之矩澤如凱風惠如時雨口為禁
闔舌為發機門機之關楛矢不追

言志詩

晉嵇康 叔夜

曰余不師訓潛志去世塵遠想出宏域高步超常倫靈
鳳振羽儀戢景西海濱朝食琅玕實夕飲玉池津處順

故無累養德乃入神曠哉宇宙惠靈羅更四陳哲人貴
識義大雅明底身莊生悟無為老氏守其真天下皆得
一名實久相賓咸池饗爰居鍾鼓或愁辛柳惠善直道
孫登度知人寫懷良未遠感贈以書紳

命子詩

陶潛 凡十六首

悠悠我祖爰自陶唐邈為虞賓歷世重光御龍勤夏豕
韋翼商穆穆司徒厥族以昌○紛紛戰國漠漠衰周鳳
隱於林幽人在丘逸蚪遶雲奔駭流天集有漢卷予
愍侯○於赫愍侯運當攀龍撫劍夙邁顯茲武功書誓
山河啓上開封豐豐丞相允迪前蹤○渾渾長源蔚蔚
洪柯群川載導衆條載羅羅時有語默運因隆宏在我中

晉業融長沙○桓桓長沙伊勲伊德天子疇我專征南
國功遂辭歸臨寵不惑孰謂斯心而近可得○肅矣我
祖慎終如始直方一臺惠和千里於皇仁考淡焉虛止
寄迹風雲真茲愠喜○嗟余寡陋瞻望弗及顧慚華鬢
負影隻立三千之罪無後為急我誠念哉呱聞爾泣○
卜云嘉日占亦良時名汝曰儼字汝求思温恭朝夕念
茲在茲尚想孔伋庶其企而○厲夜生子遠而求火凡
百有心奚特於我既見其生實欲其成人亦有言斯情
無假○日居月諸漸免于孩福不虛至禍亦易來夙興
夜寐願爾斯不爾之不木亦已焉哉

勸農詩六首

悠悠上古厥初生人傲然自足抱朴含真智巧既萌資
待靡因誰其贍之實賴哲人○哲人伊何時爲后稷贍
之伊何實曰播殖舜既躬耕禹亦稼穡遠若周典八政
始食○熙熙令旨猗猗原陸卉木繁榮和風清穆紛紛
上女趨時競逐桑婦宵征農夫野宿○氣節易過和澤
難久冀缺攜儷沮溺結耜相彼賢達猶勤壟畝矧伊衆
庶曳裾拱手○民生在勤勤則不置宴安自逸歲暮奚
冀儋石不儲飢寒交至爾爾信列能不懷愧○孔耽道
德樊須臾是鄙董樂琴書田園不履若能超然投跡高軌
敢不歛衽敬讚德美

獻詩

應詔詩二首

晉張華茂先

赫赫大晉奄有萬方陶以仁化曜以天光二跡陝西實
在我王內鈺玉鉉外惟鷹揚四牡揚鑣玄輅振綏庶寮
群后餞飲洛湄感離嘆悽慕德遲遲
崇選穆穆利建明德於顯穆親時惟我王稟姿自然金
質玉相光宅舊趙作鎮冀方休寵曲錫備物煥彰發軔
上京出自天邑百寮餞行摛紳具集軒冕峩峩冠蓋習
習戀德惟懷永嘆弗及

應詔詩

晉何劭敬祖

穆穆聖王體此慈仁友于之至通于明神遊宴綢繆情
戀所親薄言餞之于洛之濱崑崙巖巖洪流湯湯春風

動衿歸鴈和鳴我后饗客鼓瑟吹笙舉爵惟別聞樂傷
情嘉宴既終白日西歸群司告旋鸞輿整綬我皇重離
頓轡驂駢臨川永歎酸涕霑頤崇恩感物左右同悲

應詔詩二首

晉問丘冲

暮春之月春服既成陽昇土潤冰渙川盈餘萌達壤嘉
木敷榮后皇宣遊既宴且寧光光華輦詵詵從臣微風
扇穢朝露翳塵上蔭丹幄下藉文茵臨川浥盥濯故潔
新俯鏡清流仰睇天津藹藹華林嚴嚴景陽業業峻宇
奕奕飛梁垂蔭倒景若沉若翔

浩浩白水汎汎龍舟皇在靈沼百辟同遊擊擢清歌鼓
柝行酬聞樂咸和具醉斯柔在昔帝虞德被遐荒千戚
在庭苗民來王今我哲后古聖齊芳惠此中國以綬四
方元首既明股肱惟良樂酒今日君子惟康

應詔詩

宋顏延之延年

太儀在御皇聖居直旁緝民紀仰禕天經物資感變神
以瑞形川無遁寶山不闕靈亦既戒裝皇心載遠夕帳
亭臯晨儀禁苑神行景驚發自靈闡對宴感分瞻秋悼
晚

應詔詩

沈約二首

皇情悵東繼羽飾拂南躔夏雲清朝景秋風揚早蟬飲
和陪下席論道光上筵

應詔詩

沃若動龍駘參差疑鳳管金塘草未合玉池泉將滿

應詔詩

梁王筠

金版韜英玉牒蘊精帝德乃武王威有征軒習弧矢夏
陳干戚周驚戎車漢馳羽檄我皇俊聖千年鍾武德洞
十門威加八柱金正圯德水行失道胡馬南牧戎徒西
保存食伊瀝整居澧鎬金闕揚塵銅臺戊革命彼膳夫
爰詔協律樂舞出車絃操吉日玉饌駢羅瓊漿泛溢聖
德温温賓儀秩秩

應詔詩

梁劉孝綽

皇心眷將遠悵餞靈芝之側是日青春獻林塘多秀色芳
卉疑綸組嘉樹雕節遊絲綴鶯領光風送綺翼下羣

朝既盈留宴景將共高辯競談瑞竒文爭筆力伊臣獨
無伎何由奉次息

公讌

元會詩

曹植

初會元祚吉日惟良乃為佳會宴此高堂衣裳鮮潔黼
黻玄黃珍膳羅逸充溢圓方俯視文軒仰瞻華梁願保
茲喜千載為常歡笑盡娛樂哉未央皇家榮貴壽考無
疆

後園會詩

張華

暮春元日陽氣清明祁祁甘雨膏澤流盈習習祥風啓
滯導生禽鳥逸豫桑麻滋榮纖條被綠翠華令英於皇

我后欽若昊乾順時省物言觀中園讌及群辟乃命乃
延合樂華池祓濯清川汎彼龍舟沂遊渚源

太子賜宴詩

陸機

明明隆晉茂德有赫思媚上帝配天光宅誕育皇儲儀
刑在昔微言時宣福祿來格勞謙降賁肆敬下臣肇彼
先驅翻成嘉賓

洛水詩

潘尼 二首

晷運無窮已時逝焉可追斗酒足為歡臨川胡獨悲暮
春春服成百草敷英蕤聊為三日遊芳駕結龍旂廟廊
多豪俊都邑有艷姿朱軒蔭蘭皋翠幙暎洛湄臨崖濯
素手涉水寒輕衣沉鈎出比目舉弋落雙飛羽觴乘波

進素卵隨流歸

侍皇太子宴玄圃詩

商風初授辰火微流朱明送夏少昊迎秋嘉木茂園芳
草被疇於時我后以豫以遊

華林園詩

晉王濟 武子

蠢爾長虵存食江汜我皇神武汎舟萬里迅雷電邁弗
及掩耳思樂華林薄采其蘭皇居偉則芳園巨觀仁以
山悅水為智歡清池流爵秘樂通玄物以時序情以化
宣

侍宴西池詩

謝靈運

詳觀記牒鴻荒莫傳降及雲鳥日聖則天虞承唐命周

襲商艱江之永矣皇心惟眷矧乃暮春時物芳衍濫觴
逶迤周流蘭殿禮備朝容樂闋夕宴

詔宴西池詩

顏延之

河岳曜圖聖時利見於赫有皇升中納禪載貞其恒載
通其變大哉人文至矣天睠昭哉儲德靈慶攸繁明兩
紫宸景物乾元帝宗晻藹惟城惟蕃衮衣善職彤弓受
言飾館春宮稅鑣青輅長筵逶迤浮觴汾沂

侍華光殿為太子作

謝朓

傍求遂古逖聽鴻名大寶曰位得一為貞朱紕叶社綠
字摛英升配同貫進讓殊聲大行將屬會昌已命國步
中阻震居膺慶璽劔克傳龜玉增映玄塞北靡丹徼南

極浮毳駕風非泳非陟西京詣謁東都濟濟秋夜濯流
春楔浮醴初吉云獻上除方啟昔駕陽穎今帳雲陸嘉
樂舊矣芳宴在斯載留神矚有睟天儀龍精已映威仰
未移葉依舊鳥花落春池高殿弘敞禁林稠密青墜嵐
起丹樓間出翠葆隨風金戈動日惆悵清管徘徊輕佻
灞漭入筵河淇流乍媧若來往觴肴汾泝歡飫有終清
光欲暮輕輶迴首華組徐步

九日侍宴樂游苑詩

齊丘遲

希範

朱明已謝蓐收司禮爰理秋祓備揚旌祭奉璋峩峩金
貂濟濟上林弘敞離宮非一綵殿迴風丹樓映日隋珠
甲帳屯衛周悉睟容徐動天儀澄謐雲物游颺光景高

麗枯葉未落寒花委砌絲桐激舞楚雅閑慧參差斂系響
殷勤流詰

侍宴樂遊苑詩

齊任昉

帝德峻韶夏王功書頌平共貫汾五勝獨道邁三英我
皇撫歸運時乘信告成一唱革鍾石再撫被絲笙黃草
歸雒木梯山薦玉榮時來濁河變瑞起溫洛清物色動
宸眷民豫降皇情

侍太子九日宴玄圃詩

齊王儉

明明儲后冲默其量徘徊禮樂優游風亮微言外融幾
神內王就日齊暉儀雲等望本茂條榮源澄流潔漢稱
間平周云魯衛咨我藩華方軼前軌秋日在房鴻鴈來

翔寥寥清景靄靄微霜草木搖落幽蘭獨芳眷言溜苑
尚想濠梁既暢旨酒亦飽徽猷有來斯悅無遠不柔

侍曲水宴詩

沈約

光遲蕙苑氣婉椒臺皇心愛矣帝曰遊哉王鸞徐駉馬翠
鳳輕迴別殿廣臨離宮洞啓川祗奉壽河宗相禮清洛
漸筵長伊流陞洞盪嘉羞搖漾芳醴輕歌易繞弱舞難
持素雲留管玄鶴停絲引思爲歲歲亦陽止加服賁身
身亦昌止徒勤丹漆終愧文梓

侍太子九日宴詩

涼風北起高鴈南翻葉浮楚水草折梁園淒清霜野惆
悵晨鷗雲輕寒樹日麗秋原三金廣設六羽高陳寒英

始獻涼酎初醇靡靡神襟鏘鏘群彥思媚儲猷洽和奉
宴恩暢蘭席歡同桂殿景遽樂推臨風以眷麗景天枝
位非德舉任伍辰階祚均河楚負岳未勝瞻雲難侶望
古興惕心焉載佇

侍宴樂遊苑詩

憑玉宅海端宸御天上流飛壑靜震騰川凝神貫極摛
道漏泉西服委衽南風在茲暮芝始綠年桂初丹上林
葉下滄池水寒霜霑玉樹鴈動輕瀾停蹕玉陛徙衛琤
墀凋箱鳳綵羽蓋鸞姿虹旌迢遶翠華歲糝禮弘灑泐
義高洛湄

九日侍宴樂遊苑詩

梁劉苞

六郡良家子幽并遊俠兒立乘爭飲羽倒騎競紛馳鳴
珂飾華眊毛羽爲金鞍映玉羈膳羞殫海陸和齊眠秋
宜雲飛雅琴奏風起洞簫吹曲終高宴罷景落樹陰移
微薄承嘉惠飲德良不貲取効績無紀感恩心自知

祖餞

別詩二首

應瑒

朝雲浮四海日暮歸故山行役懷舊土悲思不能言悠
悠涉千里未知何時旋

浩浩長河水九折果北流晨夜赴滄海海流亦何抽遠
適萬里道歸來未有由臨河累太息五內懷傷憂

送別王世胄詩

潘岳

朱鑣既揚四轡既整駕言餞行告離芒嶺情有遷延日
無餘影迴轅南翔心焉北騁

送盧景宣詩

潘尼

楊朱焉所哭岐路重別離屈原何傷悲生離情獨哀知
命雖無憂倉卒意低迴歎氣從中發灑淚隨襟頽九重
不常鍵閭闔有時開愧無紵衣獻貽言取諸懷

從幸洛水餞王公歸國詩

晉王浚 彭祖

聖主應期運至德敷彝倫神道垂大教玄化被無垠欽
若崇古制建侯屏四鄰皇輿迴羽蓋高會洛水濱臨川
講妙藝縱酒釣潛鱗八音以迭奏蘭羞備時珍古人亦
有言爲國不思貧與家廟庭施幸得則太鈞群僚荷恩

澤朱顏感獻春賦詩盡下情至感暢人神長流無舍逝
白日入西津奉辭慕華輦侍衛路無因馳情繫帷幄乃
心戀軌塵

贈妹九嬪悼離詩

左思

鬱鬱岱清海瀆所經陰精以靈爲祥爲禎我我今妹應
期誕生如蘭之秀如芝之榮總角岐嶷亂韶夙成比德
古烈異世同聲惟我惟妹是惟同生早喪先妣百恩常
情女子有行實遠父亢骨肉之恩固有歸寧何悟離析
晰隔以天庭自我不見于今二齡穆穆令妹有德有言
才麗漢班明朗楚樊默識若記下筆成篇行顯中閨名
播外藩何以爲贈勉以列圖何以爲言申以詩書相去

在近上下欵欵今辭滿旬鬱煩不舒

與廬陵王紹別詩

宋武帝

連歲矜離心今茲幸良集信宿寤晨暮開顏披所載未
盡歡晤懷已傷岐路及輟轡引江介飛筵背爾邑情擾
徒旅戒團樂流景入遲遲分手念泫泫登路泣

吳興黃浦亭庾中郎別詩

鮑照 三首

風起洲渚寒雲上日無輝連山眇煙霧長波迥難依依
鴈方南過浮客未西歸已經江海別復與親眷違奔景
亦有窮離袖安可揮懽觴為悲酌歌服成泣衣温念終
不渝藻志遠存追役人多牽滯顧路慙奮飛昧心附遠
翰烟言藏佩韋

贈傅都曹別詩

輕鴻戲江潭孤鴈集洲汜邂逅兩相親緣念共無已風
雨好東西一隔頓萬里追憶栖宿時聲容滿心耳落日
川渚寒愁雲繞天起短翮不能翔徘徊煙霧裡

送盛侍郎餞候亭詩

霑霜襲冠帶驅駕越城闌北臨出塞道南望入鄉津高
壙宿寒霧平野起秋塵君為坐堂子予乃負羈人欣悲
豈等志甘苦誠異身結涕園中草憔悴悲此春

臨岐贈別詩

謝朓

悵望南浦時徙倚北梁步華夏涼風初日隱輕霞暮荒
城迥易陰秋溪廣難渡沫泣豈徒然君子行多露

別蕭咨議詩

任昉

離燭有窮輝別念無終緒岐言未及申離目已先舉揆
景巫衡阿臨風長楸浦浮雲難嗣音徘徊悵誰與倘有
關外驛聊訪狎鷗渚

餞錢文學

沈約

漢池水如帶巫山雲似蓋
簞泪背吳潮潺湲橫楚瀨
一望沮漳水寧思江海會
以我徑寸心從君千里外

詠史

詠史詩

班固

三王德彌薄惟後用肉刑
刑太倉令有罪就遞長安城
自恨身無子困急獨煢煢
小女痛父言死者不可生
上書

請闕下思古歌
鷄鳴憂心摧折裂
晨風揚激聲
聖漢孝文帝惻然感至情
百男何憤憤不如一緹縈

詠史詩二首

魏阮瑀元瑜

誤哉秦穆公身沒從三良
忠臣不達命隨軀就死亡
低頭闕墻戶仰視日月光
誰謂此何處恩義不可忘
路人為流涕黃鳥鳴高桑

燕丹養勇士荆軻為上賓
圖盡七首長驅西入秦
素車駕白馬相送易水津
漸離擊筑歌悲聲感路人
舉坐同咨嗟歎氣若青雲

秋胡詩

傅玄

秋胡納令室三日宦他鄉
皎皎潔婦姿冷冷守空房
嬾

婉不終夕別如參與商積誠馳萬里既至兩相忘行人
悅令顏借息此樹傍言以逢鄉喻遂下黃金裝

詠史詩二首

晉袁宏 彦伯

周昌梗槩臣辭達不為訥汲黯仕稷器棟梁表天骨陸
賈厭解分時與酒擣杙婉轉將相門一言和平勃趨舍
各有之俱令道不沒

無名因螻蟻有名世所疑中庸難為體狂狷不及時楊
惲非忌貴知及有餘辭躬耕南山下蕪穢不遑治趙瑟
奏哀音秦聲歌新詩吐音非凡唱負此欲何之

詠荆軻詩

陶潛 四首

燕丹善養士志在報強羸招集百夫良歲暮得荆卿君

子死知己提劍出燕京素驥鳴廣陌慷慨送我行雄髮
指危冠猛氣衝長纓飲餞易水上四座列群英漸離擊
悲筑宋意唱高聲蕭蕭哀風逝淡淡寒波生商音更流
涕羽奏壯士驚心知去不歸且有後世名登車何時顧
飛蓋入秦庭凌厲越萬里逶迤過千城圖窮事自至豪
主正怔營惜哉劍術疎竒功遂不成其人雖已沒千載
有餘情

詠三良詩

彈冠乘通津但懼時我遺服勤盡歲月常恐功愈微忠
情謬獲露遂為君所私出則陪文輿入必侍丹帷箴規
嚮已從計議初無虧一朝長逝後願言同此歸厚恩固

難忘君命安可違。臨穴罔惟疑。投義志。攸希荆棘籠高墳。黃鳥聲正悲。良人不可贖。泫然沾我衣。

詠二疏詩

大象轉四時。功成者自去。借問衰周來。幾人得其趣。游目漢庭中。二疏復此舉。高嘯返舊居。長揖儲君傳。餞送傾皇朝。華軒盈道路。離別情所悲。餘榮何足顧。事勝感行人。賢哉豈常譽。厭厭閭里歡。所營非近務。促席延故老。揮觴道平素。問金終寄心。清言曉未悟。放意樂餘年。遑恤身後慮。誰云其人亡。久而道彌著。

桃源詩

嬴秦亂天紀。賢者避其世。黃綺之商山。伊人亦云逝。往

迹浸復湮。來逕遂蕪廢。相命肆農初。日入從所憇。桑竹垂餘蔭。苾稷隨時藝。春蠶收長絲。秋熟靡王稅。荒路暖交通。鷄犬互鳴吠。俎豆猶古法。衣表無新製。童孺縱行歌。斑白歡游詣。草榮識節和。木衰知風厲。雖無紀曆誌。四時自成歲。怡然有餘樂。于何勞日慧。竒蹤隱五百。一朝敞神界。淳薄旣異源。旋復還幽壑。借問游方士。焉測塵囂外。願言躡輕風。高舉尋吾契。

和南海王詠秋胡妻詩

七

齊王融

元長

日月共爲照。松筠俱以真。佩紛甘自澁。結鏡待君明。且協金蘭好。方愉琴瑟情。佳人忽千里。幽閨積思生。景落中軒坐。悠悠望城闕。高樹升夕煙。層樓滿初月光。

陰非或異山川屢難越輟泣揜衿姿搔首亂雲髮
傾魄屬徂火搖念待方秋涼氣承宇結明熠倏堦流三
星亦虛暎四屋慘多愁思君如萱草一見乃忘憂
杼軸鬱不諧契闊彌新故朔風欄上發寒鳥林間度客
遠之衣裘歲晏饒霜露參差興別緒依遲起離慕
願言如可信行邁亦云反睇景不告勞瞻途寧遽遠何
以淹歸轍蠶妾事春晚送目亂前華馳心迷舊婉
椒珮客有結振芳跂路隅黃金徒以賦白珪終不渝明
心良自皎安用久踟躕遘車及粉巷流日下西虞
披帷惕有忘出門遲所欲彼美後來儀慙顏變欣囑蘭
艾隔芳臭涇渭分清濁去去夫人子請殉川之曲

百一

百一詩

晉應璩 休璉

年命在桑榆東岳與我期長短有常命遲速不敢辭斗
酒多爲樂無爲待來茲室廣致疑陰臺高來積陰柰何
季世人侈靡在宮墻飾巧無窮極土木被朱光徵求傾
四海雅意猶未康

廣文選卷第八

廣文選卷第九

詩

遊仙

遊仙詩

魏文帝

西山一何高高高殊無極上有兩仙童不飲亦不食與
我一丸藥光曜有五色服藥四五日胃臆生羽翼輕舉
生風雲倏忽行萬億流覽觀四海茫茫非所識

遊仙詩

曹植二首

人生不滿百歲歲少歡娛意欲奮六翮排霧凌紫虛蟬
蛻同松喬翻跡登鼎湖翱翔九天上騁轡遠行遊東觀
扶桑曜西臨弱水流北極玄天渚南翔陟丹丘

五遊詩

九州不足步願得凌雲翔逍遙八紘外游目歷遐荒披
我丹霞衣襲我素霓裳華蓋芬晻藹六龍仰天驤曜靈
未移景倏忽造昊蒼閭闔啓丹扉雙闕曜朱光徘徊文
昌殿登陟太微堂上帝休西 群后集東廂帶我瓊瑤
珮漱我沆瀣漿踟躕玩靈芝徙倚弄華芳王子奉仙藥
羨門進竒方服食享遐紀延壽保無疆

遊仙詩

嵇康

遙望山上松隆谷鬱青葱自遇一何高獨立迥無雙願
想遊其下蹊路絕不通王喬棄我去乘雲駕六龍飄飄
戲玄圃黃老路相逢授我自仙道曠若發童蒙採藥鍾

山隅服食改姿容蟬蛻棄穢累結友家板桐臨觴奏九
韶雅歌何邕邕長與俗人別誰能覩其蹤

遊仙詩

張華

雲霓垂藻旒羽袿揚輕裾飄登清雲間論道神皇廬蕭
史登鳳音王后吹鳴竽守精味玄妙逍遙無為墟

遊仙詩

晉郭璞 景純

璇臺冠崑嶺西海瀕招搖瓊林籠藻映碧樹疏英翹丹
泉漂朱沫黑水鼓玄濤尋仙萬餘日今乃見子喬振髮
晞翠霞解褐被絳綃總轡臨少廣盤虬舞雲輅永偕帝
鄉侶千齡共逍遙

遊仙詩

成公綏

盛年無幾時奄忽行欲老那得赤松子從學度世道西
入華陰山求得神之草珠玉猶糞土何惜千金寶但願
壽無窮與君長相保

遊仙詩五首

王融

桃李不奢年桑榆多暮節常恐秋蓬根連翩因風雪習
道遍槐岷追仙度瑤碣綠帙啓真詞丹經流妙說長河
且已榮曾山方可礪

獻歲和風起日出東南隅鳳旂亂煙道龍駕溢雲區結
賞自雲嶠移燕乃方壺金芝浮水翠玉笋挹泉珠徒用
霜露改終然天地俱

命駕瑤池隈過息羸女臺長袖何靡靡蕭管清且哀璧
門涼月舉珠殿秋風迴清鳥驚高羽王母停玉盃舉手
暫爲別千年將復來

湘沅有蘭芷洎吾欲南征遺珮出長浦舉袂望增城朱
霞拂綺樹白雲照金楹五芝多秀色八桂常冬榮彌節
且夷與參差聞鳳笙

命駕隨所卽燭龍導輕驥沙澤振寒草弱水駕冰潮遠
翔馳聲響流雪自飄飄忽與若人遇長舉入雲霄羅繹
徒有睨鷓明已寥寥

和竟陵王遊仙詩二首

沈約

天嶠乘絳仙螭衣方陸離玉臺隱雲霧溶溶紛上馳瑤
臺風不息赤水正漣漪崢嶸玄圃上聊攀瓊樹枝

朝止閭闔宮暮宴清都闕騰蓋隱奔星低鑿避行月九
疑紛相從虹旌乍升沒清鳥去復還高堂雲不歇若華
有餘照淹留且晞髮

招隱

招隱詩

張載

出處雖殊塗居然有輕易山林有悔悞人間實多累鶴
鷗翔窮冥蒲且不能視鶴鷺遵臯渚數為矧所繫隱顯
雖在心彼我共一地不見巫山火芝艾豈相離去來捐
時俗超然辭世偽得意在丘中安事愚與智

招隱詩

張協

結宇窮嵐曲耦耕幽藪陰荒庭寂以閑山岫峭且深淒

風起東谷有奔興南岑雖無箕畢期膚寸自成霖澤知
登壘雖寒猿擁條吟溪壑無人迹荒楚鬱鬱架森投未修
岸垂時聞樵採音重基可擬志迴淵可比心養貞尚無
爲道勝貴陸沉遊思竹素園寄辭翰墨林

遊覽

遊宴詩

魏文帝 六首

置酒坐飛閣逍遙臨華池神飈自遠至左右芙蓉披綠
竹夾清水秋蘭被幽崖月出照園中冠佩相追隨客從
南楚來爲我吹參差淵魚求伏浦聽者未云疲高文一
何綺小儒安足爲肅肅廣殿陰雀聲愁北來衆賓還城
邑何以慰吾思

於玄武陂作

兄弟共行遊駟車出西城野田廣開闢川渠互相經黍稷何鬱鬱流波激悲聲菱芡覆綠水芙蓉發丹榮柳垂重蔭綠向我池邊生乘渚望長洲群鳥謹譁鳴萍藻濫泛浮澹澹隨風傾忘憂共容與暢此千秋情

黎陽作二首

朝發鄴城夕宿韓陵霖雨載塗輿人困窮載馳載驅沐雨櫛風舍我高殿何爲泥中在昔周武爰暨公旦載主而征救民塗炭彼此一時惟天所讚我獨何人餘不靜亂
殷殷其雷濛濛其雨我徒我車涉此艱阻遵彼洹湄言

刈其楚班之中路塗潦是御麟麟大車載低載昂嗷嗷僕夫載什載僮蒙塗膏雨霑衣霑裳

清河作

方舟戲長水湛淡自浮沈絃歌發中流悲響有餘音
聲入君懷悽愴傷人心心傷安所念但顧恩情深願爲晨風鳥雙飛翔北林

銅雀園詩

朝遊高臺觀夕宴華池陰大酋奉甘醪獸人獻嘉禽齊倡發東舞秦箏奏西音飛鳥翻翔舞悲鳴集北林樂極哀情來謬恨摧肝心

清河作二首

王粲

悠悠涉荒路靡靡我心愁
四望無煙火但見林與丘
城郭生榛棘蹊徑無所由
萑蒲竟廣澤葭葦夾長流
遊客多悲傷淚下不可收
朝入譙郡界曠然消人憂
詩人美樂土雖客猶願留

列車息衆駕相伴綠水湄
幽蘭吐芳烈芙蓉發紅暉
百鳥何續翻振翼群相追
投網引潛鯉強弩下高飛
白日已西邁歡樂忽忘歸

遊覽詩二首

魏陳琳孔璋

高會時不娛羈客難爲心
慙懷從中發悲感激清音
投觴罷歡坐逍遙步長林
肅肅山谷風默默天路陰
惆悵忘旋反歔歔涕霑襟

節運時氣舒秋風涼且清
閑居心不娛駕言從友生
翱翔戲長流逍遙登高城
東望看疇野廻顧覽園庭
嘉木凋綠葉芳草纖紅榮
騁哉日月遠年命將西傾
建功不及時鍾鼎何所銘
收念還房寢慷慨詠墳經
庶幾及君在立德垂功名

登成都白菟樓

張載

重城結曲阿飛宇起層樓
累棟出雲表峽嶺臨太虛
高軒啓朱扉廻望暢八隅
西瞻岷山嶺差峩似荆巫
蹲鴟蔽地生原隰殖嘉蔬
雖遇堯湯世民食恒有餘
鬱鬱小城巾岌岌百族居
街衢紛綺錯高甍夾長衢
借問楊子舍想見長卿廬

華林園詩

晉武帝 炎

習習春陽帝出乎震天施地生以應仲春思文聖皇順
時秉仁欽若靈則飲御嘉賓洪恩晉暢慶乃衆臣其慶
維何錫以帝祉肆觀群后有客戾止外納要荒內延卿
士簫管詠德八音咸理豈樂飲酒莫不燕喜

三月三日詩

晉王讚 正長

招搖啓運寒暑代新豐豐不舍如彼行雲猗猗季月穆
穆和春皇儲降止宴及家賓家賓伊何且惟姻族如彼
葛藟衍于椽木郁郁近侍巖巖台嶽庶寮鱗次以崇天
祿如彼崑山列此琚玉巍巍天階亦降列宿右載元首
左光儲副大祚無窮天地爲壽

上巳會詩

晉阮

三春之季歲惟嘉時靈雨旣零風以散之英華扇耀祥
鳥群嬉澄澄綠水澹澹其波修岸逶迤長川相過聊且
逍遙其樂如何坐此修筵臨彼素流嘉肴旣設舉爵獻
酬彈箏弄琴新聲上浮水有七德智者所娛清瀨澆澆
菱葭芬敷沉此芳鈞引彼潛魚委餌芳美君子戎諸

蘭亭集詩

晉謝安 安石

相與欣佳節率爾同寒裳薄雲羅景物微風翼輕航醇
醪陶丹府兀若遊羲唐萬殊混一象安復覺彭殤

蘭亭集詩

晉王羲之 逸少

仰視碧天際俯瞰淥水濱寥闊無涯觀寓目理自陳大

矣造化工萬殊莫不均群籟雖參差適我無非親

蘭亭詩

晉孫綽與公

流風拂枉渚地停雲陰九臯鶯語吟修竹游鱗戲瀾濤
携筆落雲藻微言剖纖毫時珍豈不甘忘味在聞韶

曲水集詩

宋謝惠連

四時著平分三春稟融爍遲遲和景婉天天園桃灼携
朋斯郊野昧旦辭壘郭表雲興翠嶺芳飈起華薄解纜
偃崇丘藉草繞迴壑際渚羅時軟託波汎輕爵

遊覽詩

棗據

矯足登雲閣相伴步九華徒倚憑高山仰攀桂樹柯延
首觀神州迴睛盼曲阿芳林挺修幹一歲再三花何以

濟不朽嘘吸漱朝霞重岩吐神溜傾腸挹涌波恢恢大
道間人事足為多

時運詩四首

陶潛五首

邁邁時運穆穆良朝襲我春服薄言東郊山條餘霽宇
暖微霄有風自南翼彼新苗洋洋平津乃漱乃濯貌
邈遐景載欣載矚稱心而言人亦易足揮茲一觴陶然
自樂○延目中流悠悠清沂童冠齊業間詠以歸我愛
其靜寤寐交輝但恨殊世遂不可追○斯晨斯夕言息
其廬花藥分列林竹翳如清琴橫床濁酒半壺黃唐莫
逮慨獨在余史記曰黃帝為有熊帝堯為陶唐

遊斜川詩有叙

辛丑正月五日天氣澄和風物間美與二三隣曲同
遊斜川臨長流望曾城魴鯉躍鱗於將文水鷗乘和
以翻飛彼南阜者名實舊矣不復乃為嗟嘆若夫曾
城傍無依接獨秀中臯遙想靈山有愛嘉名欣對不
足率爾賦詩悲日月之遂往悼吾年之不留各疏年
紀鄉里以記其時日
開歲倏五日吾生行歸休念之動中懷及辰為茲遊氣
和天惟澄班坐依遠流弱湍馳文魴閑谷矯鳴鷗迥澤
散游目緬然睇曾丘雖微九重秀顧瞻無匹儔提壺接
賓侶引滿更獻酬未知從今去當復如此不中觴縱遙
情忘彼千載憂且極今朝樂明日非所求

東山望海詩

謝靈運 五首

開春獻初歲白日出悠悠蕩志將愉樂瞰海庶忘憂策
馬度蘭皋縹轡息椒丘采蕙遵大浦牽茗履長洲白花
編陽林紫翹燁春流非徒不彌忘覽物情彌適萱蘚始
無畏寂寞終可求

登永嘉綠嶂山詩

裹糧杖輕策懷遲上幽室行原徑轉遠距陸情未畢澹
歛結寒姿團欒潤霜質澗委水屢迷林迥巖逾密眷西
謂初月顧東疑落日殘夕奄昏曙蔽翳皆周悉蠱上貴
不事履二美貞吉幽人常坦步高尚邈難匹願阿竟何
端寂寂寄抱一恬如既已交繕性自此出

遊嶺門山人詩

西京誰修政龔及稱良史君子豈定所清塵慮不嗣早
莅建德鄉民懷虞芮意海岸常寥寥空館盈清思協以
上冬月晨遊肆所喜千丘邈不同萬嶺狀皆異威摧三
山峭滌汨兩江駛魚舟豈安流樵拾謝西芘人生誰云
樂貴不屈所志

石室山詩

清旦索幽異放舟越坳郊萋萋蘭渚急藐藐苔嶺高石
室冠林陬飛泉發山椒虛泛徑千載崢嶸非一朝鄉村
絕聞見樵蘇限風霄微戎無遠覽總筭羨升喬靈域久
韜隱如與心賞交合歡不容言摘芳弄寒條

登上戌石鼓山詩

旅人心長久憂憂自相接故鄉路遙遠川陸不可涉
汨莫與娛發春托登躡歡願旣無並戚慮庶有協極目
矚左濶迴顧眺右狹日末澗增波雲生嶺逾疊白芷競
新茗綠蘋齊初葉摘芳芳靡諼愉樂樂不變佳期緬無
像騁望誰云愜

春遊詩

張公庭

勾芒御春正衡紀運玉瓊明庶起祥風和氣翕來征慶
雲蔭八極甘雨潤四垓昊天降靈澤朝日耀華精嘉苗
布原野百卉敷時榮鳩鵲與鶯黃間關相和鳴菜萍覆
靈沼香花揚芳馨春遊誠可樂感此白日傾休否有終

極落葉思本莖臨川悲遊者節變動中情

登景陽樓詩

宋劉義恭

丹墀設金屏瑤榭陳玉床温宮冬開燠清殿夏含霜弱
夔布遐馥輕葉振遠芳彌望少無際肆睇周華疆象闕
對馳道飛廉矚方塘邱寺送暉曜槐柳自成行通川溢
輕艦長街盈方箱顧此爝火微胡顏則天光

遊邱園詩

王融

道勝業茲遠心閑地能隙桂崦鬱初栽蘭墀坦將闢虛
檐對長嶼高軒臨廣液芳草列成行嘉樹紛如積流風
轉還逕還音旋謂清煙泛喬石日汨山照紅松映水華
碧暢哉人外賞遲遲眷西夕

登高望春詩

沈約

登高眺京洛街巷何紛紛迴首望長安城闕鬱盤桓齊
童躡朱履趙女揚翠翰春風搖雜樹歲蕤綠且丹寶瑟
玫瑰柱金羈玳瑁鞍淹留宿下蔡置酒過上蘭日出照
鈿黛風過動羅紈

望湖北詩

梁劉孝威二首

紫川通太液丹岑聯少華堂皇更隱快松灌雜交加苻
浦浮新葉漁舟繞落花浴童爭淺岸漂女擇平沙極望
傷春日迴車歸狹邪

出新林詩

芒山眊洛邑函谷望秦京遙分承露掌遠見長安城故

鄉巴可識遊子必勞情霧罷前村見風息涌川乎坐觀
暮潮落漸見夕煙生無由一羽化徒想風御輕

江州還入石頭詩

梁劉峻 孝標

鼓柁浮大川延睇洛城觀洛城何鬱鬱香與雲霄半前
望蒼龍門斜瞻白鶴館槐垂御溝道柳綴金隄岸迅馬
晨風趨輕輿流水散高歌梁塵下絙瑟荆禽亂我思江
海遊曾無朝市玩忽寄靈臺宿空軫及關歎仲子入南
楚伯鸞出東漢何能栖樹枝取艷王孫彈

東亭極望詩

梁蕭子範

晚流稍東急暝景促西暉水鳥銜魚望蓮舟拂芰歸郊
原共超遠林野雜依菲從君採蘿葛寧復想輕肥

應教使客春遊詩

梁蕭子暉

上林看草色河橋望日暉洛陽城閉晚金鞍橫路歸

詠懷

在鄒詩

漢韋孟

微微小子既苟且陋豈不牽位穢我王朝王朝肅清唯
俊之庭顧瞻余躬懼穢此征我之退征請于天子天子
我恤矜我髮齒赫赫天子明哲且仁縣車之義以洎小
臣嗟我小子豈不懷土庶我王寤越遷于魯既去襮祖
惟懷惟顧邠邠我徒戴負盈路爰戾于鄒鬻茅作堂我
從我環築室于牆我既遷逝心存我舊夢我瀆上立于
王朝其夢如何夢爭王室其爭如何夢王我弼寤其外

邦嘆其喟然念我祖考泣涕其漣微微老夫咨既遷絕
洋洋仲尼視我遺烈濟濟鄒魯禮義唯恭誦習絃歌異
於他邦我雖鄙考心其好而我徒侃爾樂亦在而

見志詩二首

漢酈炎 文勝

大道夷且長窘路狹且促修翼無卑栖遠趾不步局舒
吾陵霄羽奮此千里足超邁絕塵驅倏忽誰能逐賢愚
豈常類稟性在清濁富貴有人籍貧賤無天錄通塞苟
由已志士不相卜陳平傲里社韓信釣河曲終居天下
宰食此萬鍾祿德音流千載功名重山嶽

靈芝生河洲動搖因洪波蘭榮一何晚嚴霜悴其柯哀
哉二芳草不植泰山阿文質道所貴遭時用有嘉絳灌

臨衡宰謂宜崇浮華賢才抑不用遠投荆南沙抱玉乘
龍驥不逢樂與和安得孔仲尼爲世陳四科

臨終詩

漢孔融 文舉

言多令事敗器漏苦不密河潰蟻孔端山壞由猿穴消
涓江漢流天窓通冥室讒邪害公正浮雲翳白日靡辭
無忠誠華繁竟不實人有兩三心安能合爲一三人成
市虎浸漬解膠漆生存多所慮長寢萬事畢

懷德詩

王粲

伊昔值世亂秣馬辭帝京既傷蔓草別方知杖杜情嶠
函復丘墟冀闕緬縱橫倚棹汎涇渭日暮山河清蟋蟀
依桑野嚴風吹若莖鷓鴣在幽草客子淚已零去鄉三

十載幸遭天下平賢主降嘉賞金貂服玄纓侍宴出河
曲飛蓋遊鄴城朝露竟幾何忽如水上萍君子篤惠義
柯葉終不傾福履既所綏千載垂今名

感遇詩

魏劉楨公幹

蒼蒼山中桂團圓霜露色霜露一何繁桂枝生自直
猶在在南國因君爲羽翼謬蒙聖主私託身文墨職丹采
既已過敢不自彫飾華月照芳池坐列金殿側微臣固
受賜鴻恩良未測

述志詩二首

嵇康

潛龍育神軀濯鱗戲蘭池延頸慕大庭寢足俟皇羲慶
雲未垂景盤桓朝陽坡悠悠非我匹疇肯應俗宜殊類

難徧周鄙議紛流離軻軻丁悔吝雅志不得施耕耨感
甯越馬席激張儀逝將離群侶杖策追洪崖焦鵬振六
翮羅者安所羈浮遊太清中更求新相知比翼翔雲漢
飲露食瓊枝多念世間人夙駕成驅馳冲靜得自然榮
華安足爲

斥鷃擅蒿林仰笑神鳳飛坎井螭蛇宅神龜安所歸恨
自用身拙任意多未思遠實與世殊義譽非所希往事
既已謬來者猶可追何爲人事間自令心不夷慷慨思
古人夢想見容輝願與知己遇舒憤啓其微巖穴多隱
逸輕舉求吾師晨登箕山巔日夕不知饑玄居養營魄
千載長自綏

情詩

魏徐幹 備長

高殿鬱崇崇，廣廈凄泠泠。微風起，闐闐落日照階庭。踟躕雲屋下，笑歌倚華楹。君行殊不返，我節爲誰榮。鑪薰闔不用，鏡匣上塵生。綺羅失常色，金翠暗無精。嘉肴既忘御，旨酒亦常清。顧瞻空寂寂，唯聞燕雀聲。憂思相連屬，中心如宿酲。

詠懷詩十九首

阮籍

懸車在西南，羲和將欲傾。流光耀四海，忽忽至夕冥。朝爲咸池暉，蒙汜受其榮。豈知窮達士，一死不再生。視彼桃李花，誰能久榮榮。君子在何許，歎息未合弁。瞻仰景山松，可以慰吾情。

西方有佳人，皎若白日光。被服織羅衣，左右被雙璫。修容耀姿美，順風振微芳。登高眺所思，舉袂當朝陽。寄顏雲霄間，揮袖凌虛翔。飄飄恍惚中，流盼顧我傍。悅懌未交接，晤言用感傷。

東南有射山，汾水出其陽。六龍服氣輿，雲蓋覆天綱。仙者五、六人，逍遙晏蘭房。寢息一純和，呼翕成露霜。沐浴丹淵中，炤耀日月光。豈安通靈臺，游養去高翔。

殷勤令志結，怵惕常若驚。逍遙未終宴，朱華忽西傾。蟋蟀在戶牖，螻蛄號中庭。心腸未相好，誰云亮我情。願爲雲間鳥，千里一哀鳴。三芝延瀛洲，遠遊可長生。

炎光延萬里，洪川蕩湍瀨。鸞弓掛扶桑，長劔倚天外。秦

山成砥礪黃河爲裳帶視彼莊周子榮枯何足賴捐身
奔中野烏鳶作患害豈若雄傑士功名從此大
壯士何慷慨志欲威八荒驅車遠行役受命念自忘良
弓挾烏號明甲有精光臨難不顧生身死魂飛揚豈爲
全軀士效命爭戰場忠爲百世榮義使令名彰垂聲謝
後世氣節故有常
若木燿四海扶桑翳瀛洲日月經天塗明暗不相投窮
達自有常得失又何求豈效路上童携手共遨遊陰陽
有變化誰云沉不浮朱鼈躍飛泉夜飛過吳洲俛仰運
天地再撫四海流駁索名利場駑駿同一轡豈若遺耳
目升遐去殷憂

駕言發魏都南向望吹臺簫管有遺音梁王安在哉戰
士食糟糠賢者處蒿萊歌舞曲未終秦兵已復來林夾
非吾有朱宮生塵埃軍敗華陽下身竟爲土灰

朝陽不再盛白日忽西幽去此若俯仰如何似九秋人
言若塵路天道日悠悠齊景升丘山涕泗紛交流孔孟
臨長川惜逝忽若浮去者余不及來者吾不留願登太
華山上與松子遊漁父知世患乘流泛輕舟

混元生兩儀四象運銜璣曠日布炎精素月垂景輝晷
度有昭回哀哉人命微飄若風塵逝忽若慶雲晞修齡
適余願光寵非已威安期步天路松子與世違焉得凌
霄翼飄飄登雲巍嗟哉尼父志何爲居九夷

天網彌四野六翮掩不舒隨波紛綸客汎汎若鳧鷖生
命無期度朝夕有不虞列仙停修齡養志在冲虛飄飄
雲日間邈與世路殊榮名非已寶聲色焉足娛採藥無
旋返神仙志不符逼此良可感令我多躊躇
王業須良輔建功俟英雄元凱康哉美多士頌聲隆陰
陽有舛錯日月不常融天時有否泰人事多盈冲園綺
遜南岳伯陽隱西戎保身念道真寵耀焉足宗人誰不
善始尠能克厥終休哉上世士萬載垂清風
鴻鵠相隨飛浩渺運荒裔揮翮凌長風須臾萬里逝朝
餐琅玕實夕栖丹山際抗身青雲中網羅孰能制豈與
鄉曲士携手共言誓

拔劍臨白刃安能相中傷但畏工言子稱我三江旁飛
泉流玉山懸車栖扶桑日月徑千里素風發微霜世路
異窮達咨嗟安可長

朝登洪波顛日夕望西山荆棘被原野群鳥飛翩翩鷺
鷺時栖宿性命有自然庭木誰能近秋月復嬋娟不見
林中葛延蔓相勾連

驅車出門去意欲遠征行征行安所如背弃夸與名夸
名不在已但願適中情單帷蔽皎日高樹隔微聲讒邪
使交流浮雲令晝冥嫵婉同衣裳一顧傾人城從容在
一時繁華不再榮晨朝奄復暮不見所歡形黃鳥東南
飛寄言謝友生

一日復一夕一夕復一朝顏色改平常精神自損消曾
中懷湯火變化故相招萬事無窮理知謀苦不饒但恐
須臾間魂氣隨風飄終身履薄冰誰知我心焦
一日復一朝一昏復一晨容色改平常精神自飄淪臨
觴多哀楚思我故時人對酒不能言悽愴懷酸辛願耕
東臯陽誰與守其真愁苦在一時高行傷微身曲直何
所爲龍蛇爲我憐
世務何續紛人道苦不遑壯年以時逝朝露待太陽願
攬羲和轡白日不移光天階路殊絕雲漢邈無梁濯髮
暘谷濱遠遊崑岳傍登彼列仙唄採此秋蘭芳時路烏
足爭太極可翱翔

情詩二首

張華

北方有佳人端坐鼓鳴琴終晨撫管絃日夕不成音憂
來結不解我思存所欽君子尋時役幽妾懷苦心初爲
三載別於今久滯滯若耶生戶牖庭內自成陰翔鳥鳴
翠偶草虫相和吟心悲易感激俛仰淚流衿願託晨風
翼東帶侍衣衾

明月曜清景曦光照玄墀幽人守靜夜迴身入空帷東
帶俟將朝廓落晨星稀寐假交精爽覲我佳人姿巧笑
媚懽靨聯娟眸與眉寤言增長嘆悽然心獨悲

榮木詩四首

陶潛

采采榮木結根于茲晨耀其華夕已喪之人生若寄顛

賴有時靜言孔念中心悵而○采采榮木于茲託根繁
華朝起慨暮不存貞脆由人禍福無門匪道曷依匪善
奚敦○嗟余小子稟茲固陋徂年旣流業不增舊志彼
不舍安此日富我之懷矣怛焉內疚○先師遺訓余豈
云墜四十無聞斯不足畏脂我名車策我名驥千里雖
遙孰敢不至

哀傷

怨詩

漢王嬙昭君

秋木萋萋其葉萎黃有鳥處山集于苞桑養育毛羽形
容生光旣得升雲上游曲房離宮絕曠身體摧藏志念
抑沉不得頡頏雖得委食心有徊徨我獨伊何來往變

常翩翩之鸞遠集西羌高山峩峩河水泱泱父兮毋兮
道里悠長嗚呼哀哉憂心惻傷

悲憤詩

二首

漢蔡琰文姬

嗟薄祐兮遭世患宗族殄兮門戶單身執畧兮入西關
歷險阻兮之羌蠻山谷眇兮路漫漫眷東顧兮但悲歎
冥當寢兮不能安饑當食兮不能餐常流涕兮皆不乾
薄志節兮念死難雖苟活兮無形顏惟彼方兮遠陽精
陰氣凝兮雪夏零沙漠雍兮塵冥冥有草木兮春不榮
人似禽兮食臭腥言堯離兮狀窈停歲聿暮兮時邁征
夜悠長兮禁門扃不能寐兮起屏營登胡殿兮臨黃庭
玄雲合兮翳月星北風厲兮肅泠泠胡笳動兮邊馬鳴

孤鴈歸兮聲嚶嚶樂人興兮彈琴箏音相和兮悲且清
心吐思兮胸憤盈欲舒氣兮恐被驚含哀咽兮涕沾頸
家既迎兮當歸寧臨長路兮捐所生兒呼母兮號失聲
我掩耳兮不忍聽追持我兮走筦筦頓復起兮毀頰形
還顧之兮破人情心怛絕兮死復生

漢季失權柄董卓亂天常志欲圖篡弒先害諸賢良逼
迫遷舊邦擁主以自疆海內興義師欲共討不祥卓衆
來東下金甲耀日光平土人脆弱來兵皆吾羗獵野圍
城邑所向悉破亡斬殲無孑遺尸骸相穿拒馬邊縣男
頭馬後載婦女長驅西入關迥路險且阻還顧邈冥冥
肝脾爲爛腐所畧有萬計不得令屯聚或有骨肉俱欲

言不敢語失意機微間輒言斃降虜要當以亭刃我曹
不活汝豈復惜性命不堪其言罵或使加捶杖毒痛參
井下旦則號泣行夜則悲吟坐欲死不能得欲生無一
可彼蒼者何辜乃遭此厄禍邊荒與羣異人俗少義理
處所多霜雪胡風春夏起翩翩吹我衣蕭蕭入我耳感
時念父母哀嘆無窮已有客從外來聞之常歡喜迎問
其消息輒復非鄉里邂逅微時願骨肉來迎已已得自
解免當復棄兒子天屬綴人心念別無會期存亡永乖
隔不忍與之辭兒前抱我頸問母欲何之人言母當去
豈復有還時阿母常仁側今何更不慈我尚未成人柰
何不顧思見此崩五内恍惚生狂疑號泣手撫摩當發

復回疑兼有同時輩相送告離別慕我獨得歸哀叫聲
摧裂馬爲立踟躕車爲不轉轍觀者皆歔歔行路亦嗚
咽去去割情戀道征日遐邁悠悠三千里何時復交會
念我出腹子曾臆爲摧敗旣至家人盡又復無中外城
郭爲山林庭宇生荆艾白骨不知誰從橫莫覆蓋出門
無人聲豺狼號且吠笑對孤景但咤糜肝肺登高遠
眺望魂神忽飛逝奄若壽命盡旁人相寬大爲復疆視
息雖生何聊賴託命於新人竭心自勗厲流離成鄙賤
常恐復損廢人生幾何時懷憂終年歲

怨篇詩

張衡

猗猗秋蘭植彼中阿有馥其芳有黃其葩雖曰幽深厥

美稱嘉之子云遠我勞如何

七哀詩

阮瑤

丁年難再遇富貴不重來良時忽一過身體爲土灰冥
冥九泉室漫漫長夜臺身盡氣力索精魂靡所迴嘉穀
設不御旨酒盈觴杯出曠望故鄉但見高與萊

思慕詩

魏吳質季重

愴愴懷殷憂殷憂不可居徒倚不能坐出入步踟躕念
蒙聖主恩榮爵與衆殊自謂永終身志氣甫當舒何意
中見弃弃我就黃墟筑筑靡所恃淚下如連珠隨沒無
所益身死名不書慷慨自俛仰庶幾烈丈夫

哀詩

潘岳

濯如葉落樹遶石雨絕天雨絕有歸雲葉落何連山時
氣冒岡嶺長風鼓松栢堂虛聞鳥聲室暗如日夕晝愁
奄逮昏夜思忽終昔展轉獨悲窮泣下沾枕席人居天
地間飄若遠行客先後詎能幾誰能弊金石

表哀詩

孫綽

茫茫太極賦受理殊咨生不辰仁考夙徂微微冲弱眇
眇偏孤叩心昊蒼痛貫黃墟肅我以義鞠我以仁嚴邁
商風恩洽陽春昔聞鄒母勤教善分懿矣慈妣曠世齊
運嗟予小子譬彼土糞俯愧陋質仰忝高訓悠悠玄運
四氣錯序自我酷痛載離寒暑寥寥空堂寂寂響戶塵
蒙几筵風生棟宇感昔有特望晨遲顏婉變懷袖極願

盡歡柰何茲妣歸體幽埏酷矣痛深剖髓摧肝

悲從弟仲德詩

陶潛

銜哀過舊宅悲淚應心零借問爲誰悲懷人在九冥禮
服名群從恩愛若同生門前執手時何意爾先傾在數
竟不免爲山不及成慈母沈哀痛二胤纔數齡雙位委
空館朝夕無哭聲流塵集虛坐宿草旅前庭階除曠遊
迹園林獨餘情翳然乘化去終天不復形遲遲將回步
惻惻悲襟盈

廣文選卷第九

廣文選卷第十

詩

贈答上

錄別詩六首

漢李陵少卿

有鳥西南飛熠熠似蒼鷹朝發天北隅暮聞日南陵欲
寄一言辭託之牋綵繒因風附輕翼以遺心蘊蒸鳥辭
路悠長羽翼不能勝意欲從鳥逝駑馬不可乘

爍爍三星列拳拳月初生寒涼應節至蟋蟀夜悲鳴晨
風動喬木枝葉日夜零遊子暮思歸塞耳不能聽遠望
正蕭條百里無人聲豺狼鳴後園虎豹步前庭遠處天
一隅苦困獨零丁親人隨風散歷歷如流星三革離不

結思心獨屏營願得萱草枝以解饑渴情

寂寂君子坐奕奕合衆芳溫聲何穆穆因風動馨香清
言振東序良時著西庠乃命絲竹音列席無高唱悲意
何慷慨清歌正激揚長哀發華屋四座莫不傷

晨風鳴北林熠熠東南飛願言所相思日暮不垂帷明
月照高樓想見餘光輝玄鳥夜過庭髣髴能復飛寒裳
路踟躕彷徨不能歸浮雲日千里安知我心悲思得瓊
樹枝以解長渴饑

陟彼南山隅送子淇水陽爾行西南游我獨東北翔轅
馬顧悲鳴五步一彷徨雙鳧相背飛相違日已長遠望
雲中路相見來珪璋萬里遙相思何益心獨傷隨時愛

景耀願言莫相忘

鍾子歌南音仲尼歎歸與戎馬悲邊鳴遊子戀故廬陽
鳥歸飛雲蛟龍樂潛居人生一世間貴與願同俱身無
四凶罪何爲天一隅與其苦筋力必欲榮薄軀不如及
清時策名於天衢

答別詩二首

漢蘇武子卿

童童孤生柳寄根河水泥連翩遊客子于冬服涼衣去
家千里餘一身常渴饑寒夜立清庭仰瞻天漢湄寒風
吹我骨嚴霜切我肌憂心常慘戚晨風爲我悲瑤光游
何速行願芰荷遲仰視雲間星忽若割長帷低頭還自
憐盛年行已衰依依戀明世愴愴難久懷

雙鳧俱北飛一鳧獨南翔子當留斯館我當歸故鄉一
別如秦胡會見何詎與愴恨切中懷不覺淚沾裳願子
長努力言笑莫相忘

贈婦詩三首

漢秦嘉

人生譬朝露居世多屯蹇憂艱常早至歡會常苦晚念
當奉時役去爾日遙遠遣車迎子還空往復空返省書
情悽愴臨食不能飮獨坐空房中誰與相勸勉長夜不
能眠伏枕獨展轉憂來如循環匪席不可卷
皇靈無私親爲善荷天祿傷我與爾身少小罹笄獨旣
得結大義歡樂苦不足念當遠離別思念叙欵曲河廣
無舟梁道近隔丘陸臨路懷惆悵中駕正躑躅浮雲起

高山悲風激深谷良馬不迴鞍輕車不轉轂針藥可屢
進愁思難爲數貞士篤終始因義不可促

蕭蕭僕夫征鏘鏘揚和鈴清晨當引邁束帶待鷄鳴顧
看空室中髣髴想姿形一別愴邁恨起坐爲不寧何用
叙我心遺思致欵誠實叙好耀首明鏡可鑒形芳香去
垢穢素琴有清聲詩人感木瓜乃欲答瑤瓊愧彼贈我
厚慙此徃物輕雖知未足報書用叙我情

答秦嘉詩

漢徐淑

妾身兮不令嬰疾兮來歸沉滯兮家門歷時兮不羞曠
廢兮侍覲情敬兮有違君兮今兮半命遠逝兮京師悠悠
兮離別無因兮叙懷瞻望兮踴躍佇立兮徘徊思君兮

感結夢想兮容暉君發兮引邁去我兮日乖恨無兮羽
翼高飛兮相追長吟兮求歎淚下兮沾衣

答元式詩

蔡邕

伊余有行爰戾茲邦先進博學同規率從濟濟群彥如
雲如龍君子博文貽我德音辭之佳矣穆如清風

答劉公幹詩

徐幹

與子別無幾所經未一句我思一何篤其愁如三春雖
路在咫尺難涉如九關陶陶諸夏別草木昌且繁

贈毋丘儉詩

魏杜摯德魯

騏驥馬不試婆娑槽櫪問壯士志士申坎壈多辛酸伊
摯為媵臣呂望身操竿夷吾困商山竊戚對牛嘆食其

處監門淮陰饑不餐買臣老負薪妻叛呼不還釋之官
十年位不增故官才非八子倫而與齊其患無知不在
此袁盎未有言彼此屬病久榮衛動不安聞有韓衆藥
信來給一丸

答杜摯詩

魏毋丘儉仲恭

鳳鳥翔京邑哀鳴有所思才為聖世出德音何不怡八
子未際遇今者遭明時胡康出龍畝楊偉無根基飛騰
冲雲天奮迅協光熙駿驥骨法異伯樂觀知之但當養
羽翮鴻舉必有期體無纖微疾安能問良醫聯翩輕栖
集還為燕雀啞韓衆藥雖良恐更不能治悠悠千里情
薄言答嘉詩信心感諸中中賞不在辭

贈梅公明詩

魏繁欽 休伯

瞻我北國有條者桑遘此春景既茂且長氤氳吐葉柔
潤有光黃條蔓衍青鳥來翔日月其邁時不可忘公子
瞻旃勲名乃彰

答贈詩

魏邯鄲淳 子叔

我受上命來隨臨苗與君子處曾未盈暮見召本朝駕
言趣期群子重離首命于時餞我路隅贈我嘉辭既受
德音敢不答之余惟薄德既局且鄙見養賢侯於今四
祀既庇西伯永誓沒齒今也被命義在不俟瞻戀我侯
又慕君子行道遲遲體逝情止豈無好爵懼不我與聖
主受命千載一遇攀龍附鳳必在初舉行矣去矣別易

會難自強不息人誰獲安願子大夫勉贊成山天休方

至萬福爾臻

答二郭詩 三首

嵇康 五首

天下悠悠者下京趨上京二郭懷不群超然來北征樂
道託萊廬雅志無所營良時遘其願遂結歡愛情君子
義是親恩好篤平生寡志自生災屢使衆譽成豫子匿
梁側聶政變其形顧此懷怛惕慮在苟自寧今當寄他
域嚴駕不得停本圖終宴婉今更不克并三子贈嘉詩
馥如幽蘭馨戀土思所親不知氣憤盈

昔蒙父兄祚少得離負荷因跡遂成懶寢跡北山阿但
願養性命終已靡有他良辰不我期當年值紛華坎壈

趣世教常恐嬰網羅義農逸已遠拊膺獨咨嗟朔戒貴
尚容漁父好揚波雖逸亦以難非余心所嘉豈若翔區
外食瓊漱朝霞遺物棄鄙累道遙游太和結友集靈岳
彈琴登清歌有能從此者古人何足多
詳觀凌世務屯險多憂虞施報更相市大道匿不舒夷
路值枳棘安步將焉如權智相傾奪名位不可居鸞鳳
避爵羅遠託崑崙墟莊周悼靈龜越稷嗟王輿至人存
諸已隱璞樂玄虛功名何足殉乃欲列簡書所好亮若
茲楊氏歎交衢去去從所志敢謝道不俱

與阮德如詩

含哀還舊廬感切傷心肝良時遘數子談慰臭如蘭疇

昔恨不早旣面侔舊歡不悟卒永離念隔長憂歎事故
無不有別易會良難邇人忽已逝匠石寢不言澤雉窮
野草靈龜樂泥蟠榮名穢人身高位多災患未若捐外
累肆志養浩然顏氏希有虞隰子慕黃軒涓彭獨何人
唯志在所安漸漬殉近欲一往不可攀生生在豫積勿
以休自寬南土早不涼衿計宜早完君其愛德素行路
慎風寒自力致所懷臨文情辛酸

贈秀才入軍詩

流俗難悟逐物不還至人遠鑒歸之自然萬物為一四
海同宅與彼共之予何所惜生若浮寄暫見忽終世故
紛紜棄之八成澤雉雖饑不願園林安能服御勞形苦

心身貴名賤榮辱何在貴得肆志縱心無悔

答程曉詩

傅玄

奕奕兩儀昭昭太陽四氣代升三朝受祥濟濟群后
我聖皇元服肇御配天垂光伊周作弼王室惟康
顯顯兆民蠢蠢戎羶率土充庭萬國奉蕃皇澤雲行
神化風宣六合咸熙遐邇同歡赫赫明明天人合和
下罔遺滯焦朽斯華矧我良朋如王之嘉穆穆雖與
頌作歌

贈長安令劉正伯詩

潘尼四首

遊鸞憑太虛騰鱗託浮霄過蒙嘉時會假翼陵扶搖
疲憊充時乏及余再同僚並跡侍儲宮攜手登皇朝
劉侯撫西都邁績參豹喬德厚化必深政明姦自消
萬尋由

積篋千里一步超爾其騁逸軌遠塗固可要

又贈隴西太守張正治詩

二八由唐顯周以多士隆群靈感韶運理翮應翔風
張生拔幽華蘋繁登二宮未幾振朱錦剖符撫西戎
及子仍同僚贈言貽爾躬威刑有時用唯德可令終

答傅咸詩

悠悠群吏非子不整嗷嗷衆議非子不靖忽荷累紐握
綱提領矯矯貞臣惟國之屏

答陸士衡詩

顧茲蓬蔚厠根蘭陂膏澤雖均華不足披逮春不茂未
秋先萎子濯鱗翼我控羽儀願言難常載合載離昔遊

禁闥祇畏夕惕今放丘園縱心夷易口詠新詩日玩文
跡予志耕圃爾勤王役慙無琬琰以酬酬尺璧

贈潘岳詩

陸機

水會于海雲翔于天道之所混孰後孰先及子雖殊同
升太玄舍被玄冕襲此雲冠遺情市朝永志丘園靜猶
幽谷動若揮蘭

贈傅咸詩

晉程曉 季明

粲粲獨夫寂寂靜處酒不盈觴肴不掩俎厥客伊何許
由巢父歟醴伊何玄酒瓠脯

贈褚武良詩

傅咸 四首

爰暨于褚惟晉之禎肇振鳳翼羽儀上京聿作喉舌納

言紫庭光贊帝道敷皇之明方任之重實在江揚乃授
旄鉞宣曜威靈悠悠遐邁東夏于征

又贈崔伏二郎詩

英妙之選二生之授顛顛兩城歡德之茂君子所居九
夷非陋無狹百里而不垂覆人之好我贈我清詩示我
周行心與道期誠發自忠義形於辭古人辭讜豈不爾
思

又與尚書同僚詩

非望之寵謬加于已猥授非據奄司萬里煌煌朱軒服
驥叅駉曄曄初星肅肅臣僕暉光顯赫衆目所屬斯之
弗稱匪榮伊辱質弱尚甫受任膺揚德非樊仲王命是

將百城或違無能有匡一州之矜將弛其綱得意忘言
言在意後夫惟神交可以長久我心之孚有盈于缶與
子偕老豈曰執手出司萬里牧彼朔濱服冕乘軒六轡
既均威風先邁百城肅震

又答潘尼詩

貽我妙文繁春之榮匪榮斯尚乃新其聲吉甫作頌有
馥其馨寔由樊仲其德克明授此瓦礫厠彼瑤瓊既非
其喻聞寵若驚

答孫楚詩

晉董威輦

獨處無娛我以為歡清流可飲至道可殮何為栖栖自
使疲单玄鳥紆幙而不被害鴈隼遠巢咸以欲死盼彼

魚遂巡倒尾沉吟不決忽焉失水嗟呼魚鳥萬世不
悟以我觀之乃明其故知哉達人深穆其度

贈棗腆詩

晉石崇
季倫

久官無成績栖遲於徐方寂寂守空城悠悠思故鄉恂
恂二三賢身遠屈龍光攜手沂泗間遂登舞雩堂文藻
譬春華談話猶蘭芳消憂以觴醴娛耳以名娼博奕逞
妙思弓矢威邊疆

贈石崇詩

晉曹攄
顏遠

涓涓谷中泉鬱鬱岩下林泄泄群翟飛咬咬春鳥吟野
次何寂寞薄暮愁人心三軍望衡蓋歎息有餘音臨肴
忘肉味對酒不能斟人言重別離斯情效於今

答石崇詩

晉棗腆 玄方

昔我不造備嘗顛沛后土傾基皇天隕蓋少懷蒙昧長
無耿介遺訓莫聞出入靡賴我舅敷命于彼徐方載誅
陟岡言念渭陽乃泝洪流汎身餘鯨宵寢晨逝曷路之
長亦既至止願言以寫爰有石侯作鎮東夏寬以撫戎
從容柔雅我聞有言居安思危位極則遷勢至必移上
德無欲貴道不為妙識先覺通夢皇義竊覩堂奧欽蹈
明規

贈虞顯度詩

張協

疇昔協蘭房繾綣在華年嘉好結平素分著寮友前謂
得終遐日綢繆永周旋吾子遭不造遘閔下憂艱俾我

失良朋誰與吐語言一日為三秋歲况乃三年離居一
何闊結思如迴川

贈摯虞詩

晉杜育

之子于歸言秣其駒矧乃斯人乃邁乃徂雖非顯甫餞
彼百壺雖非張仲將膾河魚人亦有言貴在同音雖曰
翻飛曾未異林顧戀同枝增其慨心望爾不遐無金玉
音

答杜育詩

摯虞

越有杜生既文且哲龍躍穎豫有聲彰激賴茲三益如
琢如切好以義結友以文會豈伊在高分定傾蓋其人
如玉美彼生芻鍾鼓匪樂安用百壺老夫灌灌離群索

居懷戀結好心焉悵如

答賈融詩

晉歐陽建 堅石

於鑠我舅明德塞遠俾扞東藩在徐之邳載播其惠載揚其威濟寬以猛方夏以綏光啓先業增耀重暉咨余冲人艱苦攸離過庭無聞頑固匪移寔賴茲誨導之執儀仰遵嘉訓俯蹈明規如葛斯蔓如樛斯垂我講君子仰之彌高巖巖其高即之惟温居盈思冲在貴忘尊縱酒嘉讌自明及昏無幽不研靡奧不論人樂其量士感其敦

贈海法師

梁蕭子雲

直心好丘壑偏悅幽栖人忽聞龍山旅萬里自相親沉

寥晚霖霽重疊晴雲新秋至蟬鳴柳風高露起塵動予憶山思惆悵惜荷巾

贈答下

贈長沙公詩

四首

陶潛 十九首

同源分流人易世踈慨然寐歎念茲厥初禮服遂悠歲月眇徂感彼行路眷然躊躇○於穆令族允構斯堂諧氣冬暄映懷珪璋爰采春花載警秋霜我曰欽哉實宗之光○伊余云邁在長忘同笑言未久逝焉西東遙遙三湘滔滔九江山川阻遠行李時通○何以寫心貽此話言進篋雖微終焉為山敬哉離人臨路悽然款襟或遼音問其先

酬丁柴桑詩二首

有客有客爰來爰止秉直司聰于惠百里食勝如歸聆
善若始○匪惟諧也屢有良由載言載眺以寫我憂放
歡一遇既醉還休寔欣心期方從我遊

答龐參軍詩六首

衡門之下有琴有書載彈載詠爰得我娛豈無他好樂
是幽居朝為灌園夕偃蓬廬○人之所寶尚或未珍不
有同愛云胡以親我求良友寔觀懷人懼心孔洽棟宇
惟隣○伊余懷人欣德孜孜我有旨酒與汝樂之乃陳
好言乃著新詩一日不見如何不思○嘉遊未斲誓將
離分送爾于路銜觴無欣依依晉楚邈邈西雲之子之

遠良話曷聞○昔我云別倉庚載鳴今也遇之霰雪飄
零大藩有命作使上京豈忘宴安王事靡寧○慘慘寒
日蕭蕭其風翩彼方舟容裔江中勗哉征人在始思終
敬茲良辰以保爾躬

和劉柴桑詩

山澤父兄招胡事乃躊躇直為親舊故未忍言索居良
辰入奇懷挈杖還西廬荒塗無歸人時時見廢墟茅茨
已就治新疇復應畚谷風轉凄薄春醪解饑劬荷女雖
非勇慰情良勝無栖栖世中事歲月共相踈織稱其
用過此奚所須去云百年外身名同翳如

和郭主簿詩二首

藹藹堂前林中夏時清陰凱風內時來回聽開我襟息
交遊閑業計起弄書琴園蔬有餘滋舊穀猶儲今營已
良有極過足非所欽春秋作美酒酒熟吾自斟弱子戲
我側學語未成音此事直復樂聊用忘華簪遙望白
雲懷古一何深

和澤周三春清涼素秋節露凝無游氣天高風景澈陵
峯聳逸風遙瞻皆奇絕芳菊開林耀青松冠巖列懷此
真秀姿卓爲霜下傑銜觴念幽人千載撫爾訣檢素不
獲展厭厭竟良月

贈羊長史詩

愚生三季後慨然念黃虞得知千載外正賴古人書聖

賢留餘迹事事在中都豈忘游心目關河不可踰九域
甫已一逝將理舟輿聞君當先邁負病不獲俱路若經
商山爲我少躊躇多謝綺與用精爽今何如紫芝誰復
採深谷久應無駟馬無貴患貧賤有交娛清誼結心曲
人乘運見踈擁懷累代下言盡意不舒

和胡西曹詩

糝賓五月中清氣起南颺不駛亦不遲飄飄吹我衣重
雲蔽白日閑雨紛微微流目視西園曉暉榮紫葵於今
甚可愛奈何當復衰感物願及時每恨靡所揮悠悠待
秋稼寒落將賒遲逸想不可淹猖狂獨長悲

示周祖謝二郎詩

負病頽蒼下終日無一欣藥石有時閑念我意中人相
去不尋常道路邈何因周生述孔業但謝響然臻道喪
向千載今朝復斯聞馬隊非講肆校書亦已勤老夫有
所愛思與爾為鄰願言誨諸子從我頽水濱

與從弟敬遠詩

寢迹衡門下邈與世相絕顧眄莫誰知荆扉晝常闐淒
淒歲暮風翳翳經日雪傾耳無希聲在日皓已潔勁氣
侵襟袖簞瓢謝屢設蕭索空宇中了無一可悅歷覽千
載書時時見遺烈高操非所攀深得固窮節平津苟不
由柄遲詎為拙寄意一言外茲契誰能別

答王僧達詩

頽延之

玉水記方流琬原載圓折蓄寶每希聲雖秘猶彰澈聆
龍際九州聞鳳窺丹穴歷聽豈多士唯然覲時哲舒文
廣國華敷言遠朝烈德輝灼光茂芳風被鄉耆側同幽
人居郊扉常晝閒林間時晏開亟廻長者轍庭昏見野
陰山明望松雪靜性浹群化徂生入窮節豫往誠歡聚
悲來非樂闕屬美謝繁翰遙懷具短札

贈馬子喬詩

鮑照二首

雙劍將離別先在匣中鳴煙雨交將夕從此忽分形雌
沈吳江裏雄飛入楚城吳江深無底楚闕有崇扃一為
天地別豈直限幽明神物終不隔千祀借還并

贈荀承詩

旅人乏愉樂薄暮增思深日落嶺雲歸延頸望江陰亂
流濃大壑長霧匝高林林際無窮處雲邊不可尋惟見
獨飛鳥千里一揚音推其感物情則知遊子心君居帝
京內高會日揮金豈念慕群客咨嗟戀景沉

贈顧倉曹詩

齊王僧孺

洛陽十二門樓闕似西崑
曖曖杳恩下相望隔畫垣
畫垣向阿閣栖鳳復栖鴛
五曹均趨奏六尚等便煩
朝爐何馥馥夜錦有餘溫
口中驅上駟驥首遍京宛
夙昔今何在生平棄不論
譬如卷施草心謝葉空存
誰復三承睫獨念九飛魂

奉賀隨王詩

謝朓 五首

星回夜未艾洞房凝遠情
雲陰滿池榭中月懸高城
喬木含風霧行鴈飛且鳴
平臺盛文雅西園富群英
芳慶良永矣君王嗣德聲
眷此伊洛詠載懷汾水情
顧已非麗則恭惠奉仁明
觀淄詠已失憮然愧簪纓
神心遺魏闕冲想顧汾陽
蕭景懷辰豫捐玦剪山楊
時惟清夏始雲景暖含芳
月陰洞野色日華麗池光
草合亭臯遠霞生川路長
端坐聞鶴引靜瑟愴復傷
懷哉泉石思歌詠鬱瓊相
春塘多迭駕言從伊與商
衮職眷英覽獨善伊何忘
願輟東都遠弘道侍雲梁

夏始和劉孱陵詩

威仰弛蒼郊龍曜表皇際
春色卷遙甸炎光麗近邑
白

頻望已騁湘荷紛可襲徒願尺波旋終怜寸景戢對窓
斜日過洞幌鮮颺入浮雲去欲窮暮鳥飛相及柔翰鎮
芳塵清源非易得迴江難絕濟云誰暢佇立良宰勗夜
漁出入事朝汲積羽余旣裳更賦子盈粒倚梧何必零
歸來共栖集

和沈右率諸君餞謝文學詩

春夜別清樽江潭復爲客歎息東流水如何故鄉陌重
樹始芬蒿芳洲轉如積望望荆臺下歸夢相思夕

答張齊興詩

荆山從百里漢廣流無極北馳星斗正南望朝雲色子
蕭兩岐功我滯三冬職誰知京洛念彷彿昆山側向夕

登城濠潛池隱復直地迴聞遙蟬天長望歸翼清文忽
景麗思泉紛寶飾勿言脩路阻勉子康衢力曾厓寂且
寥歸軫逝言陟

贈族叔衛軍詩

王融

台曜澄華鉉岳截峻經天爲象麗地作鎮不器其德有
斐斯文質超瑚璉才逸卿雲搖筆泉瀉動詠靈紛德馨
伊何如蘭之宣貞筠抽箭潤壁懷山六樂畢該五禮備
貫七訓是敷三英有祭惟旦惟公惟公惟旦

行旅

行詩二首

阮瑀

臨川多悲風秋日苦清涼客子易爲戚感此用哀傷攬

衣起躑躅上觀心與房三星守故大明月未收光鷄鳴
當何時朝晨尚未央還坐長歎息憂憂安可忘
我行自稟秋季冬乃來歸置酒高堂上友朋集光輝念
當復離別涉路險且夷思慮益惆悵淚下沾裳衣

帆入南湖詩

湛方生

彭蠡紀三江廬岳主衆阜白沙淨川路青松蔚巖首此
水何時流此山何時有人運互推遷茲器獨長久悠悠
宇宙中古今迭先後

行詩

成公綏

洋洋能耳流魏魏伊闕山高岡碣崔嵬雙阜夾長川素
石何磷磷水禽何翩翩遠涉許穎路顧思邈綿綿鬱陶

懷所親引領情緬然

入東道路詩

謝靈運

整駕辭金門命旅惟詰朝懷居顧歸雲指塗沂行颺屬
值清明節榮華感和韶陵隰繁綠杞墟囿粲紅桃鳴鷺
翬方雒纖纖麥垂苗隱軫邑里密緬邈江海遼滿目皆
古事心賞貴所高魯連謝千金延州權去朝行路既經
見願言寄吟謠

發歸瀨三瀑布望兩溪詩

我行乘日垂放舟候月圓末江免風濤涉清弄漪連積
石竦兩溪飛泉倒三山亦既窮登陟荒藹橫目前窺巖
不覩景披林豈見天陽烏尚傾翰幽篁未為遭退尋平

慶文選卷十
常時安知巢穴難風雨非攸悵志誰與宣倘有同枝
條此日卽千年

過白岸亭詩

拂衣遵沙垣緩步入蓬屋近澗洧密石遠山映疎木空
翠難強名漁釣易爲曲後蘿聆青崖春心自相屬交交
止栩黃吻吻食萍鹿傷彼人百哀嘉爾承筐樂滌悴迭
去來窮通成休憾未若長踈散萬事恒抱朴

行田登海口盤嶼山詩

羈苦孰云慰觀海藉朝風莫辯洪波極誰知大壑東依
稀採菱歌彷彿含嘖容遨遊碧沙渚遊衍卅山峯

夜宿石門詩

死中蘭畏彼霜下歇暝還雲際宿弄此石上月鳥
嘒夜棲木落知秋發異音同至聽殊響俱清越妙物
爲賞芳醕誰與伐美人竟不來鳴珂徒晞髮

北邙客舍詩

晉劉伶 伯倫

泱漭望舒隱躡黠玄夜陰寒鷄思天曙擁翅吹長音蚊
蚋歸豐草枯葉散蕭林陳醴發悴顏巴飲暢真心緼被
終不曉斯漢信難任何以除斯嘆付之與瑟琴長笛響
中夕聞此消胸襟

宿南洲浦詩

梁何遜 傳言

幽栖多暇豫從役知辛苦解纜及朝風落帆依暝浦違
鄉已信次江月初三五沉沉夜看流淵淵朝聽鼓霜洲

渡旅鴈朔颺吹宿奔夜淚坐淫淫是節偏懷土

將命三鄰詩

庾信

大國修聘禮親隣自此敦張檀事原隰負宸報成言西
過犯風露北指度輶轅交歡值公子展禮覲王孫何以
譽嘉樹徒欣賦采繁四牢盈折俎三獻滿壘樽人臣無
境外何由欣此言風俗既險阻山河不復論無因旅南
館空欲際西門眷然惟此別夙期幸共存

軍戍

從軍詩

李陵

樽酒送征人踟躕在親宴日暮浮雲滋握手淚如霰悠
悠清川水嘉魴得所薦而我在萬里結髮不相見袖中

有短書願寄雙飛燕

安封侯詩

漢崔駰亭伯

戎馬鳴兮金鼓震壯士激兮忘身命被光甲兮跨良馬
揮長戟兮彀強弩

廣陵觀兵詩

魏文帝

觀兵臨江水水流何湯湯戈矛成山林玄甲耀日光猛
將懷暴怒膽氣正縱橫誰云江水廣一葦可以航不戰
屈敵虜戢兵稱賢良古公宅岐邑實始翦殷商子孟獻營
虎牢鄭人懼稽顙充國務耕殖完零自破亡興農淮泗
間築室都徐方量宜運權畧六軍咸悅康豈如東山詩
悠悠多憂傷

遠戍勸戒詩

繁欽

肅將王事集此揚土凡我同盟既文既武郁郁桓桓有
規有矩務在和光同塵共垢各竟其心為國蕃輔閭閻
行行非法不語可否相濟闕則云補

贈兄公穆入軍詩八首

嵇康

雙鸞匿景曜戢翼太山崖抗首漱朝霞踞陽振羽儀長
鳴戲雲中時下息蘭池自謂絕塵埃終始永不虧何意
世多艱虞人來我疑雲網塞四區高羅維正參差奮迅勢
不便六翮無所施隱姿就長纓卒為時所羈單雄翻孤
逝哀吟傷生離徘徊戀儔侶慷慨高山陂鳥盡良弓藏
謀極身心危吉凶雖在已世路多嶮巖安得反初服抱

玉寶六奇逍遙遊太清攜手長相隨

鴛鴦于飛肅肅其羽朝遊高原夕宿蘭渚邕邕和鳴顧
盼儔侶俛仰慷慨優游容與

鴛鴦于飛嘯侶命儔朝遊高原夕宿中洲交頸振翼容
與清流咀嚼蘭蕙俛仰優游

沫彼長川言息其許陟彼高岡言刈其楚嗟我征邁獨
行踽踽仰彼凱風涕泣如雨

沫彼長川言息其止陟彼高岡言刈其杞嗟我獨征靡
瞻靡恃仰彼凱風載坐載起

穆穆惠風扇彼輕塵弈弈素波轉此遊鱗伊我之勞有
懷佳人寤言永思實鍾所親

所親安在舍我遠邁棄此蓀芷襲彼蕭艾雖曰幽深豈
無顛沛言念君子不遐有害

凌高遠盼俯仰咨嗟怨彼幽繫邈爾路遐雖有好音誰
與清歌雖有姝顏誰與發華仰訊高雲俯託輕波乘流
遠遁抱恨山阿

命將出征詩

張華

重華隆帝道戎蠻咸來賓徐夷興有周鬼方亦違殷今
在盛明世寇虐動四垠簞醪豈無味挾纊感至仁

北戍琅琊城詩

江孝嗣

驅馬一連翩日下情不息芳樹似佳人惆悵余何極薄
暮苦羈愁終朝傷旅食丈夫許人世安得顧心臆按劍

勿復言誰能耕與織

和江丞北戍琅琊城詩

謝朓

春城麗白日阿閣跨層樓蒼江忽渺渺驅馬復悠悠京
洛多塵霧淮濟未安流豈不思撫劍惜哉無輕舟夫君
良自勉歲暮勿淹留

廣文選卷第十

經緯冥冥

我定歷數人告其心教身齋戒施教申申乃立祖廟敬
明尊親大矣孝熙四海爰轅

王侯秉德其鄰翼翼顯明昭式清明豈矣皇帝孝德竟
全大功撫安四極

海內有姦紛亂東北詔撫成師武侯承德行樂交逆簫
勺群慝肅爲濟哉蓋定燕國

大海蕩蕩水所歸高賢愉愉民所懷太山崔百卉殖民
何貴貴有德

安其所樂終產樂終產世繼緒飛龍秋游上天高賢愉
樂民人

豐草萋女羅施善何如誰能回大莫大成教德長莫長
被無極

雷震震電耀耀明德鄉治本約治本約澤弘大加被寵
咸相保德施大世曼壽

都荔遂芳宵衣桂華孝奏天儀若日月光乘玄四龍回
馳北行羽旄殷盛芬哉芒芒孝道隨世我署文章

馮馮翼翼承天之則吾易久遠燭明四極慈惠所愛美
若休德杳杳冥冥克綽永福

磴磴即即師象山則嗚呼孝哉案撫戎國蠻夷竭歡象
來致福兼臨是愛終無丘革

嘉薦芳矣告靈饗矣告靈既饗德音孔臧惟德之臧建

侯之常承保天休令問不忘
皇皇鴻明蕩侯休德嘉承天和伊樂厥福在樂不荒惟
民之則

浚則師德下民咸殖令問在舊孔容翼翼

孔容之常承帝之明下民之樂子孫保光承順温良受
帝之光嘉薦令芳壽考不忘

承帝明德師象山則雲施稱民永受厥福承容之常承
帝之明下民安樂受福無疆

漢郊祀歌十九首
無名氏

練時日

練時日侯有望炳管蕭延四方九重開靈之旂垂惠恩

鴻祐休靈之車結玄雲駕飛龍羽旄紛靈之下若風馬

左蒼龍右白虎靈之來神哉沛先以雨般齋齋靈之至

慶陰陰相放弗震澹心靈已坐五音飾虞至且承靈億

牲繭栗菜盛香尊桂酒賓八鄉靈安留吟青黃徧觀此

毗瑤堂衆婢並綽竒麗顏如荼兆逐靡被華文厠霧縠

曳阿錫佩珠玉俠嘉夜蒞蘭芳澹容與獻嘉觴

帝臨

帝臨中壇四方承宇繩繩意變備得其所清和六合制

數以五海內安寧興文偃武后土富媪昭明三光穆穆

優游嘉服上黃

青陽

青陽開動根莖以遂膏潤并愛歧行畢逮霆聲發榮壘
處頃聽枯槁復產乃成厥命衆庶熙熙施及天胎群生
嘒嘒惟春之祺

朱明

朱明盛長敷與萬物桐生茂豫靡有所訕敷華就實既
阜旣昌登成甫田百鬼迪嘗廣大建祀肅雍不忘神若
宥之傳世無疆

西顛

西顛沉礪秋氣肅殺含秀垂穎續暨不廢姦偽不萌枵
孽伏息隅辟越遠四貉咸服旣畏茲威惟慕純德附而
不驕正心翊翊

玄冥

玄冥陵陰蟄虫蓋藏中木零落抵冬降霜易亂除邪革
正異俗兆民反本抱素懷樸條理信義望禮五嶽籍歛
之時掩收嘉穀

惟泰元

惟泰元尊媪神蕃釐經緯天地作成四時精建日月星
辰度理陰陽五行周而復始雲風雷電降甘露雨百姓
蕃滋咸循厥緒繼統共同勤順皇之德鸞路龍鱗罔不
盼飾嘉邊列陳庶幾宴享滅除凶災烈騰八荒鐘鼓箏
笙雲舞翔翔招搖靈旗九夷賓將

天地

天地並况惟余有慕爰熙紫壇思求厥路恭承禋祀緼
豫爲紛黼繡周張承神至尊千童羅舞成八佾合好效
歡虞秦一九歌畢奏斐然殊鳴琴竽瑟會軒朱璆磬金
鼓靈其有喜百官濟濟各敬厥事盛牲實俎進聞膏神
奄留臨瀕搖長麗星前揆光耀明寒暑不忒况皇章展
詩應律銅玉鳴含宮吐角激徵清發梁揚羽申以商造
茲新音永久長聲氣遠條鳳鳥翔神夕奄虞蓋孔享

日出入

日出入安窮時世不與人同故春非我春夏非我夏秋
非我秋冬非我冬泊如四海之池徧觀是邪謂何吾知
所樂獨樂六龍六龍之調使我心若昔黃其何不來下

天馬

太一况天馬下霜赤汗沫流赭志倣儻精權竒籟浮雲
掩上馳體容與逝萬里今安匹龍爲友天馬來從西極
涉流沙九夷服天馬來出泉水虎脊兩化若鬼天馬來
歷無草徑千里循東道天馬來執徐時將搖舉誰與期
天馬來開遠門竦予身逝昆崙天馬來龍之媒游閭闔
觀玉臺

天門

天門開誅蕩蕩穆並騁以臨饗光夜燭德音著靈寢乎
而鴻長生豫大朱涂廣夷石爲堂飾玉梢以舞歌體招
搖若永望星留俞塞隕光照紫幄珠煩黃幡比玃回集

貳雙飛常羊月穆穆以金波日華耀以宣明假清風軋
忽激長至重觴神裴回若留放殪冀親以肆章函蒙祉
福常若期寂寥上天知厥時泛泛滇滇從高旂殷勤此
路臚所求既正嘉吉弘以昌休嘉碑隱溢四方專精厲
意逝九閼紛云六幕浮大海

景星

景星顯見信星彪列象載昭庭日親以察參侔開闔爰
推本紀汾睢出鼎皇祐元始五音六律依章饗昭雜變
並會雅聲遠妣空桑琴瑟結信成四興遞代八風生殷
殷鍾石羽籥鳴河龍供鯉醇犧牲百末旨酒布蘭生泰
尊柘漿柝朝醒微感心攸通修名周流常羊思所并穰

穰復正直往甯馮觸切和疏寫平上天布施后土成穰
穰豐年四時榮

齊房

齊房產草九莖連葉宮童效異披圖案謀玄氣之精回
復此都蔓蔓日茂芝成靈華

后皇

后皇嘉壇立玄黃服物發冀州兆蒙祉福沈沈四塞假
狄合處經筵萬億咸遂厥宇

華燁燁

華燁燁固靈根神之旂過天門車千乘敦昆侖神之出
排玉房周流雜拔蘭堂神之行旌容容騎杳杳般從從

神之徠泛翊翊甘露降慶雲集神之愉臨壇宇九疑賓
雙龍舞神安坐鷄吉時共翊翊合所思神嘉虞申貳觴
福滂洋邁延長沛施祐分之阿揚金光橫泰河奔若雲
增揚波徧臚驪騰天歌

五神

五神相包四鄰土地廣揚浮雲托嘉壇椒蘭芳壁玉精
垂華光益億年美始興交於神若有承廣宣延咸畢觴
靈輿位偃蹇驤舟泊臚析奚遺淫淥澤注然歸

朝隴首

朝隴首覽西垠雷電容獲白麟爰五止顯黃德圖凶虐
熏鬻罔闕流離抑不詳賓百僚山河饗掩回轅鬚長

騰雨師洒路陂流星隕感惟風籥歸雲撫懷心

象載瑜

象載瑜白集西食甘露飲雲泉赤鴈集六紛員殊翁雜
五采文神所見施祉福登蓬萊結無極

赤蛟

赤蛟綏黃華蓋靈晝夜零晝晡蓋百君禮六龍位勺椒漿
靈已醉靈既享錫吉祥芒芒極降嘉觴靈殷殷爛揚光
延壽命永未央杳冥冥塞六合澤汪濊輯萬國靈禋禋
象輿轍票然逝旗透蛇禮樂成靈將歸託玄德長無衰

晉郊祀歌五首

傅玄十首

夕牲歌

天命有晉穆穆明明我其夙夜祗事上靈常于時假迄
用有成於慶玄牡進夕其牲崇德作樂神祇是聽

迎送神歌

宣文蒸哉日靖四方永信保之夙夜匪康光天之命上
帝是皇嘉樂殷慶靈祚景祥神祇隆假享福無疆

饗神歌

天祚有晉其命惟新受終于魏奄有兆民燕及皇天懷
柔百神不顯遺烈之德之純享其玄牡式用肇禋神祇
來格福祿是臻

饗神歌二首

時邁其猶昊天子之祐享有晉兆民戴之畏天之威敬

授人時不顯不承於猶繹思皇極斯建庶績咸熙庶幾
夙夜惟晉之祺

宣文惟后克配彼天撫寧四海保有康年於乎緝熙肆
用靖民爰立典制爰修禮紀作民之極莫匪資始克昌
厥後永言保之

晉天地郊明堂歌 五首

夕牲歌

皇矣有晉時邁其德受終于天光濟萬國萬國既光神
定厥祥虔于郊祀祗事上皇祗事上皇百福是臻巍巍
祖考克配彼天嘉牲匪歆德馨惟饗受天之祐神化四

方

降神歌

於赫大晉膺天景祥二帝邁德宣茲重光我皇受命奄
有萬方郊祀配享禮樂孔章神祇嘉饗祖考是皇克昌
厥後保祚無疆

天郊饗神歌

整泰壇祀皇神精氣感百靈賓蘊朱火燎芳薪紫煙遊
冠青雲神之體靡象形曠無方幽以清神之來光景照
聽無聞視無兆神之至舉歆歆靈爽協動余心神之坐
同歡娛澤雲翔化風舒嘉樂奏文中聲八音諧神是聽
咸潔齊並芬芳烹牲享玉觴神悅饗歆禋祀祐大晉
降繁祉祚京邑行四海保天年窮地紀

地郊饗神歌

整泰圻竢皇祇衆神感群靈儀陰祀設吉禮施夜將極
時未移祇之體無形象潛泰幽洞忽荒祇之出夢若有
靈無遠天下毋祇之來遺光景昭若存終冥冥祇之至
舉欣欣舞象德歌成文祇之坐同歡豫澤雨施化雲布
樂八變聲教敷物咸享祇是娛齊既潔侍者肅玉觴進
咸穆穆饗嘉麥歆德馨祚有晉暨群生溢九壤格天庭
保萬壽延億齡

明堂饗神歌

經始明堂享祀匪懈於皇烈考光配上帝赫赫上帝既
高既崇聖考是配明堂顯融率土敬職萬方來祭常于

時假保祚永世

晉江左宗廟歌

晉曹毗輔佐

四時祠祀歌

肅肅清廟巍巍聖功萬國來賓禮儀有容鍾鼓振金石
熙宣兆祚武開基神斯樂兮理管絃有來斯和說功德
吐清歌神斯樂兮洋洋玄化潤被九壤民無不悅道無
不往禮有儀樂有式詠九功永無極神斯樂兮

宋南郊登歌

顏延之

饗神歌

營泰時定天衷思心睿謀筮從建表絕設郊宮田燭置
燿火通曆元旬律首吉飾紫壇坎列室中星兆六宗秩

乾宇晏地區謚大孝昭祭禮供牲日展盛自躬具陳器
備禮容彤儻綴被歌鍾望帝闡聳神蹕靈之來辰光溢
潔柔酌娛太一明輝夜華晷日裸既始獻又終烟薌鬯
報清穹饗宋德祚王功休命永福履充

宋明堂歌九首

宋謝莊希逸

迎神歌

地紐謚乾樞回華蓋動紫微開旌蔽日車若雲駕六龍
乘網緼擘帝京輝天邑聖祖降五靈集構瑤祀聳珠簾
漢拂幌月棲檐舞綴暢鍾石融駐飛景鬱行風懋柔盛
潔牲牲百禮肅群司虔皇德遠大孝昌貫九幽洞二光
神之安解玉鑿景福至萬萬歡

登歌

雍臺辨朔澤宮練服潔火夕照明水朝陳六瑚賁室八
羽華庭昭事先聖懷濡上靈肆夏戒敬升歌發德永固
鴻基以綏萬國

歌太祖文皇帝

維天爲大維聖祖是則辰居萬寓綴旒下國內靈八輔
外光四瀛蒿宮仰蓋日館希旌複殿留景重檐結風括
楹接緯達嚮承虹設業設虛在王庭肇禋祀克配乎靈
我將我享維孟夏之春以孝以敬以立我蒸民

歌青帝

參映夕駟照晨靈乘震司青春鴈將向桐始蕤柔風舞

暄光遲萌動達萬品新潤無際澤無垠

歌赤帝

龍精初見大火中朱光北至圭景同帝在南離寔司衡
水雨方降木槿榮庶物盛長咸殷阜恩覃四寘被九有

歌黃帝

履建宅中寓司繩御四方裁化遍寒燠布政周炎涼景
麗條可結霜明水可折凱風扇朱唇白雲流素節分至
乘結畧啓閉集恒度帝運緝萬有皇靈澄國步

歌白帝

百川如鏡天地爽且明雲冲氣舉德盛在素精木葉初
下洞庭始揚波夜光徹地翻霜照懸河庶類收成歲功

行欲寧浹地奉渥罄宇承秋靈

歌黑帝

歲月既晏方馳靈乘坎德司規玄雲合晦鳥路白雲繁
亘天涯雷在地時未光飾國典閉關梁四節遍萬物殿
福九域祚八鄉晨晷促夕漏延太陰極微陽宣鵲將巢
冰已解氣濡水風動泉

送神歌

蘊禮容餘樂度靈方留景欲暮開九重肅五達鳳參差
龍已沫雲既動河既梁萬里照四空香神之車歸清都
璇庭寂玉殿虛睿化凝孝風熾顧靈心結皇思

齊雲祭樂歌

八首

謝朓

清明暢禮樂新候龍景選真辰一解陽律亢陰晷伏耕下

土荐種稯二解宸儀警王度宣瞻雲漢望旻天三解張盛樂

奏雲舞集五精延帝祖四解雩有飄縈有秩拒鬯芬圭瓚

苾五解靈之來帝閣開車煜燿吹徘徊六解停龍轡徧觀此

凍雨飛祥風靡七解壇可臨奠可歆對眎社鑿皇心八解

右迎神八章章四句

濬哲維祖長發其武帝出自震重光御寓七德攸宣九

疇咸叙靜難荆衡凝威蠡浦

昧旦丕承夕惕刑政化一車書德馨粢盛昭星夜景霏

雲曉慶衢室成陰璧水如鏡

禮克玉帛樂被匏絃於鑠在詠陟配于天自古祖兆靡

愛牲牲我將我享末祚豐年

右世祖武皇帝歌三章章八句

營翼日鳥殷宵凝水泮玄蟄昭

景陽陽風習習女夷歌東皇集

奠春酒秉青珪命田祖渥羣黎

右青帝歌三章章四句

惟此夏德德恢台兩龍在御炎精來

火景方中南訛秩靡草云黃含桃實

族雲翳鬱溫風煽興雨祁祁黍苗徧

右赤帝歌三章章二句

稟火自高明毓金挺剛克涼燠資成化羣方載厚德

陽季勾萌達炎徂溽暑

商暮百工止歲極凌陰冲

泉流疏已清原隰遠而

作平咸言祚惟億敦民保高

京

右黃帝歌三章章四句

帝說于允執矩固司藏

百川收潦精景應金方

嘉樹離披榆闕命賓鳥

夜月初霜金風方弱弱

商陰肅殺萬寶咸迹道

勞哉望歲場功冀可收

右白帝歌三章章二句

白日短玄夜深招搖轉

移太陰霜鐘鳴冥陵起星回天

月窮紀

聽嚴風來不息望玄雲黝無色曾冰冽積羽幽飛雲至

天山側

關梁閉方不巡合國吹響蜡賓統微陽究終始百禮洽
萬祚臻

右黑帝歌三章章四句

敬如在禮將周神之駕不少留

躍龍鑣轉金蓋紛上馳雲之外

警七曜詔人神排閭闔渡天津

有滄興膚寸積雨冥冥又終久

俾栖糧惟萬箱皇情暢景命昌

右送神歌五章章四句

梁宗廟登歌七首

沈約十二首

功高禮洽德尊樂備三獻具舉百司在位誠敬罔訾幽

明同致茫茫億兆無思不遂蓋之如天容之如地

殷兆玉筐周始邠王於赫文祖基我太梁肇土七十奄

有四方帝軒百祀人思未忘永言聖烈祚我無疆

有夏多罪殷人塗炭四海倒懸十室思亂自天命我殲

凶殄難既躍乃飛言登天漢爰響爰祀福祿攸贊

犧象既飾壘俎斯具我鬱載馨黃流乃注我峩峩卿士駿

奔是務佩上鳴諧纓還拂樹悠悠億兆天臨日煦

猗歟至德光被黔首鑄鎔蒼昊甄陶區有虔恭三獻對

揚萬壽比屋可封含生無咎匪徒七百天長地久

有命自天於皇后帝悠悠四海莫不來祭繁祉具膺八

神聳衛福至有兆慶來無際播此餘休于彼荒裔
祀典昭潔我禮莫違八簋充室六龍解駢神宮肅肅靈
寢微微嘉薦既饗景福攸歸至德光被洪祚載輝

梁雅樂歌

滌雅

將修盛禮其儀孔熾有膺斯牲國門是置不黎不猶靡
愆靡忌呈肌獻體永言昭事俯休至德仰綏靈志百福
具膺嘉祥允洎駿奔伊在慶單遐嗣

牲雅

反本興敬復古昭誠禮容宿設祀事孔明華俎待獻崇
碑麗牲充哉繭握肅矣簪纓其膺既啓我豆既盈庖丁

游刃葛盧驗聲多祉攸集景福來并

誠雅三首

懷忽慌瞻浩蕩盡誠潔致虔想出杳冥隆無象皇情肅
具僚仰人禮盛神途敬俊明靈申敬享咸蒼極洞玄象

二

地德溥崑丘峻揚羽翟鼓應輦出尊祇展誠信招海賈
羅嶽鎮惟福祉咸昭晉

三

我有明德馨非黍稷牲玉孔備嘉薦惟旅金懸宿設和
樂具舉禮達幽明敬行尊俎鼓鍾云送遐福是與

周祀方澤歌四首

庾信八首

昭夏

報功陰澤展禮一郊平琮鎮瑞方鼎升庖調歌絲一作
竹縮酒江茅聲舒鍾鼓器質陶匏列燿秀華凝芳都荔
川澤茂祉丘陵容衛雲飾山壘蘭渚汎齊日至之禮歆
茲大祭

昭夏

曰若厚載欽明方澤敢以敬恭陳之玉帛德包含養功
藏靈迹斯箱既千子孫則百

登歌

質明孝敬求陰順陽壇有四陛琮分八方牲牲蕩滌蕭
合馨香和鑾戾止振鬯來翔威儀簡簡鐘鼓喤喤聲和

孤竹韻入空桑封中雲氣坎上神光下元之主功深蓋
藏

皇夏

司筵撤席掌禮移次迴顧封壇恭臨坎位瘞玉埋俎藏
芬歛氣是白就幽成此地意

周宗廟歌二首

皇夏

肅肅清廟巖巖寢門敬器防滿金人戒言應轉音懸鼓
崇牙樹羽階變升歌庭紛象舞閑安象設緝熙清奠春
鮪初登新萍先薦優然入室儼乎在位悽愴履之非寒
之謂

昭夏

未維祖武潛慶靈長龍圖革命鳳曆歸昌功移上塲土也
德耀中陽清廟肅肅猛虞煌煌曲高大夏聲和盛唐牲
牲蕩滌蕭合馨香和鑾戾止振鷺來翔未敷萬國是則
四方

周大洽歌二首

昭夏

律在夾鍾服居蒼冢杳杳清思綿綿長遠就祭於合班
神於本來庭有序助祭有章樂舞六代賓歌二王和鈴
以節儉革斯鏘齊宮饌玉鬱管浮金洞庭鍾鼓龍門瑟
琴其變已變惟神是臨

登歌

神惟顯思不言而令玉帛之禮敢陳莊敬奉如弗勝薦
如受命交於神明懋於言行

廣文彙編
卷之五
詩經



